

Xwiyá yayí neainariñí Ruko eañípirini.

Ríwamiñí ripi “Xwiyá yayí neainipaxí Ruko eañípiyi” riniñípirini. O Jisaso wiepisagíyí womani. Judayí eni womani. Émáyi dokitá worini. O Poro tíni Sairaso tíni émáyi añíyo wái nurimeríná wirimeárogílorini. O gí ámáyi eni amipí Jisaso uréwapiyiri eri eñípi náni píráníñí nijíá nimóniro diñí wikwírórírixiniri ríwamiñí ripi eañípirini. Xewaniño Jisaso emearíná siñwí miwiniño eñagi náni wiepisiñowami yariñí wiri bikwí Jisaso eñípi ñwiráriníñíyo íá rori nemáná eañípirini. Ríwamiñí ámi bi “Wái wurimeiarigíáwa egíáriní.” riniñípi eni niriri eañípirini.

1 ¹⁻² Ámá obaxí amipí Jisaso xinái xiriñe dání nene tíñí e imóniñípi náni “Ríwamiñí oeaaneyí.” niyaiwiro ámá iwamíó dání Jisasomi siñwí winiro aríá wiro egíáyi wái nemeríná “Jisaso e eñípirini. E eñípirini.” nura úíápi ríwamiñí eágía aiwi ³ nioni eni “ ‘Gí ámináoxi Tiopirasoxi xixeni nijíá imóniri náni ríwamiñí awa xámi eagíápi nioni íá nirori siñwí winagíáyo yariñí niwia nuri e nemáná píráníñí diñí neñwiperi ríwamiñí neari joxi náni wiowárenapimíni.’ E neríná nañípirini.” nimónariní. ⁴ Ayí ripi náni yariñini. Joxi íá nirori amipí riréwapiyigíápi aga xixeni nijíá imóniría náni yariñini.

Añíñají wo “Irisabetí Jonoyi riniño xiriníáriní.” uriñí nánirini.

⁵ Eñíná Judayí mixí ináyí Xerotoyí riniño meñweañáná ámá apaxípáníñí imónigíá wo, Sekaraiaoyí riniño ñweañípirini. O xegí ámáyi Abaijaoyáriní. O xegí ámáyi eñíná dání Gorixoyá apaxípáníñí imónigíáyíriní. Sekaraiao xegí apixí yoí Irisabetíriní. Í xegí ámáyi arío Eronoyáyíriní. Í xegí ámáyi eni apaxípáníñí imónigíáyíriní. ⁶ Ayaú Gorixoyá siñwíyo dání wé róniñí eri Gorixo ñwí ikaxí riri sekaxí riri eñíyo miwiaíki eri neri aí ⁷ Irisabetí rípaíwí eñí eñagi náni niaíwí mayíyáú e néra nuri rixa xweyañí apiañí imónigíáriní. ⁸ O xegí ámáyi Abaijai riniñíyí Gorixo náni ridiyowá yariñíwámi ridiyowá nero wigí yariñíyápa yaríná xío tíni eni nawíni nero ⁹ wigí neríná yariñíyápa “None gímíni go ‘Ñwíáxini.’ riniñíwámi páwiniríeníñoi?” niyaiwiro yariñíyápa e nero Sekaraiao Gorixo náni ridiyowá yariñíwámi awawá

Gorixoyá tíŋí e “Ŋwíáxini.” riniŋe nipáwiri ríá awíí diŋí eaariŋípi náni oikéaniri rípeááná ¹⁰ oxí apixí bíaniríwámíni rówapigíáyí Gorixomi rixiŋí uraríná o awawá Gorixoyá tíŋí e nipáwiri Gorixo náni ríá awíí diŋí eariŋípi níkearíná ¹¹ weniŋí éyíyí winiŋinigiŋi. Aŋínají wo ríá siŋwiríá wé náumíni peyariŋími dáni siŋwí naniri yariŋe aí gínániŋí nibiri rónapiŋagi siŋwí niwíni ¹² óí neri wáyí ikárinaríná ¹³ aŋínajo re uriŋinigiŋi, “Sekaraiaxoxini, wáyí mikárinipani. Dixí niaíwí náni yariŋí wíípi Gorixo rixa aríá sini. Dixí apixí niaíwí oxí wo rixiriŋíáná joxi yoí Jonoyí wírírixini. ¹⁴ Omi nixiráná joxi seáyí e nimóniri yayí yaríná oxí apixí obaxí eni yayí epíríáriní. ¹⁵ O Gorixoyá siŋwíyo dáni ámá áminá eŋí eániŋóniŋí imóniníáriní. O iniŋí wainí minipa eri papikí yariŋíáyí minipa eri eníáriní. O sini xegí xináyá agwíyo eŋáná Gorixoyá kwíyí ukikayoníáriní. ¹⁶ O segí ámá Isireriyó uráná obaxí aríá niwiro íwí yariŋíápi ríwímíni nimamoro Gorixo wígí Ámináomi ámi xídipíríáriní. ¹⁷ Dixí íwo kwíyí Gorixoyápi xegí wíá rókiamoagí Iraiiaomi ukikayonáná eŋí neániri yagípíníŋí Jono axípíníŋí e eri riri eníáriní. Xewaxowa tñi xanowa tñi piyíá wíriniro ámá uyínií yariŋíáyí ríwímíni nimamoro wé róniŋí imóniro éfrixiniri Jono Gorixoyá Ámináomi xámi umeaníáriní. Dixí Isireriyí e ero Gorixoyá Ámináomi yeáyí wuríniro epírí náni oimóniri xámi umeaníáriní.” uríagi ¹⁸ Sekaraiáo aŋínajomí re uriŋinigiŋi, “Arige neri nioni níjá imónimí nírariŋiní? Nioni rixa xweyaŋonirini. Gí apixí eni rixa apiaŋirini.” uríagi ¹⁹ aŋínajo ámi nuriri re uriŋinigiŋi, “Gí yoí Gebireronirini. Gorixoyá símimaní e roariŋáonirini. Gorixo nioni xwiŋíá yayí seainipaxí api áwaní uriniri nirowárenapiŋoi. ²⁰ Amípí nioni xámi ririŋíyí nimóniríná nimóniníáriní. E neri aiwi xwiŋíá nioni ririŋíyí joxi ‘Neparini.’ niyaiwiri diŋí mikwíroariŋagi náni joxi ámi xwiŋíá bí miripa imóniri maní píróniri eri ei. Xámi nioni ririŋíyí nimóniríná íná ámi xwiŋíá riríá nániyi.” nuriri sini e nura waríná ²¹ oxí apixí Sekaraiáo náni weniŋí nero wáí e roŋíáyí ayá wí síá óriníagi náni ududí nero “Sekaraiáo pí ría yarini?” niyaiwiro ²² o nipeyeááná xwiŋíá muripaxí imóníagi niwiniro “Gorixoyá awawá tíŋí e neríná oriŋá bí ría winigoí?” yaiwiaríná o “Xwiŋíá arige rimíni?” niyaiwiri xegí maní nipíróniri náni wé árixá néra uŋinigiŋi. ²³ Sekaraiáo aŋí Gorixo náni ridiyowá yariŋíwámí xegí omíŋí yariŋípi yoparípi nemi xegí aŋí e náni yoaŋinigiŋi.

²⁴ O aŋí e náni niyoari xiepími niwímeari niŋweagíísáná re eŋinigiŋi. Irisabetí niaíwí agwí neri aŋíyo ínimí píní ŋweaŋáná emá wé wú múróáná ²⁵ í re riŋinigiŋi, “Gorixo ayá ninirimixiri diŋí níkikayonagi náni níni agwí eŋáriní. Níni ámáya siŋwíyo dáni ayá ninariŋípi Gorixo yokwarimí niŋírini.” riŋinigiŋi.

Mariaími “Jisasoyí riniŋo xiriríáriní.” uriŋí nánirini.

²⁶⁻²⁷ Gorixo, Irisabetí niaíwí agwí neri emá wé wíúmi dání wo rixa eŋáná o aŋínají xegí yoí Gebireromi apixí wí ŋweaŋe náni —Í xegí yoí

Mariaíyi riniñirini. Gariri piropenisíyo aņí yoí Nasaretiyo ęweaņirini. Í ęweaęe náni urowářiņinigi. Í apixí apiyái sini oxí tını memeariņirini. Í ámá wo xegí yoí Josepoyi riniņo —O mixí ináyí Depitoyá íwiáriawé worini. O xegí meáminiri náni yariņirini. ²⁸Gorixo aņínajo í tıńí e náni urowáraná o nuri ími re urémeaņinigi, “Apixí ríxi apánirini. Gorixo diņí sixí riyiri diņí rikikayori sini.” uríagi ²⁹Mariaí aría e niwiri uduđi nikáriniri diņí re nipíkíga uņinigi, “O pí náni ría nirarini?” yaiwiariná ³⁰aņínajo re urinigi, “Mariae, wáyí mepani. Gorixo jíxi diņí sixí riyini. ³¹Aría ei. Jíxi niaíwí agwí neri niaíwí oxí wo nixirirínáyí yoí Jisasoyi wírírárini. ³²⁻³³O Ámináo nimóniri ámá niyoni seáyí e múroniníárini. Ayí o náni re ripírírárini, ‘Niaíwí Gorixo aņí seáyí émi ęweaņoyáorini.’ ripírírárini. Xiáwo Depito ámá Isireriyí níni yeáyí urínayagíapa dixí niaíwo eni Gorixoyá diņí tını e nimóniri íwiáriawé Jekopoyáyo aņiņí miní umeęweaníárini. O mixí ináyo yapi nimóniri ámá xwioxíyo mimeámí neri numeęweariná wí nipiéroníamaní. Aņiņí umeęweaníárini.” uríagi ³⁴Mariaí aņínajomi re urinigi, “Níni sini oxí womi mimeániņáyo joxi niríyí arire neri emíáríani?” uríagi ³⁵aņínajo ámi nuriri re urinigi, “Kwíyí Gorixoyápi jíxi tíámíni biri eņí eániņí Gorixo seáyí émi ęweaņoyápi jíxi rikikayori sinía eęagi náni niaíwí jíxi xiríoyí náni ‘Ijwíáorini.’ riro ‘Niaíwí Gorixoyáorini.’ riro epírírárini.” nuriri ³⁶re urinigi, “Aría ei. Dixí rirówái Irisabetí rixa apiaņí aí niaíwí oxí wo agwí eni. ‘Oxí roņíxirini.’ urarigí aiwi agwí rixa agwí tıńí eęaná emá wé wíumi dání wo imónini. ³⁷Amipí wí Gorixo mimixipa epaxí wí menini.” uríagi ³⁸Mariaí re urinigi, “Xewaniņini Gorixoyá xináíniniņí imóniņáíni omi diņí niwikwírori yariņini. Joxi niríyí anani nimixinigini.” uráná aņínajo ími píni niwiárimi uņinigi.

Mariaí Gorixomi seáyí e umeņí nánirini.

³⁹Mariaí, aņínajo e nurárimi úaná, í niwiápínimeámi aņíni niyiri dáfíni eęe Judia piropenisíyo aņí bimi náni nuri ⁴⁰nirémoríná Sekaraiáoayá aņíyo nipáwiri xirówái Irisabetími yayí wíaná ⁴¹í aría niwiríná re eņinigi. Niaíwí agwí eņo xixoyímí wiri kwíyí Gorixoyápi xíími ukikayori wíagi ⁴²píné eņí tını nuriri re urinigi, “Apixí niyoni náni Gorixo jíxini píraniniņí simixiņirini. Dixí niaíwí agwí eņomi eni píraniniņí wimixiri eņirini.” nuriri ⁴³yayí numeri re urinigi, “Gí Ámináomi xináíxi imóniríxi, arire neri níni tíámíni bíni?” nuriri ⁴⁴áwaní re urinigi, “Ai, jíxi yayí níaná aría nisiríná gí niaíwí agwíyo ínıņo yayí neri xixoyímí níagi náni rirariņini. ⁴⁵Jíxi xwiýíá Gorixoyá ririņipi diņí nikwírori ‘O niríyí nipa nimóniníárini.’ yaiwiri éí eęagi náni xewaniņixi yayí siníwinigini.” uráná ⁴⁶Mariaí re riņinigi, “Gí xwioxíyo dáni re yaiwariņini, ‘Ámináomi seáyí e oumemini.’ yaiwariņini. ⁴⁷Gorixo, níni yeáyí neayimixemeanío náni

aga yayí seáyimi dáni ninarini. ⁴⁸Niíni o xegí xináíníniñí nimóniri omiñí wiariñáíni aiwi o diñí níkikayoŋo eŋagi nání niíni yayí ninarini. Ámá agwi ríná ŋweagíáyí niíni seáyi e nimeró ríwíyo ŋweapíríáyí eni seáyi e nimeró neríná re rípiríárini, ‘Gorixo ími pírániñí wimixiñíri.’ rípiríárini. ⁴⁹Gorixo, eñí sixí eániño sañí onimiá minirápiñorini. Gorixo ŋwíáo neriniño dáni wé róniñorini. ⁵⁰Ámá gíni gíná ŋweagíáyí xíomi wáyí niwiro simaŋwíyóniñí ínimi wuríniáyo wá wianariñorini. ⁵¹O eñí neániri wíyo arirá wiemerí wíyo xopirárí wiemerí neríná ámá diñí íwí nání níkikayori ero weyí meniro yarigíáyí dowiakíniri ⁵²mixí ináyí seáyi émi imónigíáwami mamówáriri ámá sipípiami seáyi e wimixiri neri ⁵³ámá agwíni yarigíáyo aiwá nañí niniro agwí ími uyini wimixiyiri neri ámá amipí múróniñíyo anipá urowárapiri eñorini. ⁵⁴Amipí nigí aríowayá símimañíyo uriniñí diñí yaíkiá mimó aniñí diñí mori xegí omiñí wiariñwaéne Isirerene arirá neairi eñorini. ⁵⁵O arío Ebiríamo nání diñí nimori nání omi tñi xegí íwiáriawé neneni tñi ayá aniñí ninearimixa uníárini.” Mariaí e nira uñinigini. ⁵⁶Irisabetí tñi niñweañisáná rixa emá waú wo múróáná ámi xegí añí e nání uñinigini.

Jonomi xiriñí nánirini.

⁵⁷Irisabetí rixa niaíwí xiriminiñi imóniñáná niaíwí siñwí niwaniri oxí wo xiriñinigini. ⁵⁸Oxí wo xiráná í xegí úrixímeá tñi ámá añí ayo dáníyí tñi aríá re wigíawixini, “Irisabetími Gorixo ayá urimixíagi nání niaíwí wo xiriñoi.” Aríá e niwiro í tñi yayí seáyimi dáni yaríná ⁵⁹rixa síá wé wíumi dání waú wo imónáná ayí niaíwí iyí símí síó wákwaniro nibiro yoí axípi xano wíriñiñipi Sekaraiaoyi wíraniro nání yaríná ⁶⁰xinái “Oweoi!” nuriri re uriniñigini, “Nene ámi yoí axípi Sekaraiaoyi wíripaxí menini. Jonoyi owíraneyi.” uríagi ⁶¹ayí re urigíawixini, “Dixí oxoyá xoayowa aí wo yoí ‘Jonoyí riwírinini? Oweoi.’ nuriro ⁶²xano aríá eni píroniñagi nání wé árixá niwiro wé tñi yariñí re wigíawixini, “Joxi yoí gípi ‘Owírimini.’ yaiwariñini?” uríagi ⁶³Sekaraiao píraiporíá nání árixá wíagi umeaíáná o ríwamiñí re eñinigini, “Xegí yoí Jonorini.” e eáagi ayí ududí nero Jonoyi wíríyí “Pí nání ría wírarini?” yaiwariñá re eñinigini. ⁶⁴Ámi Gorixoyá diñí tñi mañí nexoari xwiyíá ripaxí nimóniri Gorixomi seáyi e numeri yaríná ⁶⁵ámá añí ayo dáníyí ududí nera nuro añí niyoni Judia píropenisí díwí miñíyo ami gími ŋweagíá píné “Irisabetí niaíwí xiráná xano Sekaraiao mañí píroniño mañí exoñoi.” ríagi aríá niwiro ⁶⁶diñí aumaúmí niniro Gorixo Jonomi diñí ukíkayoŋagi niwiniro re rinigíawixini, “Niaíwí o ríwéná pí pí ámá imóniniárani?” rinigíawixini.

Sekaraiao wíá rókiamoariñí wo yapi riñí nánirini.

⁶⁷Xano Sekaraiaomi kwíyí Gorixoyápi ukíkayoŋáná o wíá rókiamorigíá wóniñí nimóniri Jisaso nání re riñinigini, ⁶⁸“Isirereneýá Áminá Gorixomi

seáyi e oumeaneyi. O xegí ámaéne arirá neairi yeáyí neayimixemeari nineairíná ⁶⁹nene yeáyí neayimixemeanía nání enj eániñj wo iwaroŋoi. O xíoyá xináñinñj nimóniri omiñj wiagí Depitoyá íwiáríawé worini. ⁷⁰Enjíná o nání Gorixoyá wía rókiamoagíáwa xwiyíá Gorixo riñj níwuriyiríná negí aríowami re urigíawixini, ⁷¹‘Ámá nene mixí neaiarigíáyí nání éí neamíniri wikí tñi neaiarigíáyí nání éí neamíniri eníárini.’ urigíawixini. ⁷²Gorixo negí aríowami re uriniginini, ‘Nioni wá niseawianiri xwiyíá símimanñyo dání “Nemíárini.” níriri réroárinñyá símí e nitiniri niseaiimíárini.’ nuriri ⁷³⁻⁷⁴negí arío írino Ebiríamomi síñj tñj e dání re uriniginini, ‘Mixí seaianiro yarigíáyó aiwi éí seamínimíárini.’ uriniginini. Mixí neaianiro yarigíáyí emi neamamóána nene ámi wáyí wí mé amipí o ŋwí ikaxí nearinñyá níxidirane niñwearane ⁷⁵sini síñj niñwearíná wé róninñj imónirane saniñj imónirane nerane píraninñj xídaníwárini.” Sekaraiáo e nírfísáná ⁷⁶xewaxo Jono sini píomi re umeariniginini, “Niaíwoxini, ayí re riripíríárini, ‘Gorixo seáyi e ŋweañoyá wía rókiamoarinoxirini.’ riripíríárini. Joxi Ámináomi ói níwimoiri xámi umearíárini. ⁷⁷Joxi ói níwimoiríná xegí ámáyo re urayiríárini, ‘Seyíné íwí yarigíáyí ríwímíni nimamoro éáná Gorixo segí íwí yarigíáyí yokwarimí niseairi “Anani eini.” seariníárini.’ urayiríárini.” Sekaraiáo e nírirí ámi ⁷⁸⁻⁷⁹re riñiginini, “Gorixo wá neaomixiri ayá neawianiri neaiarinoxirini. O nene nání anñami dání sogwí wía ókíarinñinñj wía neaókiénapiníárini. O nene síá yiniñmí ŋweañwaéne ámá nípeaniri yarinñwaéne ói saniñyimi neawárinía nání nene nineaméra nineauri wía neaómixiyiníárini.” Sekaraiáo e riñiginini.

⁸⁰Niaíwí Jono xwé neríná xegí diñj eni rixa enj neániri diñj sixí níga nuríná ámá diñj meanj e niñweañisáná xegí Isireriyó xewaniño siñáni wimóniniginini.

Jisasomi xiriñj nánirini.

2 ¹Jonomi rixa níximáná enjáná Romiyí mixí ináyí Sisa Ogasitasoyi riniño oyá ŋwí ikaxí bí re riñirini, “Ámá xwía nírimíni ŋweagíáyí wigí xiáwo írino wayá anj e nání numiróná gí gapimanowami yoí ŋwiráririxini.” riñirini. ²Yoí ŋwirárarigíáyí e dání iwamíó ŋwirárigíárini. Yoí iwamíó ŋwirárigííná gapimaní xegí yoí Sairiniaso ínañorini. O Siria píropenisíyo meñweañorini. ³E riñj enagi nání ámá níni gapimanowami yoí ŋwiráripíri nání wigí xiáwowayá anj e nání numiróná ⁴⁻⁵ámá wo, xegí yoí Josepoyi riniño —O mixí ináyí Depitoyá íwiáríawé worini. O xiepí sini xíomi mímeániñj —Í xegí yoí Mariaírini. Sini mímeániñj aiwi niaíwí agwí enjirini. Í tñi nawíni Gariri píropenisíyo anj yoí Nasareti ŋweagííe dání níweri Judia píropenisíyo o xegí xiáwo írino wayá anj e Betirexemiñj riniñe níremori ⁶e niñwearíná í niaíwí agwí rixa yoí neri ⁷niaíwí oxí xámi iwamíó xiriño o xiriñiginini. Níximáná

rapirapí tñi xopixopí nirori aŋí áamá midáni nibiro wérixiniri miriniŋiwá rixa niréronagía náni burimákaú aiwá nariŋe bokisí wámi ínimi sá wírariŋinigini.

⁸ Aŋí api tñí e áamá wa sipisipí awí mearoarigíá wa áríwiyimi amíyo wigí sipisipí ará wiwákwiní yariŋe awí mearoŋáná re eŋinigini. ⁹ Aŋínají Gorixoyá wo wigí símimaŋí tñími dáni siŋáni rónapáná awa rogíe midimidáni Gorixoyá wía ókímixáná awa ói níkariniro yaríná ¹⁰ aŋínajo re uriŋinigini, “Wáyí mepani. Xwíyíá naŋí áamá níni diŋí yayí winipaxí bi soyíné tñí e náni nimeámi bariŋini. ¹¹ Xwíyíá nioni nimeámi bariŋápi ripirini. Agwi ríná aŋí mixí ináyí Depito xwé iwiaroŋípimi apixí wí niaíwí seyíné yeáyí seayimixemeanó xiriŋoi. O Kiraisoyi rarigíorini. Yeáyí neayimixemeanía náni aríowayá xwía piaxíyo dáni iwiaroŋíoyi rarigíorini. Ámináorini. ¹² Soyíné nuro niaíwí xirí rapirapí nixopenimáná burimákaú aiwá narigíami dáni bokisíyo sá wírariŋinigi niwiniŋíná ‘Oríani?’ yaiwírixini.” uríyí re eŋinigini. ¹³ Aŋínají áwaŋí urí roŋe Gorixoyá simiŋí wínarigíá obaxí aŋínami dáŋowa eni nirónapimáná Gorixomi seáyimi numero re rigíawixini, ¹⁴ “Ŋwía aŋínami seáyimi ŋweaŋomi seáyí e oumeaneyi. Áamá Gorixo náni diŋí aría mikeamóagíá —O ayí náni wimónariŋírini. Ayí Gorixoyá xewaxo rixa rémóáná diŋí wía wónáná awayini nisaniro ŋweárixini.” nirimowa ¹⁵ sipisipí awí mearoarigíawami píní niwíarimi aŋínami náni peyíáná awa re rinigíawixini, “Betirexemi niaíwí rémóe irínií nurane Gorixo áwaŋí nearíí náni siŋwí owinaneyi.” nirinimowa ¹⁶⁻¹⁷ aŋíni nuro Josepo tñi Mariaí tñi rípaú ŋweaŋagí niwiniro ámi weniŋí éíáyí winigíawixini. Niaíwo burimákaú aiwá narigíe bokisíyo riwo wírariŋinigi niwiniro píné aŋínajowa niaíwí o náni urípi náni áwaŋí uráná ¹⁸ áamá píné sipisipí awí mearoarigíáwa uríapi aría wiarigíáyí níni diŋí ududí nero aí ¹⁹ Mariaí xwíyíá íwo nániŋi diŋí aumaúmí niniri diŋí nipíkíga waríná ²⁰ sipisipí awí mearoarigíáwa ámi wigí sipisipí awí mearoarigíe náni nuróná aŋínajo urípi xixeni éí eŋagi winiro aría wiwo nero náni Gorixomi seáyimi umero yayí umero wigíawixini.

²¹ Niaíwo xinái nixirimáná eŋáná rixa síá wé wíumi dáŋí waú wo óráná omi iyí símí síó wákwaniróná yoí aŋínajo eŋíná xinái sini agwí meŋáná “Yoí Jisasoyi wírírixini.” uriŋipi wírigíawixini.

²² Síá Mariaí “Ŋwí ikaxí Moseso eŋíná niriri ríwamiŋí eŋípi tñi xixeni neri igíá oeánimini.” yaiwiŋíyi imóniŋáná ayaú Jisaso Gorixoyá wo oimóniri mini wianiri náni nimeámi Jerusaremi náni nuri ²³ —Ámináoyá ŋwí ikaxí re niriŋiri eániŋipi, “Niaíwí oxí xámi ói imóo Gorixomi mini niwiro ‘Dixorini.’ urírixini.” niriŋiri eániŋipi tñi xixeni ²⁴ í niaíwí xiríí náni igíá eánimiri náni Gorixoyá ŋwí ikaxí re riniŋípa “Nioni náni xawiówí waúrani, agwiriwí waúrani, ridiyowá níírixini.” E riniŋípa ayaú naŋwí ridiyowá yaniri náni nuri Jerusaremi nirémori aŋí Gorixo náni ridiyowá yarigíawími nipáwiri

ɲwí ikaxí niriniri eániɲpa yaríná ²⁵íná áamá Jerusaremiyo ɲweagiáyí wo —O xegí yof Simionorini. O áamá wé róniɲí imóniri Gorixomi pírániɲí uxídiri yariɲorini. Áamá aríowayá xwíá piaxíyo dání niwiarori xegí Isireriyo yeáyí uyimixemeaníó nání xwayí naniri ɲweaɲorini. Kwíyí Gorixoyápi omi ukikayoɲorini. ²⁶Gorixo Simionomi diɲí nukikayoríná kwíyí tñni wíá re urókiamonjinigini, “Joxi sini mipepa eɲáná áamá Ámináoniyá diɲí tñni yeáyí seayimixemeaníá nání aríowayá xwíá piaxíyo dání iwiaronfomi siɲwí winiríáriní.” uriɲiniginí. ²⁷Simiono Gorixoyá kwíyí ukikayoɲagi nání aɲí Gorixo nání ridiyowá yarigíwámi nipáwiri Jisasomi xaniyaú ɲwí ikaxí Gorixo riɲípa wiianiri nání xíomi nimeámi íwiaparíɲagi niwiniri ²⁸íwomi nurápirí íá nimaxirimáná Gorixomi seáyimi numeri re uriɲiniginí, ²⁹⁻³⁰“Ámináoxini, joxi niriɲípa áamá nene yeáyí neayimixemeaníomi rixa siɲwí tí tñni niwiniri nání ayá síwí miniró anani xe pémiáriní. ³¹Joxi riɲípa áamá níníyá siɲwíyo dání dixí yeáyí neayimixemeaníó rixa neaiapírini. ³²Áamá joxi neaiapíó wíániɲí ókíariɲípa émányo nuréwapiyíríná wíá wómixiyiníáriní. O negí Isirereneyá aɲí re dání xiríí eɲagi nání áamá nñni nene seáyimi neamepíríáriní.” uríagi ³³íwomi xaniyaú Simiono egí íwo nání xwíyíá api rariɲagi aríá niwiri ududí neri miɲí siɲá niweániri yaríná ³⁴Simiono ayaúmi “Gorixo naɲí oeaimixini.” nuriri íwomi xináí Mariaími re uriɲiniginí, “Aríá ei. Íwí romi Isireriyí nñni wí aríá niwiro diɲí wikwírófáyí seáyí e imónipíríáriní. Wí aríá miwí nero diɲí miwikwíró éfáyí anipá imónipíríáriní. Gorixo ‘Áamá nñni naɲí oimónípoyi.’ wimóniɲagi nání íwí ro símimajíóniɲí yáriníɲagi nání áamá obaxí wikí niwóniro ikayíwí numeariro yaríná ayí ínimi dání diɲí wiawiarigíáyí siɲáni imóniníáriní. ³⁵Jíxi miɲí mixí yarigíápá tñni riróagíániɲí íwí ro nání íkáníɲí sipí e siníáriní.” uriɲiniginí. ³⁶Gorixoyá wíá rókiamoarigíá wí —Í Panueromi xemiáí xegí yof Anaírini. Xíáwo írɲo Asao tñni gwí axíríriní. Í rixa apianírini. Oxí nimeániri niɲwearíná xwiogwí wé wíúmi dání waú múróáná ³⁷xíagwo rixa nipéáná í apixí aní nimóniri niɲweari xegí xwiogwí nñni rixa 84 imóniɲíriní. Í aɲí Gorixo nání ridiyowá yarigíwámi bi mipeyeá ikwáwiyirani, áríwiyirani, aiwá ɲwíá ɲweari Gorixomi xwíyíá ririmí wiri yariɲíriní. ³⁸Í eni aɲiwámi íwo íá nixiriri ɲweagíe axíná nírémori íwomi siɲwí niwiniríná Gorixomi yayí niwimí nuri áamá “Gorixo gíná Jerusaremi ɲweaɲwaéne gwíniɲí nearoayíroníáriní?” yaiwiarigíáyo íwí o nání áwaní nura uɲiniginí. ³⁹Xaniyaú Gorixo ɲwí ikaxí riɲípa rixa nipíni niyárimí Gariri piropenisíyo egí aɲí Nasaretiyi riniɲe nání íwomi nimeámi niyiri e ɲweaɲáná ⁴⁰íwo xwé niwiarori Gorixo omi ayá nurimixiri diɲí ukikayoɲagi nání eɲí eániri amípí nání diɲí eɲwiperi eɲiniginí.

Xaniyaú Jisaso nání píá egí nánirini.

⁴¹Xaniyaú xwiogwí o omi aiwá Gorixoyá aɲínajo xíáwowa Isipiyí aɲíyo ɲweaɲáná mipíkí múroɲíyimi —Síá ayimi aiwá Pasopayi riniɲí

imixarigiárini. Síá ayi nání diñí winini nání Jerusaremi nání nuayiri yayaríná ⁴²Jisaso xwiogwí rixa wé wúkaú sikwí waú eǵáná síá Gorixo múronǵiyi rixa aṅwi ayo imóniǵáná xaniyaú yarigiǵipa nání Jisaso xío tǵini Jerusaremi nání niyiro ⁴³síá aiwá api naniro nání niṅweagíasáná ámi aṅ e nání nuríná Jisaso sini Jerusaremi ṅweaǵáná xaniyaú majjá nimóniri ⁴⁴re yaiwigǵisixini, “Jisaso áamá negí wí tǵini rixa púinǵini.” niyaiwiri waríná síá wiyi órǵagi ayaú egí áamáyo tǵini áamá egí imoarigiǵyo tǵini píá imimí neri ⁴⁵píá yopa nimeǵináriri ámi Jerusaremi nání niyiri píá néra núisáná ⁴⁶rixá síá wiyáú wiyi óráná wenǵi éǵiyi winigǵisixini. Aṅǵ Gorixo nání ridiyowá yarigiǵiwámi ínimi riwo ṅweaṅagi niwiniri o Gorixoyá ṅwí ikaxí uréwapiyarigiǵá wami áwini e niṅweámáná yariǵi wiri aría wiri yariṅagi niwiniri ⁴⁷ámá Jisaso píné ráná aría niwiro ṅweagíáyí nǵini aga ududǵi nero re yaiwigíawixini, “O arire neri niǵjá nimóniri ría rarini?” yaiwiaríná ⁴⁸xaniyaú omi siṅwí niwiniri ududǵi niwiri xinái re uriṅinǵini, “Íwe, pí nání e yeaǵwapiyariṅini? Yaǵpawi ayá síwí yearoarǵagi nání joxi nání píá yariṅwii.” urǵagí ⁴⁹o re uriṅinǵini, “Pí nání aǵpagwí nioni nání ami ami píá emeariṅi? ‘Xanoyá diñí tǵini xíoyá aṅǵ riwámi ínimi ṅweani.’ miyaiwiarǵi reṅi?” urǵagi aǵ ⁵⁰xwiyá xío urǵipi nání xaniyaú niǵikwini niǵjá mimónipa neri ⁵¹xío tǵini nawíni nuro wigí aṅǵ Nasareti nírémoro Jisaso xaniyaúmi aría yǵmǵi niwiri ṅweaǵáná xinái amipí nǵini o éǵ nání diñí aumaúmǵi inaríná ⁵²Jisaso sini xwé nimóga nuríná diñí eṅwiperi xwé imóniri néra waríná Gorixo tǵini áamá nǵini tǵini eni o nání “Áamá naṅorini.” niyaiwia wagíárini.

Jono xwiyá wái uriṅi nánirini.

3 ¹Taibiriasi Sisao mixí ináyí nimóniri xwiogwí wé wúkaú sikwí wú áamá Romiyo nimeṅweámáná eǵáná Podiasi Pairato Judia piropenisíyo gapímaní niyoni nání xiráóniṅi nimóniri meṅweaǵáná Adipasi Xeroto Gariri piropenisíyo gapímaní ámináo nimóniri meṅweaǵáná xexirímeáo Piripo Ituria piropenisíyo tǵini Rirakonaitisi piropenisíyo tǵini gapímaní ámináo nimóniri meṅweaǵáná Raiseniaso gapímaní ámináo nimóniri Abirini piropenisíyo meṅweaǵáná ²Anaso tǵini xineagwo Kaiapaso tǵini apaxipániṅi imónigíwáú seáyí e nimóniri meṅweaǵáná Jono —O xegí xano Sekaraiaorini. O áamá diñí meṅweaǵáná Gorixo nírǵepari re uriṅinǵini, “Nioniyá xwiyá rǵipi Isireriyó wái uriméirixini.” urǵagi ³o iniǵi Jodani rapá tǵi e wái nemi re urimeṅinǵini, “Ámáyé íwí yarigiǵáyí rǵiwimini nimamoro nisaniro yarínáyí nioni wayí seameairi Gorixo íwí yarigiǵáyí yokwarimí seairi eníárini.” nurimeri ⁴eṅípa Gorixoyá wái rókiamoagíá wo xegí yoi Aisaiaoyi rinǵo eṅíná Jono sini meṅáná o nání níriri rǵwamiṅi re eǵinǵini, “Áamá diñí meṅími dání áamá wo rǵaiwá re riníárini, ‘Ámináo rǵwíyo binío nání segí diñí óǵ naṅiṅi wimoiro óǵ pírániṅi

imoarigiápániŋí wimoiro neróná ⁵síkwioxí imóniŋíyí xwíá xewiároro díwí xwérani, onimiáarani, yipároro óí níririwori ininŋíyo naŋí imixáriro óí síŋá niŋweari xixoaríwí néra uŋíyí pírániŋí imixáriro érixini. ⁶E neríná áamá níní Gorixo yeáyí neayimixemeáminiri yariŋagi winipíríárini. 'Áamá wo rfaiwá e rinfáriní.' Aisaiao eŋíná Jono nání e níriri ríwamiŋí eanjinigini.

⁷Jono Gorixo uriŋípa wáí urimearíná oxí apixí obaxí Jono wayí neameainiŋoiniri o tŋí e nání baríná o ayí nisaniro mé wayíni meaniro yariŋagiá niwiniri re urayiŋiginigini, "Sidírí miaéyíné, 'Ríwéná Gorixo xeaniŋí seaikáriníá eŋagi nání éí úpoyi.' go seariagi seyíné wáyí nero Gorixo e neaikáriniginiri nioni tíámíni éí bariŋoi?" nuriri ⁸re uriŋiginigini, "Seyíné íwí yariŋíápi nepa ríwímíni nimamorínáyí pírániŋí nero íkíá sogwí naŋí niweríná yariŋípa imóníírixini. Seyíné re mirinipa époyi, 'Negí arío Ebiríamoyaéne imóniŋagwi nání Gorixo wí xeaniŋí neaikáriníá menini.' mirinipa époyi. 'Gorixo Ebiríamoyá íwiárfawé nání "Nioni ayo xeaniŋí niwiríná arige xwé obaxí imóniníárini?" niyaiwiri ududí winarini.' riyaiwariŋoi? Oweoi, Gorixo diŋí e yaiwipaxí menini. Anani síŋá tíyo dání Ebiríamo nání íwiárfawé wimixiyipaxírini. ⁹Gorixo rixa rapíwé íkíá mfkí tŋí e nání íá xirini. Íkíá gini gina sogwí naŋí miwéagi niwiniríná nidikárirí ríá ikeáriníárini." uríagi ¹⁰ámá o tŋí e epíroyí egíáyí yariŋí niwiayiro re urigíawixini, "Nene nisaniri niŋwearanéná pí yaníwáriní?" urayíagiá ¹¹Jono re urayiŋiginigini, "Áamá iyíá wúkaú tŋjo wú áamá iyíá mayomi miní wíwinigini. Áamá aiwá tŋjo eni mayomi miní wíwinigini." nuriri yaríná ¹²takisí nání nigwí uráparigíá wa wayí meaniro nibiróná yariŋí re wigíawixini, "Nearéwapiyariŋoxini, none nisaniri niŋwearanéná pí yaníwáriní?" uríagiá ¹³o re uriŋiginigini, "Nigwí takisí nání ninearápipimeríná nigwí gapimanowa 'Urápíírixini.' searigíápi wiárfí nimúroro seáyi e minearápipani." nuriri yaríná ¹⁴Porisí wa eni nibiro yariŋí re wigíawixini, "None eni nisanirane niŋwearanéná pí yaníwáriní?" uríagiá o re uriŋiginigini, "Soyíné ámayá nigwí urápaniro nání iwanŋí eamero xwirixí mero yapí uxekwímoro mepa érixini. Segí nigwí omiŋí nero meáíápiní nimearíná 'Ayí apánirini.' yaiwíírixini. Áamá wayá nání ayá síwí misearopani." nuriri yaríná ¹⁵oxí apixí níní "Áamá Gorixoyá diŋíyo dání nene yeáyí neayimixemeanía nání aríowayá xwíá piaxíyo dání iwiaronío gíná imóniníáríani?" niyaiwiróná xwiŋíá Jono wáí urimeariŋípi aríá niwiro nání diŋí re nípíkíga ugíawixini, "Áamá Gorixoyá diŋí tŋni yeáyí neayimixemeanía nání aríowayá xwíá piaxíyo dání iwiaroníoyi rariŋwáo áamá ro menirani?" yaiwiaríná ¹⁶Jono áwanŋí nuriri re uriŋiginigini, "Nioni sa iniigí tŋni wayí seameaiariŋini. Nioni eŋí neániri aiwi ríwíyo binío nioni nimúroníni. Nioni áamá naŋoni aiwi o nioni tŋni xixeni mimóniŋagi nání áamá omiŋí wiariŋíyí bosoyá síkwí sú gwí wíkwaiariŋíápa nioni oyá wikweaipaxímani. O wayí niseameairíná

iniigí tñni seameainíamani. Gorixoyá kwíyí tñni seameairi ríá tñni seameairi eníarini.” nuriri ¹⁷Gorixo áamá nañíyo yeáyí nuyimixemeari sipíyo anipá imixiri eníá enjagi náni ewayí xwiyáa rípi uriñinigini, “Áamá pokí tñni witi aiwá eyeyírómí ero aiwá ná nañíyo tiro mamiwí tñni siyikí tñni ríá ikeáariro yariigíapa Gorixo eni axípi e emíániri witi mamiwí tñni ná tñni eyeyírómí iniñe aiwá náyí nañíyo tiri mamiwí tñni siyikí tñni ríá ikeáariri eminiri náni xegí pokí íá nixiriri roni.” uriñinigini. ¹⁸E nuriri áamá diñí oyaiwípoyiniri xwiyáa wí wí eni obaxí uriri xwiyáa yayí winipaxípi ríwíyo Gorixo urowárénapinío náni uriri neri ¹⁹gapimani Xeroto íwí eri xexirímeáoyá apixí Xerodiasíyi riniñí urápiri yariñagi Jono mixí nuriri “Íwí níni joxi yariñípi nañímani. Dixí ririxímeáoyá apixí nurápiriná ‘Nañí yariñini.’ risimónarini?” uríagi ²⁰Xeroto íwí níni api neñagi aí ámi wíni neri Jonomi gwí niyiri kirapusí nañíyo ñwiráñinigini.

Jisasomi wayí umeaiñí nánirini.

²¹Jiaso, Jono sini gwí miñwiráriní enjáná áamáyo wayí numeairi yaríná, Jiaso eni nibiri Jono omi wayí umeafáná Jiaso éí nirori xano Gorixomi rixiñí uraríná re enjinigini. Anjñami dání ói iniri ²²kwíyí Gorixoyá xawiówíniñí nimóniri o tññí e náni weapiri anjñami dání xwiyáa wí re rinénapiri “Gí íwí diñí sixí riyiñáoxini, joxi náni aga yayí ninarini.” rinénapiri enjinigini.

Jisasomi xiáwo íriñowa nánirini.

²³Jiaso áamáyo iwamíó nuréwapiyemeríná xegí xwiogwí 30 imóniñinigini. Oxí apixí o náni diñí re yaiwiagiárini, “Josepomi xewaxorini.” yaiwiagiárini. Josepomi xano Xiraiorini. ²⁴Omi xano Matatorini. Omi xano Ripaiorini. Omi xano Merikaiorini. Omi xano Janaiorini. Omi xano Joseporini. ²⁵Omi xano Matataiasorini. Omi xano Emosorini. Omi xano Neamorini. Omi xano Esiraiorini. Omi xano Nagaiorini. ²⁶Omi xano Meatorini. Omi xano Matataiasorini. Omi xano Semenorini. Omi xano Josekorini. Omi xano Jodaorini. ²⁷Omi xano Joananorini. Omi xano Resaorini. Omi xano Serababerorini. Omi xano Siaritierorini. Omi xano Neraiorini. ²⁸Omi xano Merikaiorini. Omi xano Edaiorini. Omi xano Kosamorini. Omi xano Erimedamorini. Omi xano Erorini. ²⁹Omi xano Josuaorini. Omi xano Eriesaorini. Omi xano Jorimorini. Omi xano Matatorini. Omi xano Ripaiorini. ³⁰Omi xano Simionorini. Omi xano Judaorini. Omi xano Joseporini. Omi xano Jonamorini. Omi xano Eraiakimorini. ³¹Omi xano Meriaiorini. Omi xano Menaorini. Omi xano Matataorini. Omi xano Netanorini. Omi xano Depitorini. ³²Omi xano Jesiorini. Omi xano Obetorini. Omi xano Bowasorini. Omi xano Sarimonorini. Omi xano Nasonorini. ³³Omi xano Aminadaporini. Omi xano Atiminorini. Omi xano Anaiorini. Omi

xano Xesironorini. Omi xano Peresorini. Omi xano Judaorini. ³⁴Omi xano Jekoporini. Omi xano Aisakorini. Omi xano Ebiriamorini. Omi xano Tiraorini. Omi xano Nexorini. ³⁵Omi xano Serakorini. Omi xano Reuorini. Omi xano Perekorini. Omi xano Ebeorini. Omi xano Seraorini. ³⁶Omi xano Kenanorini. Omi xano Apakisatorini. Omi xano Siemorini. Omi xano Nowaorini. Omi xano Remekorini. ³⁷Omi xano Metusaraorini. Omi xano Inokorini. Omi xano Jaretorini. Omi xano Maxararerorini. Omi xano Kenanorini. ³⁸Omi xano Inosorini. Omi xano Setorini. Omi xano Adamorini. Omi xano Gorixorini.

Obo iwamió wíwapiyini nánirini.

4 ¹Jisaso kwíyí Gorixoyápi omi niwímeari ukikayonáná iniigi Jodani rapáyo dáni peyaríná kwíyí Gorixoyápi amá diñí meaje niméra waríná ²sía 40 óraríná Obo “O eñí neániri xano wimónariñípi xídiniríeniñoi?” niyaiwiri omi iwamió niwíwapiyayiri yaríná sía ayo aiwá miní néra núisáná sía 40 imónáná rixa agwí wiaríná ³Obo re uriñiginini, “Joxi nepa niaíwí Gorixoyáoxi eñánáyí aiwá niri náni sñá tiyí, ‘Bisíkeriá imónei.’ urei.” uríagi ⁴Jisaso re uriñiginini, “Oweoi, wí e emiméini. Gorixoyá Bikwíyo dáni re niriniri eánini, ‘Ámá aiwá nipíri nánini diñí nimorínáyí, wí diñí niyimíñí imóniñípi meapaxí menini.’ riniñagi náni joxi nírípi wí emiméini.” uriñiginini. ⁵Obo Jisaomi seáyi émi nimeáa nipeyiri añí níni xwíá rirí nírímíni náni imóniñíyo añíni axíná siwá niwiri ⁶⁻⁷re uriñiginini, “Añí níni xwíá rirí nírímíni náni imóniñíyo joxi siwá siariñápi ayí nioniyárinini. Níni rixa nigíni imónini. ‘Ámá womi míni owimíni.’ niyaiwiríná anani míni wipaxírini. Joxi nioni náni miñí xwíáyo níkwírori nioni seáyi e niméánáyí ayí níni weyí meararigiápi api tíni dixí siapimíni.” uríagi aí ⁸Jisaso re uriñiginini, “Bikwí Gorixoyáyo re niriniri eánini, ‘Dixí Áminá Gorixomíni miñí xwíáyo ikwírori seáyi e umeri erfíni.’ riniñagi náni joxi niriariñípi wí e emiméini.” uriñiginini. ⁹Obo “Jisaso xegí xano Gorixo eñí eániñoríaniri iwamió owíwapiyiniri yapí owíwapiyimíni.” niyaiwiri omi añí Jerusaremiyo náni nimeáa nuri añí Gorixo náni ridiyowá yarigiwámi xegí rikwíyo niñwirárimáná re uriñiginini, “Joxi nepa niaíwí Gorixoyáoxi eñánáyí, xwíámi náni nimawiri xeamoi. ¹⁰Ayí ripi náni rirariñini. Gorixoyá Bikwíyo xwiýá ripi eni niriniri eánini, ‘Gorixo xegí añíñají joxi náni pírániñí awí ñweapíri náni re uriñiñoi, “Omi awí mearópoyi.” uriñiñoi.’ niriniri eániñagi náni nimawiri xeamoi.” nuriri ¹¹re uriñiginini, “Ripi eni niriniri eánini, ‘Joxi síkwí sñáyo píri uyikieámí inirixiniri ayí íá rixiripíri wé awíá sipíráoi.’ eni niriniri eániñagi náni anani nimawiri xeamóaná ‘Gorixomi xewaxoríani?’ siaiwimíni.” uríagi ¹²Jisaso re uriñiginini, “Nioni re dáni nipiérorínáyí, joxi niriariñípa Gorixo añíñají nioni íá nixiripíri nurowárenapíxá aí ripi eni niriniri eánini, ‘Dixí

Áminá Gorixoyá enjé eániŋípimi iwamíó miwíwapiyipani.’ eániŋagi náni wí nimawiri xeamómiméini.” uriniginini. ¹³E uráná obo iwamíó níni e niwíwapiyíísáná omi píni niwiárimimi nuri idáná ámi wíwapiyipaxí imónáná náni weniní neri ŋweaniginini.

Jisaso iwamíó neneri uréwapiyemenjí nánirini.

¹⁴Jisaso kwíyí Gorixoyápi ukikayonagi áamá diŋjí meaje píni niwiárimimi nuri ámi Gariri piropeniŋíyo neneri píné o náni piropeniŋí ayo ami ami yaní iwénimeariná ¹⁵o aŋjí api apimi neneri wigí rotú aŋíyo uréwapiyemeariná oxí apixí níni xíomi seáyi e umeaagiárini.

Nasareti ŋweáyí Jisasomi ríwí umogíá nánirini.

¹⁶Jisaso Nasaretiyo náni nuri —Aŋjí ayo xío sini onimíá íná niŋweari xwé iwiaroníyo náni nuri xegí íníná yariŋípa Sabaríáyo rotú aŋíyo nipáwiri Bikwí Gorixoyá íá rómíniri náni éí nirori ¹⁷rixa Bikwí Gorixoyá wíá rókiamoagi Aisaiayo riniŋo eanípi umeaíáná o nipariri xwiyíá ripi riniŋe náni píá neri niwiniríná íá re roŋiniginini, ¹⁸“Kwíyí Gorixoyápi nioni nikikayoni. Nioni áamá uyípeayíyo xwiyíá yayí winipaxí imóninípi urimíá náni nirípearí áamá íá xewwirárininíyo ‘Sini seyíné íá miseaxewwiráriní. Anani úpoyi.’ urimíá náni nirowárenapiri áamá siŋwí supárigíáyo ‘Anani siŋwí noxoari anípoyi.’ urimíá náni nirowárenapiri áamá iwaní mépero xopirárí wiro egíáyo yeáyí imiximíá náni nirowárenapiri ¹⁹‘Gorixo xegí áamá éí umininiyí aŋwi ayorini.’ urimíá náni nirowárenapiri enjírini.” Jisaso íá e niroárimimi ²⁰Bikwí ámi nixopemixárimáná rotú aŋjí meariní womi mini niwimáná éí niŋweari áamá rotú aŋíyo ŋwixapigíáyi omi ni siŋwí agwí niwiga waríná ²¹o “Xío náni ría rarini?” oyaiwípoyniri iwamíó nuriri re uriniginini, “Agwini ríwaminí nioni íá róapi seyíné aríá niwiríná rixa xixeni imónigoí.” uráná ²²níni o náni naŋiní nira uro xwiyíá awííniní yariŋí xío ríí jíapi náni diŋjí nipikíga uro nero aí re rinigíawixini, “Áamá royí sa aŋjí re dáŋjí Josepomi xewaxorini. Arige neri nijíá xwé api imóniníríani?” rinariná ²³o re uriniginini, “Seyíné ewayí xwiyíá ripi niniripíráoi, ‘Joxi nepa xwiroxi enánáyí, jiwaniŋoxi píraniní imixinei.’ niripíráoi. E niniriróná re niripíráoi, ‘“Emimí amípí aŋjí Kapaneamiyo enoi.” rariŋagiá aríá wiŋwápi ámi dixí aŋjí re eni emimí neali.’ niripíráoi.” nuriri ²⁴re uriniginini, “Nepa searariníni. Wíá rókiamoariní wo o xegí aŋíyo náni nuri Gorixoyá xwiyíá uráná xegí áamá e ŋweagiáyi omi míminarigíámani. ²⁵E neri aiwi nioni nepa searariníni píraniní aríá nípoyi. Eníná wíá rókiamoagi Irajao emearíná agwí aŋjí píriní eri iniá meapa eri áamá níni aiwá náni díwí ikeamóniro enáná Isireriyí apixí aní obaxí ŋweaŋagiá aiwi ²⁶Gorixo Irajao íwami wími arírá wíwiniginiri muowárí émáyí apixí wímíni —Í Saidoni tíŋjí e aŋjí onimíá Serapari riniŋí bimi dáŋjiriní.

Ímini arirá wíwiniginiri wáriniginini.” nuriri ²⁷re uriniginini, “Eníná wía rókiamoagí Iraisao nemeríná eni Isireriyí obaxí peyiyí tígiáyí egíá aiwi Iraisao ayo womi naní wimixagímani. Émáyi womini —O Siria dání xegí yoí Nemenorini. Omíni naní wimixinirini.” uráná ²⁸ámá níni rotú aníyo nweagíá aríá e niwiróná xwioxíyo dání ríá ápiáwíniní niwóroa nuro ²⁹niwiápnimearo omi íá nixiriro wigí aníyo dání nixoyípióa nuro díwí miní wigí aní mirinínipimi dání mamówáraniro nání nixoyípií niméra yaríná ³⁰o áwinimi niyékinimi xegí diní tíni uniginini.

Imíó diní xixéroariní womi mixí umáininí nánirini.

³¹Jisaso Gariri piropenisíyo nemeríná aní xegí yoí Kapaneamiyo nirémori Sabaríáyo nuréwapiyiri yaríná ³²ámá ayí aríá niwiróná o xwiyíá api xiáwóniní rarinagi niwiniro miní síjá níweániro yaríná re eniginini. ³³Ámá rotú aníyo nweagíáyí wo —O imíó diní xixéroarinorini. O niwiápnimeari makiríwí nimori ³⁴re uriniginini, “Ai! Nasareti dání Jisasoxini, none pí neaminiri barijini? Xwiríá neaikixéminiri ribarijini? Joxi nání nioni nijárini. Gorixo xewaxoxi xío rirípeáoxirini.” uráná ³⁵Jisaso mixí nuriri re uriniginini, “Ámi bi miripa ei. Omi píni niwiárimini ui.” uráná re eniginini. Imíó ámá omi xwiríá wí mikixé ámayo áwinimi dání meaníni neárimini uniginini. ³⁶Meaníni neárimini úaná ámá níni ói níkáriniro re rinigáwixini, “Xwiyíá oyá ení sixí eánini. O néní tíjóniní nírínáná sekaxí uráná imíó aí aríá niwiro éf warinói.” niriniro yaríná ³⁷xwiyíá o yarinípi nání piropenisí ayo ami ami yaní iwénimeniginini.

Saimonomi xineagwími naní imixiní nánirini.

³⁸Jisaso niwiápnimeámi rotú aníyo píni niwiárimini nipeyari xegí wiepisariní wo Saimonoyi rininoyá aníyo nání nuri nipáwiri omi xineagwí ríá píri wiarinagi nání ími naní owimixiniri yariní wíagía ³⁹o í sá weje nání nuri nírómáná ríá píriyo mixí uráná re eniginini. Simixípi ími píni niwiárimini úaná í rixa aníni niwiápnimeari aiwá píri nimeari niwia uniginini.

Simixí obaxíyí naní imimiximí ení nánirini.

⁴⁰Ámá aní apimi dáníyí sogwí rixa nipímeááná wigí ámá simixí xixegíni yarigíáyí nimeámi Jisaso tíjé e nání báná o ámá ayí ayo wé seáyi e ikwikwíarimí eri naní imimiximí eri yaríná ⁴¹imíó ámá ayo wíyo obaxí xixéroariníyí ámá ayo píni niwiárimini nuróná makiríwí nimoayiro re urayigáwixini, “Niaíwí Gorixoyáoxirini.” urayarinagía o imíowa xío aríowayá xwíá piaxíyo dání iwíaroníoyi rarigío enagi nání nijíá imóninagía nání o mixí nuriri “Ámi bi miripa époyi.” ururimí neri e néisáná ⁴²sá wejo wía móniními niwiápnimeámi ámá mayí e nání nuri nweanáná ámá oxí apixí níni o nání píá nemero omi niwímearóná “Nene

píni nineawiárimi mupani.” uraniro yariŋagía aiwi ⁴³o re uriŋinigini, “Gorixo re nirowárénapíŋirini, ‘Aŋí ayí ayo re uriméirixini, “Gorixo xwioxíyo mimeámí neri seameŋweanía náni seyíné nisaniro ŋweáfrixini.” uriméirixini.’ nirowárí eŋagi náni aŋí wíyo xwiyíá yayí winipaxí imóniŋí api uriminiri eni xe oumini.” nurimi nuri ⁴⁴Judayíyá aŋí api apimi rotú aŋí miriniŋíyo dáni nuréwapiya uŋinigini.

Jisasoyá diŋí t́ni peyí obaxí ubeníyo miniŋí nánirini.

5 ¹Jisaso ipí xegí yoí Genesaretipámi éi nirómáná xwiyíá Gorixoyá uraríná áamá obaxí aría wianiro náni ximiximí niniro Jisasomi ikwikwierí winaríná ²ewé bíxáu, yániŋpámi t́á bíxáu weŋagi niwiniri peyí ápearigíáwa ewé apíxaúmi dáni nayoámáná wigí ubení igíá eaariŋagía niwinimi nuri ³ewé bíbá Saimonoyápámi nipixemoániri yariŋí re wiŋinigini, “Inikí t́ŋí re píni niwiárimi ná j́e onimiápi anani niwaniréwii?” nuriri éi niŋweámáná ewé apámi dáni oxí apixí ipí maŋípá t́ŋí e rówapigíáyo nuréwapiyiri ⁴rixa nipini nurárimáná Saimonomi re uriŋinigini, “Ipí ná mími eŋe náni nimeámí nuri peyí íáyo minini náni ubení mamówárípiyi.” uríagi ⁵Saimono re uriŋinigini, “Negí neamemeariŋoxini, síá riyimi áríwiyimi peyí íá wí niminirífeniŋoiniri aniŋí miní mépearíŋáná wíá neaógoi. E neri aiwi joxi e yearíagi náni ye iwamíó mamówáraníwii.” nuriri ⁶mamówáraná re eŋinigini. Ubení ú peyí obaxíyo nimudímori rixa aríkíniminiri yariŋagi niwiniri ⁷wigí wíwaúmi ewé bíbámi ŋweagíwaú saŋí oyearápípiyiniri wápiá niwiri awaú nibiri ubení nimixearo ewépíxaúmi ikwiáraná ewépíxaú rixa ná íniminiri yariŋagi ⁸Saimoni Pitao siŋwí e niwiniri náni Jisasoyá sikwí t́ŋí e miŋí xwíáyo nikwírori re uriŋinigini, “Ámináoxini, nioni íwí yariŋáoni eŋagi náni píni niniwiárimi ui.” nuriri ⁹peyí aga xwé nimearo náni o t́ni xegí áamá níkumixiniri peyí náni yariŋíáwa t́ni ududí níkáriniro ¹⁰Sebediomí xewaxowáú Jemiso t́ni xogwáo Jono t́ni awaú Saimonomi níkumixiniri peyí náni yariŋíwaú eni ududí ikárinaríná Jisaso Saimonomi re uriŋinigini, “Joxi wáyí mikárinipani. Agwi re dáni peyí náni yariŋípániŋí áamá náni eni e néra uríárini. Áamá nioni níxídiŋpíríá náni wirimearíárini.” nurimáná eŋáná ¹¹awa ewé nimeámí nibiŋo yáni e dáni nayoaro ewé peyí amipí e nitimi omi níxída ugíawixini.

Áamá peyiyí t́ŋí womi naŋí imixiŋí nánirini.

¹²Jisaso aŋí wíyo nimeri aŋí bimi ŋweaŋáná áamá wo —O peyiyí pipírímíó yáriŋorini. O Jisasomi niwiniríná oyá sikwí t́ŋí e símimaŋí xwíáyo níkwírori wauní re uriŋinigini, “Ámináoxini, joxi naŋí nimiximinirínáyí anani naŋí nimixipaxírini.” uríagi ¹³Jisaso wé nimoauri omi seáyi e níkwíárimáná re uriŋinigini, “Nioni ‘Joxi naŋí

oimónini, nimónarini. Rixa naní imónei.” uráná re enjiginini. Peyiyí api rixa naní imónáná ¹⁴Jisaso “Ámá wíyo nioni simixíáyí nání áwaní muripa ei.” nuriri ámá o Moseso eníná ñwí ikaxí ragípi mé ámayo xewaniño áwaní nura emeniginiri e nuriri ámi re urijinigini, “Amíná apaxípániñí imónigfáwa tñj e nání nuri womi siwá niwiniri nanjwí ridiyowá nání negí arío Moseso eníná sekaxí nearagíyí bí ridiyowá siárirí joxi nanj imóníyí nání áwanj riri eni mini wírixiní.” Jisaso sekaxí e uríagi aí ¹⁵xwiyíá emimí amípí Jisaso yayinjíyí nání yaní rixa ná jíami niwéa nemerí yaríná oxí apixí obaxí omi aríá wianiro nání biro simixí wiarinjíyí nanj oneaimixiniri biro nero o tñj e nipíniro niñwearo e yayaríná ¹⁶o íníná ámá dijí meanje nání niwayiri Gorixomi xwiyíá ririmí wiagirini.

Enj nání siwímí enj womi nanj imixinjí nánirini.

¹⁷O síá wiyimi ámayo uréwapiyaríná ámá wa Parisiyi riniñíyí wa tñi Gorixoyá ñwí ikaxí uréwapiyarigíáyí wa tñi —Awa Gariri piropenisíyo anj ayí ayo dání bimiros Judia piropenisíyo anj ayí ayo dání bimiros Isireriyí anj xwé Jerusaremi dání eni biro egíáwarini. Awa Jisaso uréwapiyariñe éi niñwearo aríá wiaríná Jisaso ámá simixí wiarinjíyo nanj owimiximiniri nání enj sixí eániñí Gorixoyápi ukikayoñáná re enjiginini. ¹⁸Ámá wa wigí ámá womi —O enj nání siwímí yáñjorini. Omi íkwiañwíyo nitiro Jisaso nanj owimixininiri nimeámi nibiwo “Nimeámi nipáwirane Jisasoyá símimañjimini anjwi e owíraraneyi.” niriwo éíáyí ¹⁹ámá obaxí anj íwí e pikwipíkwí iníagía óí nání píá nimeginiro anjwámi nimeámi nixéga nipeyiro anj síá tiniñíyí wí nipíneaayiro dae nitimáná íkwiañwína tñi gwí niyiro ámá anjyo ínimi epíroyí egíáyo áwinimi gwírí e e nimamówára niwepíniro Jisaso símimañj tñjimini táná ²⁰Jisaso enj nání siwímí enjyó ámá nání xío nání dijí wikwíroto “Jisaso anani nanj imixipaxírini.” wiaiwiro yariñagía niwiniri re urijinigini, “Ámáoxini, dixí íwí yariñjipi rixa yokwarimí sífíni.” uráná ²¹Gorixoyá ñwí ikaxí eániñjipi mewegíáwa tñi Parisiowa tñi ikeagigwí re niriga ugíawixini, “Ámá royí goríani? Gorixomi riperrí numeariri yariñj royoi? Ámá íwí yariñjáyí yokwarimí yariñj royí goríani? E yariñjáyí sa Gorixorini.” rinariñagía ²²Jisaso xegí dijí tñi adadé niwiri re urijinigini, “Nioni nání segí xwioxíyo dání pí nání dijí e moariñoi?” nuriri ²³re urijinigini, “Ámá wo íwí ikáriníñj nioni yokwarimí wiánányí, ínimi imóniñagi nání ámá woxi siñwí tñi siñwí winipaxí menini. E neri aiwi nioni ámá enj nání siwímí enj womi ‘Rixa niwiápnimeari dixí íkwiañwí nimeámi ui.’ uránányí, o nanj imóníagi ámá niyínéni siñwí tñi siñwí winipaxírini.” nuriri ²⁴re urijinigini, “Niyínéni nioni nání re niaiwipíri, ‘Ámá imóniño anani ámá xwíá tíyo dánjyí íwí ikáriníñj eni anani yokwarimí wiipaxoríani?’ niaiwipíri nání pírániñj siñwí nanípoyi.” nuriri enj siwímí enjomi re urijinigini, “Nioni re rirariñjini, ‘Joxi niwiápnimeari

dixí íkwianjwí nimeámi anj e nání ui.' rirariñini." uráná re enjiginini. 25 O ámá níní sijnwí anigíe dání rixa nanj nimóniri niwiápínimeari xegí íkwianjwí sá wejína nimeari xwanjwí níkwónimi nipeyeari Gorixomi seáyi e numéra xegí anj e nání úaná 26 oxí apixí níní óf níkáriniro Gorixomi seáyi e numero wigí xwioxíyo dání sirí nipíkíniro re niriga ugíawixini, "Agwi xegí bi éagi ríyí winíwini." rigíawixini.

Ripaiomi "Nixídei." uriñj nánirini.

27 Jisaso e dání nipeyeari nuríná ámá nigwí takisí nání urápariñj wo —O xegí yoí Ripaiorini. Xegí yoí ámi bi Matiyuorini. O xegí opisi anjyo éi nweanagi Jisaso sijnwí e niwiniri re uriñjiginini, "Joxi nixídei." uráná 28 o niwiápínimeari xegí amipí níní e píní niwiárimí Jisasomi uxídiñjiginini. 29 Jisaso nání xegí anjyo aiwá xwé bi riyamí neri nweanáná takisí nání nigwí uráparigíá wa tñí ámá wíniyí tñí nibiro nawíni awaú tñí niñweámáná aiwá niniro yaríná 30 Parisi wa tñí Gorixoyá njwí ikaxí eániñjipi mewegíá wo tñí Jisaso nání wiepisariñowami anjúnimí ikaxí nuriro re urigíawixini, "Soyíné takisí nání nigwí uráparigíá awa tñí ámá íwí yariñgíá wíniyí tñí pí nání iniigí niro aiwá niro yariñoi?" uríagía 31 Jisaso ewayí xwiýíá ripi uriñjiginini, "Ámá nanj yariñgíáyi nanj oneaimixiniri xwirí tñj e nání warigíárani? Oweoi! Simixí yariñgíáyíni xwirí tñj e nání warigíárini." Ewayí xwiýíá api nuriri 32 re uriñjiginini, "Nioni ámá wé róniñj imóniñgíáyí wigí yariñgíáyí ríwímíni mamoro saniñj imóniro oépoyiniri biñámani. Íwí yariñgíáyí ríwímíni mamoro saniñj imóniro oépoyiniri biñárinini." uriñjiginini.

"Wiepisariñowa pí nání aiwá njwá miñwiráriní yariñoi?" urigíá nánirini.

33 Ámá wa Jisasomi re urigíawixini, "Jono wiepisariñowa íníná aiwá njwá njwiráriniro Gorixomi rixiñj uriro yayarigíárini. Parisiowayá wiepisariñowa eni axípi yariñgíárini. E nero aiwi joxi wiepisariñjyí aiwá njwá bi miñwiráriní íníná aiwá niro iniigí niro yariñgíárini." uríagía 34 Jisaso "Nioni gí wiepisariñáowa tñí nweanáná awa aiwá njwá njweapaxímani." urimíniri nání ewayí xwiýíá ripi uriñjiginini, "Ámá wo apixí meámíniri aiwá imixíyí ámá aiwá api nipíri nání bíáyí apixí meáo sini ayí tñí nweanáná aiwá njwá njwirárinariñgíárani? Oweoi! 35 E neri aiwi apixí meáo síá obaxí wí nórimáná enáná ámá wí omi wanínimixáná íná ámá ayí diñj sipí wiaríagí nání aiwá njwá njwirárinipíríárini." uriñjiginini. 36 Xíó rapirapí siñúníñj imóniñgíá nání ewayí xwiýíá ámi ripi uriñjiginini, "Ámá wo xegí rapirapí urú axeniñgíá niwiniríná píróminiri nání xegí siñú nimeari naxeri píroariñirani? Oweoi! Siñú naxeríná xwiríá ikixeniñoi. Siñú eni naxeri píróánáyí urú yapi xixeni axípi imóninimeniñoi." nuriri awa wigí enjíná dání "Nene e neríná wé

róniñí nimónirane niperínáyí anani Gorixo tñí e nání peyaníwáriní.” nira wagíápi sini yarigíápi tñí xwiyá siñí tñí nawíni ikwieropírixiniri ewayí xwiyá e uriniginí. ³⁷Ámi axí ripi re uriniginí, “Ámá wo re yariñímani. Memé wará sixí uríyo iniigí wainí siñí iwajjá yariñímani. E nerínáyí, memé wará sixí awá núpiyiniri wainí api puri memé wará sixíwá xwiríá ikixéniri eniñoi. ³⁸Iniigí wainí siñíyí memé wará sixí siñíyo iwajjá yariñíáriní.” uriniginí. ³⁹Xíyo yariñípi nání ámi ewayí xwiyá ripi uriniginí, “Ámá giyí iniigí wainí píyíyí ninimáná sini siñíyí nání wimónariñíriní? Oweoi, sini siñíyí nání miwimóní ‘Píyíyí apánirini.’ rariñíáriní.” uriniginí.

Sabaríáyo “Ŋwíáriní.” riniñípi yariñí wigíá nánirini.

6 ¹Jisaso xegí wiepisariñowa tñí Sabará wiyimi wítí omiñíyo áwinimi óíyo nuróná wítí siyí yániñí siñí yiyírimí nemáná mamíwí nání wé tñí xwiyixwiyí niroro nigápaní waríná ²Parisi wa re urigíawixini, “Soyíné sabaráyo ‘Ŋwíáriní.’ riniñíyo pí nání aiwá nimiaga waríñoi?” uríagá ³Jisaso re uriniginí, “Mixí ináyí Depito eníná eníyíyí sini íá miroariñí reñoi? Oweoi, íá niroro aiwí sini níjía mimóniñoi. O tñí ámá xío tñí emearigíáyí tñí agwí niwiríná ⁴seníá añí Gorixo nání peaxí tayarigíwámi o nipáwiri ‘Ŋwíáriní.’ riniñíyí, bisíkerfá Gorixo nání peaxí tayarigíáyí nimeari niniri xegí ámá níkumixiniri emearigíáyo mini wiñiginí. Bisíkerfá peaxí tayarigíá api sa apaxípániñí imónigíawani anani nipaxíriní.” nuriri “Depito e yaríná Gorixo mixí wí murípa ení enagi nání gí wiepisariñáowami pí nání mixí urariñoi?” uriminiri nání e nuriri ⁵“ ‘Sabaríáyo ayí ananirini.’ ripaxoríani?” oyaiwípoyiniri re uriniginí, “Ámá imóniñáoni Sabaráyo xiáwonirini.” uriniginí.

Wé kiriñí ení womi naní imixiñí nánirini.

⁶O Sabará ámi wiyimi rotú añíyo nipáwiri uréwapiyaríná ámá wo —O xegí wé náú kiriñí enorini. O eni e ŋweañáná ⁷Gorixoyá ŋwí ikaxí eániñípi mewegíá wa tñí Isireriyíyá Parisiyi riniñíyí wa tñí Jisaso ámá wé kiriñí enomi naní imixáná none xwiyá oumeaaraneyiníro omi xwayí niwiniro ŋweañagía aí ⁸Jisaso awa xíomi “Xwiyá oumeaaraneyí.” niyaiwiro ŋweañagía nání diñí adadí niwiri ámá wé kiriñí enomi re uriniginí, “Niwiápinimeámi nibiri ámáyo áwini e rónapei.” uríagi o niwiápinimeámi nibiri áwini e róaná ⁹Jisaso ámá e awí eániñíyáyo re uriniginí, “Nioni yariñí bi oseaimini. ‘Sabaríáyo naní niwirínáyí, ayí ananirini.’ riyaiwariñoi? ‘Sipí niwirínáyí, ayí ananirini.’ riyaiwariñoi? ‘Sabaríáyo ámá naní oimónipoyiniri naní nimixirínáyí, ayí ananirini.’ riyaiwariñoi? ‘Ámáyo xwiríá níkixerínáyí, ayí ananirini.’ riyaiwariñoi?” nuriri ¹⁰ámá e éí ŋweagíá niyoni siñwí niwinimemáná wé kiriñí enomi re uriniginí, “Dixí wé irú pímixei.” uríagi o e éaná re eniniginí. Xegí wé

naŋí imóniŋinigini. ¹¹Xegí wé naŋí imóníagi Parisiowa siŋwí e niwiniro wigí xwioxíyo dání ríániŋí niwóroa úagi nuro wigípi jíami dání re rinigiawixini, “None Jisasomi pí wipaxírini?” rinigiawixini.

Xío nání wái wurimeipíríawami rípeaŋí nánirini.

¹²Íná Jisaso xano Gorixomi xwiýíá ririmí wiminiri d́wí miŋíyo nipeyirí síá ayimi Gorixomi xwiýíá nura nuri ¹³rixa wíáni wónána “Wiepisariŋáyí obípoi.” niriri ayo wé wúkaú sikwí waúmini nirípeari “Nígí wái nurimeipíríoyínérini.” uriŋinigini. Ámá wé wúkaú sikwí waú rípeaŋowa wigí yoí rowarini. ¹⁴Saimono, omi Jisaso yoí ámi bi Pitaoyi wíríŋorini. O t́ni omi xogwáo Adiruo t́ni Jemiso t́ni Jono t́ni Piripo t́ni Batoromuo t́ni ¹⁵Matiyuo t́ni Tomaso t́ni Aripiasomi xewaxo Jemiso t́ni Saimono t́ni —O xegí yoí bi Seretoyi riniŋorini. O t́ni ¹⁶Jemisomi xewaxo Judaso t́ni Isikarioti d́ŋí Judaso t́ni —O Jisaso nání miyí uriŋorini. O t́nirini.

Ámáyo uréwapiyiri naŋí imixiri eŋí nánirini.

¹⁷Jisaso ámá xío rípeáowa t́ni d́wí miŋíyo dání niwero ayoxí naŋí e rówapána oxí apixí obaxí íníná xíomi xídarigiáyí t́ni ámá obaxí Judia piropeniŋíyo d́ŋíyí t́ni wigí aŋí xwé bi Jerusaremi d́ŋíyí t́ni ámá émayí aŋí biaú Taiayi riniŋípi t́ni Saidoniyi riniŋípi t́ni —Aŋí apiaú rawírawá imañí t́ni aŋwi e ikwíróniŋípiaúrini. Aŋí apiaúmi d́ŋíyí t́ni ¹⁸ayí Jisasomi aríá wianiŋo bimiŋo negí simixíyí naŋí oneaimixiniri bimiŋo oxí apixí imíó d́ŋí xixérori xixeaniŋí wiri egíáyí bimiŋo éána o imíó mixí umáiniri ámá niyoni naŋí nimixa uri yaríná ¹⁹oxí apixí níni oyá eŋí sixí eániŋípi ámá niyoni pírániŋí imixariŋagi niwiniro ayí eni nibiro omi wé amái rónaniŋo egíawixini.

“Yayí seainiri d́ŋí sipí seairi éwinigini.” uriŋí nánirini.

²⁰Jisaso xegí wiepisariŋíyo siŋwí niwiga nuri re uriŋinigini, “Seyíné amípí nání d́wí ikeamónarigiáyíné Gorixo xío xegí xwioxíyo mimeámí neri seameŋweaníe páwipíría nání yayí seáyimi dání oseainini. ²¹Aiwá nání agwi ríná d́wí ikeamónarigiáyíné anani aiwá niŋo agwí ími seayiri epíría nání yayí seáyimi dání oseainini. Agwi seyíné d́ŋí sipí niseairi ŋwí oeáiri aiwi ríwéná Gorixo pírániŋí seameŋweaníe nipáwiro niŋwearínáyí ripíá ripíría nání yayí seáyimi dání oseainini. ²²Seyíné ámá imóniŋáoni nixídarigiáyíné eŋagi nání ámá wa símí t́ni seairi xegí wúmi nání mixí seaxí dowáŋiŋo ikayíwí niseariŋo segí yoí xwiraimimí seariŋo seaíaná xwiríá mimónipani. ²³Ámá wí sipí e seaikárariŋagía niwinirínáyí, re yaiwíríxini, ‘Nene sipí neaikárariŋagía wigí xiáwowa eni Gorixoyá wía rókiamoagíawami sipí wikáragíáríani?’ niyaiwiro seyíné idána aŋínami nipeyiróná Gorixo naŋí wí seaiapíná eŋagi nání

nimawiri nixeamori yayí seáyimi dání néra úrixini. ²⁴E neri aiwi seyíné amípí wí mimúrónipa egíáyíné anígwini aweyi! Sía wíyi seyíné majiá seaóriniárini. Agwi ríná amípí yayí seainipaxí imóniñípi rixa nimearo sirí muní niñwearo aiwi ríwéná ríniñí meapíríá eñagi nání diñí sipí seaíwinigini. ²⁵Anígwi íníná aiwá niro agwí ími seayiri yarigiáyíné, aweyi! Sía wíyi seyíné majiá seaóriniárini. Ríwéná Gorixoyá xwioxíyo mipáwí agwíná epíríá nání diñí sipí seaíwinigini. Anígwi yayí ero rípiá riro yarigiáyíné, aweyi! Sía wíyi seyíné majiá seaóriniárini. Ríwéná Gorixo ámáyo pírániñí umeñweané mipáwipa neríná diñí sipí niseairi ñwí epíríá eñagi nání diñí sipí seaíwinigini. ²⁶Seyíné ámá níni seáyimi seameararigiáyíné, aweyi! Sía wíyi seyíné majiá seaóriniárini. Eñíná segí seáwowa mimóní wíá rókiamoagiáwami seáyimi umearagiápa agwi seyíné eni seáyimi seameararíná diñí re niyaiwiro, ‘Nene eni ámá Gorixoyá mimónipa eñagwi nání oyá xwioxíyo páwianíwámani.’ niyaiwiro diñí sipí seaíwinigini.

“Símí tñi seaiarigiáyí nání wá oseunini.” uríñí nánirini.

²⁷“E níriri aiwi seyíné aríá niarigiáyíné re érixini. Ámá seyíné wikí seaónigiáyo nání seaimóniri ámá símí tñi seaiarigiáyo nañí wimixiro ²⁸ámá ikayíwí tñi niramixiri seararigiáyo Gorixo pírániñí owimixiniri ero ámá xwiraimimí seararigiáyí nañí oimónipoyiniri Gorixomi yariñí wiwo érixini. ²⁹Ámá wo maripiñwíyo midáni reááná ámi midáni eni anani xe reáwinigini. Ámá wo dixí iyíá nírírípírínáyí, xe onírápiniri dixí soríá eni ‘Xe onírápiní.’ yaiwírixini. ³⁰Ámá giyí giyí yariñí síánáyí, anani míni wiri giyí giyí rírápíáyo ímí tñi ‘Ámi niapípoyí.’ muripa eri érixini. ³¹Ámá e onípoyí.’ yaiwiaríñípa joxi eni e wírixini. ³²Joxi re niyaiwirínáyí, ‘Ámá nioni nání wimónariñíyí nánini nimónarini.’ niyaiwirínáyí, ámá giyí seáyimi rimepíríárini? Oweoi! Ámá íwí néra warigiáyí aí ámá wiwaniñíyí nání wimónariñíyí nání wimónariñirini. Ayináni seyíné nání wimónariñíyí nánini niseaimónirínáyí, weyí ámá wí seamearipíríámani. ³³Seyíné ámá nañí seaimixarigiáyoní nañí niwimixirínáyí, weyíyí ámá giyí seamearipíríárini? Oweoi! Íwí néra warigiáyí aí ámá nañí wiarigiáyo xixeni nañí wiarigiárini. Ayináni ámá seyíné nañí seaimixarigiáyoní nañí niwimixirínáyí, weyíyí ámá wí seamearipíríámani. ³⁴Seyíné woxi ‘O idáná ámi xixeni niapipaxírini.’ yaiwiaríñíyoní míni niwirínáyí, weyíyí ámá giyí seamearipíríárini? Oweoi! Ámá íwí yarigiáyí aí wigí wíami ‘Idáná ámi xixeni neiapipaxírini.’ yaiwiarigiáyo míni wiarigiárini. Ayináni woxi ‘O idáná ámi xixeni niapipaxírini.’ yaiwiaríñíyo míni niwirínáyí, weyíyí ámá seamearipíríámani. ³⁵Ámá seyíné símí tñi seaiarigiáyí nání seaimóniri nañí wimixiro amípí wí míni niwiríná ‘Xíoyá eni oniapini.’ miyaiwipa érixini. E nerónáyí, niaíwí Ñwíá seáyí émi ñweañoyá nimóniro oyá nañí

wí meapíríárini. Seyíné xíoyá niaíwí enjagi náni áamá xíomi yayí miwííáyo tñi sipíni yariǵíáyo tñi wá wianariǵipa érixini. ³⁶Segí ápo áamáyo ayá nurimixiri yariǵipa seyíné ayá nurimixiro érixini.

Ewayí ikaxí siyikwí náni uriǵi nánirini.

³⁷“Joxi áamá wo yariǵagi siǵwí niwiniríná ‘O sipí yarini.’ miripani. E nerínáyí, joxi náni Gorixo ‘O sipí yarini.’ riníámáni. Joxi áamáyo xwiýíá mumeariǵipani. E nerínáyí, Gorixo xwiýíá rimeariníámáni. Joxi áamá wí íwí sííápi yokwarimí niwiirínáyí, Gorixo anani joxiyáyo yokwarimí siiníárini. ³⁸Joxi áamáyo mini niwiríná sipí miwipa neri yariǵipa Gorixo mini siapiníárini. Áamáyo mini niwiríná ‘Xwé owimini.’ yaiwiro aiwá sixí ímímí neróná sixí úro ro wé tñi kisikisí ero nemáná rixa niyurínawíáná mini niwiróná xegí iyíáyo wiároarigíápa Gorixo eni xixeni e mini siapiníárini. Amipí xixeni joxi wiarǵipa Gorixo xixeni e siapiníárini.” uriǵiniginí.

³⁹Jisaso xegí wiepisariǵíyí nioni urariǵá jíayí aría nikeamoro áamá siǵwí supáriǵi imónipírixiniri ewayí xwiýíá ripi uriǵiniginí, “Seyíné ‘Siǵwí supáriǵi wo wíomi anani nipemeámi óíyo uniǵoi.’ riyaiwiarǵoi? Awaú niwaúni xwáriǵwíyo eaínipísíi.” nuriri ⁴⁰xíoyá wiepisariǵí seáyi e nimóniro wigí diǵíyo dáni anani epírixiniri re uriǵiniginí, “Niaíwowa uréwapiyariǵomi seáyi e múrónarigíámáni. Xámi nuréwapiya numáná enjáná uréwapiyariǵo tñi xixeni imónarigíárini.” nuriri ⁴¹xíoyá wiepisariǵíyí íwí ayí yariǵíáyi píni miwiáripa nero áamá wí yariǵíáyi nánini “Píni wiáripoyi.” uripírixiniri ewayí xwiýíá ámi bi ripi uriǵiniginí, “Segí siǵwíyo íkíá xwé wániǵi ǵweaǵagi aí siǵwí mainenipa nero dixí imónigíáyi womi siǵwí siyikwí onimiá bi ǵweaǵáná pí náni siǵwí winimeaarigíárini? ⁴²Íkíá xwé awá segí siǵwíyo ǵweaǵagi siǵwí mainenipa neríná arige neri dixí imónigíá omi ‘Siǵwí siyikwí onimiá ǵweaǵipi orimeámáni.’ uriríárini? Naǵi riri sipí riri yariǵoxini, íkíá xwé joxiyá siǵwíyo ǵweaǵíwá emi nimamónimáná siǵwí pírániǵi nanimáná dixí ririxímeáoyá siǵwíyo onimiá ǵweaǵipi anani mearíárini.” uriǵiniginí.

Ewayí ikaxí íkíá sogwí náni uriǵi nánirini.

⁴³Xegí wiepisariǵíyí pírániǵi nero oǵweápoyniri ewayí xwiýíá ámi bi ripi uriǵiniginí, “Íkíá siyíwí riǵína sogwí naǵi wearǵimáni. Íkíá onagwá enína sogwí sipí wearǵimáni. ⁴⁴Áamá íkíá sogwí weǵagi niwinirínáyí diǵi ‘Íkíá yoí ayo riniǵi iyí riweni?’ yaiwiarigíárini. Íkíá pikí sogwí nidirínáyí enwixíyo darigíárani? Wainí sogwí nidirínáyí ará ekirikwíyo darigíárani? Oweoi! ⁴⁵Áamá naǵíyí wigí xwioxíyo dáni diǵi naǵi moro pírániǵi néra uro yariǵíárini. Áamá sipíyí wigí xwioxíyo dáni diǵi sipí moro íwí néra uro yariǵíárini. Áamá xwiýíá nirirínáyí xwioxíyo dáni sipí

nánini diŋí nimoríná sipíni rarigíárini. Naŋí nánini nimoríná naŋíni rarigíárini.” urinjinigini.

Ewayí ikaxí síŋá aŋí mirarigíwau nání urinŋí nánirini.

⁴⁶Ewayí xwiyá ámi bi ripi urinjinigini, “Pí nání ‘Ámináoxxini, Ámináoxxini,’ niniriro aiwi nioni searariŋápi mepa yariŋoi? ⁴⁷Ámá giyí giyí nioni tíámíni nibiro nioni searíápi aríá niniro xixeni axípi yariŋíáyí ‘Ámá óniŋí rimónini?’ oyaiwípoyniri ewayí xwiyá bi niriri siwáníŋí oseaimini. ⁴⁸Ámá o síŋá aŋí nimiriríná xámi síŋá nita yapíríe xwíá sewiáríóniŋí xapixapí nimiri eŋí tñi ínimi nimiga niwémáná síŋá yapiniŋagi niwiniriŋe dání síŋá piará níkikíróa niyapíri aŋí mirariŋóniŋí imóniŋoi. Iníá xwé neáísáná iniigí waxí niwerfíná aŋiwámi nimiákwiri pineáminiri éiyí o pírániŋí miriŋí eŋagi nání wiŋwí wí mimeanjinigini. ⁴⁹E neri aiwi ámá giyí giyí nioni searíápi aríá niniro aí xixeni axípi mepa yariŋíáyí ámá róniŋí imóniŋoi. O aŋí nimiriríná síŋá piará yapiniŋe dání síŋá níkikíróa yapini nání xwíá bi mimí úrapí xwíáyoni seáyi e nita nipuri miráríyí iniigí waxí niweapíri miákwíáná aŋíni iniigíyo nipineamioari anipá imónáriŋjinigini.” nuriri “Nene eni Jisaso nearíípi niwíáíkiríná aŋiwá yapí Gorixo anipá neaimixíníáríani?” oyaiwípoyniri nání ewayí xwiyá api urinjinigini.

Porisí woyá omiŋí wiariŋomi naŋí imixiŋí nánirini.

7 ¹Jisaso, oxí apixí aríá wiaríná xwiyá api nipini nurárimáná aŋí wíyo xegí yoí Kapaneamiyo nání nuri ŋweaŋáná ²wauyí porisí áminá imóniŋí woyá ámá xináŋiŋí nimóniri omiŋí wiariŋo —O porisí áminá imóniŋo diŋí sixí wiŋorini. O simixí neri rixa nipéminiri yaríná ³“Jisaso nibiri aŋí apimi ŋweani.” rinariŋagía aríá e niwiri Judayí áminá wa Jisasomi owirimeápoyniri re uowáriŋjinigini, “Soyíné nuro gí inókíniŋí omiŋí niariŋí ro nání yariŋí re niwíípoi, ‘Joxi anani nibiri oyá xináŋiŋí nimóniri omiŋí wiariŋo rixa nipepaxí yariŋagi nání pírániŋí wimixiréini?’ yariŋí e niwíípoi.” uowáráná ⁴awa nuro Jisasomi niwímearo wauní rixiŋí re urigíawixini, “O émayí wo eŋagi aiwi pírániŋí neaiariŋo eŋagi nání joxi nibiri oyá xináŋiŋí omiŋí wiariŋomi pírániŋí wimixiyii. ⁵O Judayene diŋí nineaŋwiríriri negí rotú aŋí jíayí mīrani nání neaiariŋorini.” uríagía ⁶Jisaso awa tñi nuro porisí áminá imóniŋoyá aŋí tñí e aŋwi e rémóáná porisí áminá imóniŋo xegí ámá níkumixiniri emearigíá wami re uowáriŋjinigini, “Jisasomi niwímeari Porisí áminá imóniŋo re nearowáriŋoi urípoi, ‘Ámináoxxini, nioni sini upupígí siaríná naŋímani. Nioni ámá naŋoni siŋagwini. Joxi nioniyá aŋíyo wí íwapiŋaxímani. ⁷Xámi niwaniŋoni “Ámá naŋoni menini.” niyaiwiniri nání joxi sirimeáminiri mibíárini. Ayináni dixí roŋe dání píné ráná gí omiŋí niariŋo ámi naŋí imóniniŋoi. ⁸Nioni ámá “Omiŋí ayí ayí

ei.” nirarigíowami ínimi wuríniḡini. Nioni eni porisí wa ínimi nuríniḡoi. Gí porisí womi “Joxi aḡí ui.” uráná sa wariḡirini. Womi “Bei.” uráná sa xixeni bariḡirini. Gí inókiniḡi omiḡi niiariḡi womi “E ei.” uráná xixeni yariḡirini.’ Jisasomi e urípoyi.” urowáráná ⁹awa nuro Jisaso tíni ói e órófí niniro e uráná Jisaso ududí niwiri nikinimóniri oxí apixí epíroyí nero númi uxídigiáyo re uriḡinigiḡi, “Wauyí porisí áminá imóniḡo diḡi ninikwírori yariḡipa nigí Isireriyíné aí woxi nioni diḡi xixeni minikwíroariḡini.” uráná ¹⁰xwiyiá urowárénapíáwa ámi wigí aḡí e náni nuro xegí omiḡi wiariḡo rixa ámi nanḡi riwo ḡweanḡi winiḡiawixini.

Íwí sikiḡi piyi womi “Wiápínimeai.” uriḡi nánirini.

¹¹Jisaso wauyí porisoyá omiḡi wiariḡomi pírániḡi nimixiri rixa síá wí óráná o aḡí bimi yoi Neniyi riniḡiyo náni nuri xegí wiepisariḡowa eni o tíni nuro áamá oxí apixí obaxí nawíni nuro ¹²aḡí apimi ákiḡá íwí e rémoaniro yaríná Jisaso weniḡi éyí winiḡinigiḡi. Áamá piyi wo —O sini íwí sikiḡorini. Xexírímeáo wo mayorini. Xinái apixí anírini. Omi xinái tíni oxí apixí e dáḡi obaxí tíni xwíá weyaniro aḡí apimi dáni nimeámi íwiapariḡagía Jisaso siḡwí e niwiniri ¹³piyomi xinámi wá niwianiri re uriḡinigiḡi, “ḡwí eaariḡiyí píni wiárei.” nuriri ¹⁴aḡwi e nibiri íkwiaḡwí piyo weḡnami íá nixiriri áamá nimeámi warigíáyi sa e rówapiḡáná o piyomi re uriḡinigiḡi, “Íwí sikiḡi roxini, rixa wiápínimeai.’ rirariḡini.” uráná re enḡinigiḡi. ¹⁵Piyo niwiápínimeari éf niḡweari iwamíó píne raríná Jisaso ámi xinái tíḡi e uwáriaríná ¹⁶ámá níni wáyí níkáriḡi Goriḡomi seáyi e numeróná re rigíawixini, “Goriḡoyá wíá rókiamoariḡi seáyi e imóniḡi wo riwo rineauowárénapiyiḡoi? Goriḡo Isirerene náni diḡi nimori arirá neaininía náni riwo rineauowárénapiyiḡoi?” niriro e yaríná ¹⁷Jisaso e épi náni xwiyiá Judayí aḡí niyoni yaní niwéa nuri midimidáni eni rinimeḡinigiḡi.

Jono xegí wiepisariḡowa waúmi Jisaso tíḡi e náni urowáriḡi nánirini.

¹⁸Jono xegí wiepisariḡowa Jisaso éi api nipini náni áwanḡi uráná ¹⁹o xegí wiepisariḡi waúmi “Eini.” nuriri Áminá Jisaso tíḡi e náni re urowáriḡinigiḡi, “Nuri yariḡi re wípiyi, ‘Joxi náni Jono “Níbiníárinini.” nearariḡoxirani? Wo ámi ríwíyo bínió náni sini xwayí naniri ḡweaníwáranani?’ Nuri yariḡi e wípiyi.” urowáriḡi ²⁰awaú nuri Jisasomi re urémeaḡisixini, “Jono wayí nineameaia wariḡo joxi tíe náni re yearowáriḡoi, ‘Omi yariḡi re wípiyi, “Joxi Jono ‘Ríwíyo nibiníárinini.’ nearariḡoxirani? Wo ríwíyo bínió náni sini xwayí naniri ḡweaníwáranani?’ yariḡi e wípiyi.’ yearowáriḡoi.” uráná ²¹axíná Jisaso áamá simixí xixegíni yariḡiáyo nanḡi imixiri siḡwí supárigíá obaxíyo siḡwí anipíri náni wiri imíó ámayo xixéroariḡiyo mixí umáiniri neri ²²awaúmi re uriḡinigiḡi, “Awagwí nuri amipí níni nioni re yaríná siḡwí naniri aría niri éyí náni

Jonomi áwaní urípiyi, ‘Siŋwí supárigíáyí ámi siŋwí aniro sikwí ikí egiáyí ámi aŋí ero peyiáyí tígíáyí wigí wará naŋí iniro aríá píronígíáyí ámi aríá ero áamá péfiáyí ámi wiápínimearo áamá sipíyo xwiyíá yayí winipaxípi aríá wiro yariŋoi.’ urípiyi.” nuriri ²³re uriŋinígini, “Ripi eni urípiyi, ‘Yeáyí neayimixemeanía náni aríowayá xwíá piaxíyo dání iwiaronío e eníáriní. E eníáriní.’ yaiwiarígíápi tíni xixeni mepa yariŋagi siŋwí ninaniri aiwi nóreámioari diŋí minikwíropa neri ‘Ayí omani.’ miyaiwipani. Áamá e yarígíá giyí giyí Gorixoyá diŋí tíni yayí winipaxíyírini. Jonomi e urípiyi.’ uriŋinígini.

Jisaso Jono náni uriŋí nánirini.

²⁴Jisaso, Jonoyá wiepisariŋowau rixa úaná, o áamá e epíroyí egiáyo Jono náni re uriŋinígini, “Xámi seyíné Jonomi siŋwí winaniro náni áamá diŋí meañe náni nuróná pí áamá siŋwí winarígíawixini? Áamá eŋí meániŋí imiŋí yaríná wakwiŋwí wiŋwí nimearíniŋí imóniŋí womi siŋwí winaniro riwarígíawixini? Oweoi! ²⁵Aga pí áamá siŋwí winaniro warígíawixini? Áamá rapirapí yarapayí eŋí wú yíniŋí womi winaniro áamá diŋí meañe náni riwarígíawixini? Oweoi! Áamá rapirapí yarapayí naŋíni niyíniro ŋweagíáyí mixí ináyíyá aŋíyo ŋweaarígíáriní. Áamá diŋí meañe ŋweaarígíámani. ²⁶Aga pí áamá siŋwí winaniro warígíawixini? Gorixoyá wíá rókiamoariŋí womi siŋwí winaniro riwarígíawixini? Oyi, wíá rókiamoariŋí womi siŋwí winaniro ugíá aiwi Jono áamá yeáyí seayimixemeanía náni xwíá piaxíyo dání iwiaronío náni wáí urimeminiri náni uowárénaŋiŋí eŋagi náni o Gorixoyá wíá rókiamoarígíá niyoni xixeni imóniŋomani. Seáyí e múroŋorini. ²⁷Jono náni Bikwí Gorixoyáyo ríwamiŋí re niriniri eánini, ‘Gorixo xegí xewaxomi re uriŋinígini, “Nioni gí xwiyíá yaŋí wiowárimíáo joxi xámi nirimeari áamá nisaniri epíri náni óniŋí nisimoia unía náni uowárimíáriní.” uriŋinígini.’ Ríwamiŋí e niriniri eánini.” nuriri ²⁸re uriŋinígini, “Nioni searariŋini. Jono áamá yeáyí seayimixemeanía náni aríowayá xwíá piaxíyo dání iwiaronío náni óniŋí imoŋo eŋagi náni áamá níni aiwi wo Jonomi seáyí e imónini náni xirígíámani. E neri aiwi áamá giyí giyí nioni nixídiro Gorixoyá xwioxíyo páwiro yarígíáyí xwiyíá nioni náni wáí nurimeipírípi xwiyíá Jono wáí rimenjípimi seáyí e imóniŋagi náni áamá ayí onípi aiwi Jonomi eni seáyí e imóniŋoi.” uriŋinígini. ²⁹Áamá níni tíni takisí náni niŋwí nearáparígíáyí tíni Jono wáí urimeariŋagi aríá niwiro nisaniro Jono wayí umeaiaríná ripi urigíániŋí imónini, “Gorixoxi wé róniŋoxi óí nene uyíniŋi yariŋwaéne náni imóŋipi xixeni neamoíŋrini.” urigíániŋí imónini. ³⁰E neri aiwi Parisiowa tíni ŋwí ikaxí eániŋípi mewegíáwa tíni Jono wayí oneameainiri siŋwí miwinipa neróná amípí Gorixo ‘Awa oépoi.’ yaiwíŋpimi ríwí umogíawixini. ³¹Jisaso ámi re uriŋinígini, “Ewayí xwiyíá pípi niriri áamá agwi ríná ŋweagíáyíné áamá wo wo Gorixo seyíné náni

uowárariŋagi aiwi seyíne miseaimónariŋíyíne náni ‘Ayíniŋí imónini.’ rimíni? Seyíne píniŋí imóniŋoi?” nuriri ³²re uriŋinigini, “Seyíne niaíwí ripiániŋí imóniŋoi. Niaíwí bia makería tíŋí e níá neróná niaíwí bíbiami ráiwa re urariŋoi, ‘Nepiane webí rariŋagwi aí sepiayíne siminiŋí miyariŋoi. Nepiane ŋwapé rariŋagwi aí sepiayíne ámixía bi miyariŋoi.’ rinariŋípiániŋí imóniŋoi. ³³Seyíne re egípi náni ewayí xwiyía api searariŋini. Seyíne Jono wayí nineameala wariŋo nibiríná aiwá nanj minipa eri iniigí wainí minipa eri yariŋagi siŋwí niwiniro náni ‘Ámá royí imíó xixéroariŋoriani?’ rariŋíárini. ³⁴Seyíne ámá imóniŋáoni eni nibiríná aiwá niri iniigí niri yariŋagi ninaniro náni re rariŋíárini, ‘O aiwá eŋí neri nariŋorini. Iniigí wainí eni nariŋorini. Ámá takisí náni nigwí nearáparigiáwa tni ámá íwí yariŋíá wíniyí tni nikumixiniri emeariŋorini.’ rariŋíárini. ³⁵E neri aiwi oxí apixí wíni wíni diŋí pírániŋí neŋwipero Jono tni nioni tni náni ‘Awaú nanj yariŋii.’ yaiwiarigiŋíárini.” uriŋinigini.

íwí inariŋí wími yokwarimí wiŋí nánirini.

³⁶Ámá Parisi wo Jisasomi yariŋí re wiŋinigini, “Joxi anani nioni tni gí aŋíyo aiwá naniréwii?” uríagi Jisaso oyá aŋíyo nipáwiri aiwá naniri náni wigí yariŋíápa xwápiyi níkirómáná nawíni aiwá naríná re eŋinigini. ³⁷Apixí íwí inariŋí wí, aŋí apimi ŋweaŋí “Jisaso Parisioyá aŋíyo niŋweari aiwá narini.” rinariŋagi aría e niwiri síŋá tni sixí imixiniŋí wá iniigí diŋí nanj eaariŋí bi íniŋíwá nimeámi aŋí iwámi nipáwiri ³⁸Jisaso sikwí tíŋí e ríwí riwámimi éí nírómáná ŋwí nearíná xegí siŋwirixí Jisasoyá sikwí sosíayo niyori í xegí díá sepiá tni kwikwírimi neri sikwíyo kíyí nimiaúniri iniigí diŋí nanj eaariŋípi niwayimómáná gínií niwiri e yaríná ³⁹Parisio, Jisasomi imání ikaxí uríó apixí í e wariŋagi niwiniro ínimi re riniŋinigini, “Ámá ro nepa Gorixoyá wía rókiamoariŋo eŋánáyí, apixí íá wiapiyimixariŋí náni xixeni níjía re imónipaxorini, ‘Í apixí íwí inariŋí wírini.’ yaiwipaxorini.” Parisio ínimi dáni e yaiwinaríná ⁴⁰Jisaso o xwioxíyo dáni e yaiwariŋagi adadí niwiri re uriŋinigini, “Saimone, xwiyía bí oririmini.” uríagi o re uriŋinigini, “Nearéwapiyariŋoxini, anani nirei.” uríagi ⁴¹Jisaso ewayí xwiyía ripi uriŋinigini, “Ámá womi ámá waú nibiri nigwí urápigíisixini. Wíó K500.00 urápiri wíó K50.00 urápiri neri niŋweagíisáná ⁴²awaú ámi xíomi miwipa eŋáná o niwaúmini ayá nurimixiri nigwí míni wiŋípi náni diŋí peá nimori kikiá eŋinigini. Ayináni awaú go go nigwí míni wiŋo náni xwapí wimóniniŋoi?” uríagi ⁴³Saimono re uriŋinigini, “‘Nigwí K500.00 urápiŋo, o xwapí wimóniniŋoi.’ nimónarini.” uríagi Jisaso re uriŋinigini, “Joxi diŋí xixeni neŋwiperi rariŋini.” nuriri ⁴⁴apixí tíámimi nikinimónimáná Saimonomi re uriŋinigini, “Apixí rí nioni niariŋí rí siŋwí wínei. Nioni díxí aŋíyo íwipánáyí joxi negí yariŋwápa miníi iniigí bí sikwí sosíá igíá eánimiri

náni miniapíini. E neri aiwi apixí ríyí gí sikwí sosíáyo siŋwirixí t́ni igíá nineari xegí díá sepiá eŋí t́ni níkwírinoi. ⁴⁵Joxi áamá xwiyíá b́aná negí yariŋwápi kíyí minimiaúniini. E neri aí í nioni níwapiiri ŋweááiná d́áni sikwí sosíáyo kíyí ninimiaúga warini. ⁴⁶Joxi negí yariŋwápa yayí minipa neri raní bi miŋŋyo miniwayimóini. E neri aiwi apixí ríyí sikwí sosíáyo iniigí diŋí naŋí eaariŋí bi niniwayimómáná ǵinií niŋoi. ⁴⁷Ayináni nioni re rariŋini. Í íwí xwapí yagíí aiwi nioni rixa yokwarimí wiíá eŋagi náni í nioni náni xwapí níwimóniri náni naŋí e niarini. Ámá íwí xwapí mé bi onimiápi yariŋíyí nioni yokwarimí wiíáná ayí nioni náni eni onimiápi wimónariŋíri.” Saimonomi e nuriri ⁴⁸apixími re uriŋinigini, “Nioni dixí íwí yariŋíyí rixa yokwarimí síárini.” uráná ⁴⁹ámá xío t́ni nawíni niŋwearo aiwá narigiáyí re rinigíawixini, “Ámá royí ‘íwí yariŋíyí yokwarimí wiipaxonirini.’ níyaiwiri ría rarini?” niriniro e yaríná ⁵⁰Jisaso apixími re uriŋinigini, “Jíxi diŋí níkwíroariŋagi náni Gorixo yeáyí riyimixemeáirini. Rixa kikiíá néra ui.” uriŋinigini.

Apixí Jisasomi míraŋí wigííwa nánirini.

8 ¹Jisaso Saimono t́ni aiwá niniri niŋweanísáná rixa síá wí óráná o aŋí wíyí wíyo xwiyíá yayí winipaxí Gorixo xwioxíyo mimeámí neri pírániŋí umeŋweanía náni wáí nurimeri re urimeŋinigini, “Seyíné íwí yariŋíyí ríwímini nimamoro nisaníro ŋweáárixini.” urimearíná xío xegí wiepisariŋí wé wúkaú sikwí waú o t́ni nawíni nemero ²apixí wíwa eni o t́ni nawíni nemero —Wíwa simixí t́gííwami Jisaso naŋí imixiri wíwa imíó diŋí xixéroariŋí t́gííwami mixí umáiniri wiariníwa wigí yoí ríwarini. Wí Mariaíri. Aŋí yoí Magidara d́aŋí eŋagi náni ími yoí Magidara d́aŋí Mariaíyí wíriniŋíri. Í Jisaso imíó wé wíwumi d́aŋí waú diŋí xixéroariŋí mixí umáinowáriŋíri. ³Apixí ámi wí Xusao —O mixí ináyí Xerotoyá bosiwí worini. Omi xiepí í xegí yoí Joanaíri. Ámi wí Sasanaíri. Íwa t́ni ámi wíwa eni wigí nigwí t́ni aiwá bí imimí ero Jisasomi t́ni xegí wiepisariŋowami t́ni míraŋí níwiyiro númi wagiári.

Ewayí ikaxí witi siyí wiároní nánirini.

⁴Oxí apixí obaxí aŋí ayí ayo d́áni Jisaso t́ŋí e náni níbimiro awí eánaríná o ewayí xwiyíá ripi uriŋinigini, ⁵“Ámá wo o xegí omiŋíyo witi siyí níwiáróa uminiri náni nuri rixa xwíá yuní ikixeariniŋe pírániŋí níwiárori aí wí óíyo piéróyí áamá wí óíyo nípuríná xwiriníwí osaxiro iní níbiri mimání eri eŋinigini. ⁶Ámi wí síŋá ínimi yapiniŋáná xwíá seáyí e onimiápi eŋíyo piéróyí apaxí mé nerápiri níyapiri aiwi iniigí mirúniŋagi náni apaxí mé yiweáriŋinigini. ⁷Ámi wí emí pipiŋí aríkiárininiŋe wiároníyí emí pipiŋíyo d́áni nawíni nerápimáná emí xejwiráriŋagi náni witi ayí urí eŋinigini. ⁸Ámi wí xwíá naŋíyo wiároníyí nerápiri níyapiri

ná niweríná aga diñi nimori íá miropaxí wejinigini.” Ewayí xwiyá e nuriríná re urayiniginini, “Aría tígiáyiné ewayí xwiyá rariñá ripi náni aría ókiarí nimónipoyi.” urayiniginini.

“Ripi náni ewayí xwiyá searariñini.” uriñi nánirini.

⁹Xegí wiepisariñowa ewayí xwiyá api míkípi náni yariñi wíaná ¹⁰o re uriñiniginini, “Xwiyá eníná dáni ‘Gorixo xwioxíyo mimeámí neri seamejweanárini.’ niriri ínimi imóniñipi nioni wía searókiamoariñini. E neri aiwi áamá nioni diñi minikwíro wigí diñi tíni néra warigiáyí nioni ewayí xwiyá nuréwapiyiríná wía rókiamoagí Aisaiayo riniño niriri ríwamiñi eañipa siñwí naniro aría niro nero aiwi míkípi náni niñiá imónipírixiniri ewayí xwiyáni uréwapiyariñini.

Witi siyí wiáronji míkípi náni áwanji uriñi nánirini.

¹¹“Ewayí xwiyá míkípi ripirini. Witi siyí náni riniñipi ayí xwiyá Gorixoyániñi imónini. ¹²Ámá wí siyí ói mañipámi piéroríyiniñi imónini. Ayí xwiyá Gorixoyá aría niwiro aiwi axíná obo nibiri ayí xwiyá oyápi diñi móaná o yeáyí uyimixemeaniginiri mirirakí niwiri xwiyá oyá wigí xwioxíyo dáni emi mimeámí yárarariñirini. ¹³Ámá wí witi siyí síñá ínimi yapiñiñá seáyí e xwía onimiápi enáná wiáronjiyiniñi imónini. Ayí xwiyá Gorixoyá aría niwiróná yayí niwiniri xídaniro yariná xwiyá ná ínimi pipiñiniñi miwáriñagi náni aniñi xídarigiámáni. Xwiyá oyápi xídaniro yariñagi náni áamá wí nibiro nepa eni neániro ría xídarinoiniñi iwamíó wíwapiyáná píni wiárarigiárini. ¹⁴Ámá wí witi siyí emí pipiñi arikiárinije wiáronjiyiniñi imónini. Ayí eni xwiyá Gorixoyá aría niwiro aiwi wigí yariñiápa sini nixídiróná amipí xwíáyo dání náni diñi obibaxí moro ‘Amipí wí nioni minimúropa onini.’ yaiwiro amipí wí náni niwimóniro ‘Arige meámíaríani?’ yaiwiro néra nurínáyí witi emí nerápiri xewiráriñi yapi nimóniro aiwá ná niyíniri aiwi wí yóí yariñimani. ¹⁵Ámá wí siyí xwía nañi imónije wiáronjiyiniñi imónini. Ayí xwiyá Gorixoyá náni aría niwiro diñi sipí wí mimaxiriñagi náni miwáramó aniñi diñi nikwíro xaiwí íá nixiro neríná aiwá ná weariniñipiñi imónarigiárini.” Wiepisariñowami ewayí xwiyá míkípi náni áwanji e uriñiniginini.

Ewayí ikaxí uyíwí náni uriñi nánirini.

¹⁶Awa “Jisaso áamá ayo aniñi yumí winíarini.” yaiwipírixiniri ámi ewayí xwiyá ripi uriñiniginini, “Ámá wo re yariñimani. Xegí ramixí nimixárori sixí xwé wá nimeari upikákwiárariniñimani. Nimixárori xegí sá íkwiañwíyo ínimi éxwiroárariniñimani. Nimixárománá áamá giyí giyí níwapiiríná anani siñwí winipíri náni aiwá íkwiañwíyo seáyí e tariñirini.” nuriri ¹⁷re uriñiniginini, “Amipí níni ínimi imóniñi aiwi

wiá ókíáná níni síjání imónáná áamá níni “Tí ayíríani?” yaiwipírírini. ¹⁸ Ayínani seyíne píné aríá ninirónáyí aríá pírániñí niríni. Áamá giyí giyí nioni xwiyíá raríná aríá niro ðiñí níkwíroero nero níjía bí nimónirínáyí Gorixo ámi wí miní winiñoi. Giyí giyí aríá minipa ero ðiñí miníkwíropa ero nerínáyí ‘Níjía ripi imóniñini.’ yaiwinarigíápi aí Gorixo api aí ámi nurápiñiñoi.” uriñinigini.

Jisasomi xinái t́ni xogwáowa t́ni nánirini.

¹⁹ Jisasomi xinái t́ni xogwáowa t́ni o t́ñí e nání nibiro áamá xwé obaxí omi epíroyí wiáriñagía epówa mipáwipaxí enjagi ²⁰ áamá wí áwaní re urigíawixini, “Dixí rinái t́ni rigwáowa t́ni síjwí rananero nání bíami bíraiyyí roñoi.” uríagía aí ²¹ o re uriñinigini, “Áamá re ñwixapigíá tiyyí, xwiyíá Gorixoyá aríá wiro xixeni ero yarigíáyí, ayí gí inókíwáníñí nirixímeáowáníñí imóniñoi.” uriñinigini.

Ipí imeamíkwí yariñagi samiñí imixiñí nánirini.

²² Íná síá wiyimi Jisaso t́ni xegí wiepisariñowa t́ni ewéyo nipixemoániro o re uriñinigini, “Ipíyo jíariwámíni dání oxemoaneyí.” nuriri nimeámí nuro ²³ ipíyo nimeámí waríná Jisaso rixa sá winfagi sá weñáná re eñinigini. Ríwipí xwé wí níweapiri ipíyo níxemi nuri ewéyo iniigí mímeámí yaríná awa rixa iniigí namipaxí yariñagi nainenimi ²⁴ nuro saiwíarí níwimáná re urigíawixini, “Neamemeariñoxi, neamemeariñoxi, rixa iniigí namiani añwi ayorini.” uráná Jisaso níwiápnimeari imiñí yariñípimi t́ni iniigí reakíkwí yapariñípimi t́ni mixí nuriri “Píni wiárei.” uráná re eñinigini. Píni níwiáriríná imiñí mé neri iniigí samiñí weáriri eñinigini. ²⁵ Rixa imiñí mé neri iniigí samiñí weáriri éaná o wiepisariñowami re uriñinigini, “Soyíne ðiñí miníkwíropa pí nání yariñoi?” uríagi awa wáyí ero ududí ero nero re rinigíawixini, “Áamá royí imiñí t́ni iniigí t́ni sekaxí uráná ámáníñí aríá wí royí goríani?” rinigíawixini.

Imió mixí umáináná odipí iniigí namiñí nánirini.

²⁶ Awa ewépa nimeáa nuro ipí Gaririyo jíariwámíni añí bí xegí yoí Gegesayi riniñipi t́ñí e níwiékínimearo ²⁷ Jisaso nayoari rixa xwíáyo éfí roñáná áamá añí apimi dání wo —Omi imió wí xixéroariñoi. Eñíná dání iyaxí aikí miyíní néra uri añí wíyo miñweapa eri áamá xwáripá t́ñí eni ñweari yariñoi. ²⁸ O Jisasomi síjwí níwiniríná xwamiání niriri Jisasomi agwí riwámíni nípíkínimeari ímí t́ni re uriñinigini, “Jisasoxi, niafíwí Ijwíá seáyi émi ñweañoyáoxi, pí neaiminiri bariñini? Nioni wauní re rirariñini, ‘Xeaniñí wí míneaikáripáni.’ rirariñini.” nuriri ²⁹ Jisaso sekaxí “Imíoyíne áamá romi píni níwiárimí úpoyi.” urí enjagi nání Jisasomi e nuriri —O imió íníná ðiñí xixéroariñí enjagi nání xegí

ámá omi íá nixero gwí wirí tñi ainixí ikasá inijí wirí tñi nijiro awi meñweañagía aiwí gwí jíápi naríkiárimí imíó ámá diñí meañe nání sayá niméra wayariñorini. ³⁰Omi Jisaso yariñí re wiñinigini, “Segí yoí píxini?” uríagi imíowa xwé obaxí miróniñagía nání re urigíawixini, “Negí yoí Rijoniyi —Yoí mfkí ayí mixí nání xwé obaxí gwí mónarigíá nánirini. Yoí e riniñwini.” nuriro ³¹wauní rixiñí re urayigíawixini, “Joxi none mixí nineamáinowáririná siririkí yoparí bi mimóniñíyi tñí e Gorixo xeaniñí neaikáriníe nání mixí mineamáinowáripáni.” nuriro ³²odipí xwé obaxí díwíyo wiároáriníagía niwiniro wauní re urigíawixini, “Imíone odipíyo ríwímíni oxixérotoyiniri siñwí neaniriréini?” uríagía o xe oétoyiniri siñwí wináná ³³imíowa ámá omi píni niwiárimí nuro ámi odipíyo xixeróáná re enjinigini. Odipí ayí imegí añíni omííáyí sapipañímí siwá néra ipíyo nípáwiro piyí egíawixini. ³⁴Ámá odipí awí mearoarigíáyí wigí odipí e éagía niwiniro wigí añí apimí nání éi nuro ámá e ñweagíáyó áwaní uriro ámá omiñíyo yariñíyo áwaní urimero wíáná ³⁵ámá ayí “Pí ría enoi?” niyaiwiro siñwí winaniro nání nibiro Jisaso tñí e nirémoro weníñí éíáyí winigíawixini. Ámá imíó xixeroraiño riwo aikí yíniri diñí sixí yíniri nemáná Jisasoyá sikwí tñí e éi ñweañagi niwiniro wáyí nero yariná ³⁶ámá Jisaso imíó mixí umáinowáriagi siñwí winíáyí Jisaso imíó sayá meariñomi píraníñí wimixíí nání repiyí niwiróná ³⁷ámá ayí nání añí Gegesa dáníyí tñi ámá añí apimí midimidáni ñweagíáyí tñi wáyí xwé níkariniro nání Jisasomi wauní re urigíawixini, “‘Nene píni nineawiárimí ouni.’ neaimónarini.” uríagía o ámi ewéyo nípíxemoániri uminiri yariná ³⁸ámá imíó mixí umáinío wauní rixiñí “‘Nioni tñi owaiyi.’ nimónarini.” urariñagi aí Jisaso xegí añí e nání nurowárirí re uríinigini, ³⁹“Dixí añí e nání nuri Gorixo síípi nání dixí ámáyo repiyí niwiri ñweari ui.” uríagi o Jisasomi píni niwiárimí nuri añí apimí nípimíni Jisaso wiíípi nání repiyí wiemeñinigini.

**Apixí ragí aníñí pwaríñí wími nañí imixiri miái
peñí wími nañí imixiri eñí nánirini.**

⁴⁰Jisaso ámi ipíyo jíariwámíni iwiékínimeááná ámá obaxí e epíroyí ero o nání xwayí naniri ñwearo egíáyí omi yayí niwiro yariná re enjinigini. ⁴¹⁻⁴²Ámá áminá wigí rotú añí wiwá meñweañí wo —O xegí yoí Jairasorini. Miái ná wímíni xanorini. O nibíri Jisasoyá sikwí tñí e nípíkinimeari xío xegí miái —Í xwiogwí wé wúkaú sikwí wáu imóniñírini. Í rixa nípémíniñí yariñagi nání xano Jisasomi wauní rixiñí re uríinigini, “Gí miáími nañí imixiri nioni tñi gí añíyo nání niwaniréwii?” uríagi o “Ananirini.” nuriri awaú ói e waríná ámá e epíroyí egíáyí nuxídiro Jisasomi ikwikwierí waríná ⁴³apixí wí —Í xegí ragí aníñí pwaríná xwiogwí wé wúkaú sikwí wáu múroñírini. Ámá obaxí nañí imixaniro niyayiríñí aí nañí wí mimóniñírini. ⁴⁴Í “Jisasoyá iyíáyoni

amái nirónirínáyí, ámi nañí imónimíini.” niyaiwia nixídiri ríwími dáni oyá iyá síríwíyo amái rónáná re enjiginí. Ragí anijí pwaríñipi yeáyí sikiáríñiginí. ⁴⁵Yeáyí sikiáráná Jisaso re riñiginí, “Amái go nirónigo?” ríagi áamá níní “Oweoi, nionimani. Nionimani.” nira waríná xegí wiepisariñí wo Pitaoyi riniño re uriñiginí, “Neamemeariñoxini, áamá epíroyí nisiro ikwikwierí nisiga waríñoi.” uríagi aiwi ⁴⁶Jisaso re riñiginí, “Nepa áamá wo amái nirónigo. Nigí enjí eáñijí bi niniwárimí áamá womí nañí imixíagi naineniri nání rariñini.” ríagi ⁴⁷apixí í yumí mepaxí wimóníagi niwiniri óí néra aņwi e nibiri oyá símimariwámini nipíkínimeari oxí apixí níní siņwíyo dání wía re rókiamóniñiginí, “Níini gí ragí anijí pwaríñagi nání Jisasomí amái róníini. Omi amái niróniríná rixa nañí imóníini.” uríagi ⁴⁸o re uriñiginí, “Miaé, jíxi diñí ninikwírori nání nañí imóníini. Ámi ayá misinipa neri kikiá néra ui.” nuriri ⁴⁹sini ími e uraríná áamá wo rotú aņí meņweaņoyá aņí e dání nibiri omi re uriñiginí, “Uréwapiyariñomi sini ayá wí muriñweapani. Dixí miái rixa péiniñini.” uríagi ⁵⁰Jisaso aría e niwiri re uriñiginí, “Dixí miái péí aiwi wáyí mepani. Nioni diñí nikwíróánáyí, í ámi nañí imóniñiñoi.” nurimi nuri ⁵¹aņíyo nipáwiríná áamá wí nawíni opáwianeyiniri siņwí miwinipa neri sa xegí wiepisariñí Pitaot tñi Jono tñi Jemiso tñi miámi xiná tñi xano tñi ayí tñini nipáwiro ⁵²ámá níní ŋwí earo ámixíá mero yariñagía nání Jisaso re uriñiginí, “Ŋwí eaariñá píni wiárípoi. Niperi miwenini. Sa sá weni.” uráná ⁵³ayí “Í rixa piyíxini.” niyaiwiro nání ripíá uríagi ⁵⁴o íyá wépámi ía nimaxirimáná ími tñi “Miá rixini, wiápínimeai.” uráná re enjiginí. ⁵⁵Miái ámi diñí sixí wínáná apaxí mé wiápínimeañiginí. Rixa wiápínimeááná Jisaso xaniyaúmi “Aiwá bi umeápiyi.” uríagi ⁵⁶ayaú ududí ikáriníagi Jisaso ŋwí ikaxí re uriñiginí, “Aípagwí nioni éapi nání áamá wíyo áwaņí muripani.” uriñiginí.

Wiepisariñíyo enjí sixí weámixowáririri sekaxí uriri enjí nánirini.

9 ¹⁻²Jisaso xegí wiepisariñí wé wúkaú sikwí waú awami “Awí eáñipoyi.” nuriri awa simixí xixegíni nañí imixipíri nání ero imió níní mixí umáinowáripíri nání ero epíría nání kwíyí bi niwiri enjí sixí eáñijí bi niweámixowáririri re uowáriñiginí, “Soyíne aņí ayí ayo nemero Gorixo xwioxíyo mimeámí neri seameņweanía nání wái urimero simixí yariñíyo nañí imiximero érixini.” nuowáriríná ³re uriñiginí, “Ami ami wagwí wagwí nuro uríñipíri nání segí amipí bi nimeámi mupani. Erañirani, ía árupiañirani, aiwáraní, niğwíraní, iyá wúkaúrani, nimeámi mupani. ⁴Wái nemeríná aņí bimi nirémorínáyí aņí iwamíó nuro páwííyo wérixini. Rixa áamá aņí apimi ŋweagiáyo nuréwapiyimáná aņí axiwámini niñweagiásáná ‘Ámi aņí bimi nání owaiyi.’ niyaiwirínáyí aņí axiwámi dání píni niwíarimi úíisixini. ⁵Wái nurimerínáyí aņí bimi

nirémoríná áamá e ηweagiáyí ‘Negí aní tíyo íwiapípoyi.’ misearipa éánáyí, áamá ayí diñí ‘Newaniηene ikárininiηwáyí náni awaú nene náni ámi mibipa episi náni iyí riyáríi?’ yaiwipíri náni sikwíyo xwíá síkí xéniηípi píri wiafíkímí niyárimí úríxini.” Sekaxí e nuríísaná eñáná ⁶awa omi píni niwiárimí nuro aní bi bimí náni numiro xwíyíá naní yayí winipaxípi wá urimero simixí egíáyo naní imixiro néra ugíawixini.

Xeroto Jisaso náni ayá síwí uroñí nánirini.

⁷Gapimaní Xeroto Jisaso yá wiepisariηowa yariγíápi nipini náni aría niwiri ududí niwiniri ηweañáná áamá wí emimí api yariηagía náni re nira ugíawixini, “Jono xwáripáyo dáni rixa niwiápínimeari ría yarini?” nira waríná ⁸ámá ámi wí re nira ugíawixini, “Gorixoyá wía rókiamoagi Iraiηaoyi riniηo, mipé anñnami peyiηo rixa siñáni nimóniri ría yarini?” nira waríná áamá ámi wí re nira ugíawixini, “Eñíná Gorixoyá wía rókiamoagiá wo rixa niwiápínimeari ría yarini?” nira wariηagía náni ⁹Xeroto ududí niwiniri re riñinigini, “Niiwaniniηoni ráná Jonomi siñwí miñí wákwigíawixini. E neri aiwi áamá nioni aría e wiarinaγá royí goríani?” niriri Jisasomí siñwí owiniminiri yayiniηini.

Áamá 5,000 apimi aiwá mini wiñí nánirini.

¹⁰O xegí wáí wurimeiarigiáwa ámi xío tíñí e náni nibiro wigí néra ugíápi náni repiyí niwimáná eñáná o awa tñini nerimeániro áamá níni píni niwiárimí nuro wigípi aní wíyo xegí yoí Betisaidayo náni waríná ¹¹oxí apixí obaxí Jisaso tñi wiepisariηowa tñi aní apimi náni pwarinaγía niwiniro númi nuro omi wímeááná o yayí niwiri xwíyíá “Gorixo xwioxíyo mimeámí neri seameηweanía náni seyíné nisaniro éfrixini.” uréwapiyiri simixí egíáyo naní imimiximí eri yaríná ¹²wiepisariñí wé wúkaú síkwí waú sogwí nokepá imónáná Jisasomí nibiro re urigíawixini, “Áamá oní wówi re miñweañagía náni áamá epíroyí egíá tiyí aiwá niro sá wero epíri náni omiñí aní ámi ámi mirinimeñíyo náni uro aní api api ikwíróniηíyo náni uro oépoi.” uríagía aí ¹³⁻¹⁴o re uriñinigini, “Aiwá nipíri sewaniηoyíné mini wípoyi.” uríagi re urigíawixini, “Negí aiwá xwé menini. Bisíkeriá wé wú eñáná peyí waúnirini.” nuriro áamá oxí 5,000 e ηweañagía náni re urigíawixini, “None nurane aiwá bi mepa nerínáyí, arige mini wianíwini?” uríagía o re uriñinigini, “Áamá tíyo re urípoyi, ‘Seyíné áamá 50 50 maxirini wí e wí e niηweaxa úpoi.’ urípoyi.” uríagi ¹⁵awa axípi e uráná áamá níni 50 50 maxirini wí e wí e niηweaxa nuro ηweañáná ¹⁶Jisaso bisíkeriá wé wú tñi peyí awaú tñi anñnami weniñí niyániríná aiwá api náni Gorixomi yayí niwiri kwikwirimí neri xegí wiepisariηowa yaní niwiaupíri mini niwia waríná ¹⁷ámá níni niñiro agwí ími uyíáná aiwá niñiro e tíapia wiepisariηowa nimeamero soxí íá wé wúkaú síkwí waú apimi aumaúmí yariγíawixini.

Pitao “Joxi Kiraisoxirini.” urijí nánirini.

¹⁸ Sía wíyo Jisaso xegípi niḡweari Gorixomi xwiýíá ririmí niwiri xegí wiewisariḡowa xío tñi ḡweaḡáná o yariḡí re wiḡinigiḡi, “Ámá oxí apixí nání nioni nání gorini rariḡoi?” uríagi ¹⁹awa re urigíawixini, “Wí joxi nání ‘Jono wayí nineameaia uḡorini.’ rariḡoi. Ámí wí ‘Gorixoyá wía rókiamoagí Irajiaorini.’ rariḡoi. Ámí wí ‘Eḡíná Gorixoyá wía rókiamoagía wo rixa wiápínimeáirini.’ rariḡoi.” uríagiá ²⁰ o re urinigiḡi, “Ayí e niḡiro aiwi sewaniḡoyiné nioni nání gorini rariḡoi?” uríagi Pitao re urinigiḡi, “Joxi Kiraisoyi riniḡoxi, ámá Isirerene yeáyí neayimixemearía nání negí ariowayá xwía piaxyó dáni iwiaroníoyi riniḡoxirini.” urinigiḡi.

Jisaso áwaḡí “Ninipikipírírini.” urijí nánirini.

²¹ Pitao e uríagi aí o ḡwí ikaxí nuriri aría jiyikí nori re urinigiḡi, “Aga bi onimiápi ámá wíyo muripani. ²² Ámá imóniḡáoni xeaniḡí obaxí níkáripírírini. Negí Judayí mebaowa tñi apaxípaniḡí imóniḡía xwéowa tñi ḡwí ikaxí eániḡípi mewegíáwa tñi nioni ríwí nimóáná wa nipikipírírini. E neri aiwi sía wiyaú wiyi óráná ámi wiápínimeámíáirini.” urinigiḡi. ²³ Xwiýíá ripi eni nowamini urayiḡinigiḡi, “Ámá goxi goxi ‘Jisasomi ouxidimini.’ niyaiwirínáyí, re éirixini. Amipí ‘Nioni nigípi nání oemini.’ yaiwíyí diḡí peá nimori re yaiwírrixini, ‘Nioni Jisasomi xídarinagi nání ámá wí xeaniḡí niri nipikiri niniri aí ayí ananirini.’ niyaiwiri nioni nixídírrixini. ²⁴ Ámá goxi goxi nioni Jisasomi diḡí niwikwírori xídarinagi nání nipikipírrixiniri xewaniḡoxi éí nimenirínáyí diḡí niyimiḡí imóniḡí aninḡí ḡwearíá nání mearíamani. E neri aiwi ámá goxi goxi éí mimenipa neri ‘Nioni Jisasomi diḡí niwikwírori xídarinagi nání ninipikirónáyí, ayí ananirini.’ yaiwiarinḡí goxi goxi diḡí niyimiḡí imóniḡí aninḡí ḡwearíá nání mearíáirini. ²⁵ Ámá wo nioni minixídí iyía íá nigwí amipí emeáminiri nánini néra nuri nimeáisáná xewaniḡo aninḡíni ikeamónáná oyá amipí aninḡí nixiriri ḡweaníáirani? Oweoi!” nuriri ²⁶ re urinigiḡi, “Ámá nioni nání ayá siniri xwiýíá nioni rariḡápi nání ayá siniri neri nání minixídípa yariḡí goxi goxi ámá imóniḡáoni ámi niweapiríná ikíninḡáoni weapiri wía nioniyá tñi gí ápoyá tñi aḡínajowayá tñi nipíróa weapiri emíáoni eni joxi nání ayá niniri re ririmíáirini, ‘Oweoi, nioniyáoximani.’ ririmíáirini. ²⁷ E neri aiwi wiýiné re rogíá tiyiné sini miḡepa egíámi eḡáná Gorixo xwioxíyo mimeámí neri seameḡweaníápi wiýiné siḡwí winipírírini.” urinigiḡi.

Jisaso níkiniri xegí bi imóniḡí nánirini.

²⁸ E nuríísáná rixa sía wé wíumi dáḡí waú wo óráná o Gorixomi xwiýíá ririmí wini Pitaomi tñi Jonomi tñi Jemisomi tñi niwirimeámi díwí xwé bimi nání niyiro ²⁹ o Gorixomi xwiýíá uraríná re eḡinigiḡi. Xegí símimanḡí

xegí bi íriri rapirapí yíniñú eni apíá weri ápiarwíniñí xwiníá eari neri enjáná re enjinigini. ³⁰Ámá píné o tñi nawíni xwiýíá rarigííwaúyí —Awaú Gorixoyá wíá rókiamoagííwaú Moseso tñi Irajiao tñirini. ³¹Awaú ikínigííwaú éí nirónapiri Jisaso tñi o xwíá tíyo píni niwiárimí ámi ańínami náni nipeyiríná Jerusaremiyo peri ámá niyoni náni wiiri eníápi náni xwiýíá rinaríná ³²Pitao tñi nikumixiniri emearigííwaú tñi xámi sá winariñagi sá wegíáwa, sainíowa niwiápínimearo weniñí éfáyí winigíawixini. Jisaso ikíniño roñagi niwiniro ámá nawíni rogííwaú eni niwiniro ³³awaú Jisasomi rixa píni niwiárimí waniri yariñagí niwiniro Pitao diñí nípikwini mimó “Píoi urimíini?” niriniri Jisasomi úrapí xwiýíá re uriñiginini, “Neamemeariñoxini, none re niñwearíná nanjírini. Añí pipákí wíkaú wí, joxi náni wiwáyí, Moseso náni wiwáyí, Irajiao náni wiwáyí oseamiriyaneyi.” nuriri ³⁴sini e uraríná agwí wí niyapiri awami rití wiminiri yariñagi niwiniro wáyí yaríná ³⁵agwí apimi dáni xwiýíá bi re rininiginini, “Gí niaíwí royoí, niwaniñoni rípeañáomi aríá wípoyi.” ráná ³⁶weniñí éfáyí winigíawixini. Jisaso xegí xewini roñagi niwiniro xwiýíá marí wiwaniñowa siñwí winíápi náni íná ámá wíyo áwanj muripa egíawixini.

Íwí imió diñí xixéroariñí womi nanjí imixiñí nánirini.

³⁷Sá e wegíáwa wíápi tñi niwiápínimeámi díwíyo weapáná oxí apixí obaxí epíroyí egíáyí o tñi órórí niniro ³⁸ámá api epíroyí egíápimi dáni wo niwiápínimeari ríaiwá re uriñiginini, “Nearéwapiyariñoxini, gí íwomi siñwí owiniñiri náni wauní rixiñí rirariñini. O gí niaíwí ná wonirini. ³⁹Imió xixeróaná o makiríwí nimori rixa meanjí neari móaná sinapixwíni iwéniri meákíkwíá eri yaríná omi xwirixwiríá nikixerí rixa ayápiñi mewínariñagi niwiniríná píni wiárariñírini. ⁴⁰Dixí wiepisariñowami wauní rixiñí ‘Imió gí íwomi xixéroariñíyí mixí umáinowáripoyi.’ uríá enjagi aiwi awa wí e epaxí menini.” uríagi ⁴¹Jisaso re riñiginini, “Ámá agwi tiyíné ñweagíáyíné, nioni diñí minikwíropa ero xejwíni moro yariñíáyíné, ‘Jisaso íníná renini nene tñi niñwearane arirá neainíárini.’ riyaiwariñoi?” niriri xanomi re uriñiginini, “Dixí íwo ańwi re nimeámi bei.” uríagi ⁴²íwomi sini nimeámi baríná imió meanjí eáaná siririñwí néra piéroagi aí Jisaso imíomi mixí numáinowárimáná niaíwomi nanjí niwimixiri ámi xanomi mini wiñiginini. ⁴³Mini wíaná ámá nñi Gorixoyá enj eániñí Jisaso épi náni ududí nero “Ayikwirani?” yaiwigíawixini.

Ámi áwanj “Ninipikipíríárini.” uriñí nánirini.

Ámá nñi Jisaso yariñipi náni ududí yaríná o wiepisariñowami re uriñiginini, ⁴⁴“Píráníñí aríá nípoyi. Nioni aríá enjyo searémoariñini. Ańínami dánjí ámá imóniñáoni ámá wíyo miyí nuripíríárini.” uríagi aiwi ⁴⁵awa xwiýíá api Gorixoyá diñí tñi ínimi imóniñagi náni píráníñí nijíá

mimónipa nero míkípi náni yariñí wianiri éáyí wáyí niwiro náni masisiá wigíawixini.

“None go go seáyí e imóniríeniñoi?” rinigiá nánirini.

⁴⁶Wiepisariñowa ximiximí niniro “None go go seáyí e imóniríeniñoi?” rinariná ⁴⁷Jisaso wigí xwioxíyo adadí niwiri awa e yaiwiaríagía niwiniri náni niaíwí bi nimeari xío tñí e éí nurárirí ⁴⁸awami re uriñinigini, “Ámá woxi goxi goxi nioni ninixídiri náni niaíwí ripimi peayí miwiani wéyo nimerínáyí apimini mimeariñini. Nioni eni wéyo nimeri gí ápo nirowárenapiñomi eni wéyo umeri yariñini. Soyíné woxi ‘Nioni awami ínimi niwuríniri sañí ourápinimi.’ yaiwinariño oyí seáyí e imóniñorini.” uriñinigini.

“Ámá midáni miró segí tñámini imónigiáyirini.” uriñí nánirini.

⁴⁹Wiepisariñí Jono re uriñinigini, “Neamemeariñoxini, none ámá wo yoí joxiyá niriri imió mixí umáinowáraríagí siñwí niwiniríná o none mineaxídipa neri yariñagí náni mepa oeni uriñwanigini.” uríagí aí ⁵⁰Jisaso re uriñinigini, “Ámá orfwámi dáni miró segí tñíjimini imóniñorini. Ayináni e mepa oeniri pí náni urigíawixini?” uriñinigini.

“Omí mírañí miwipa oyaneyi.” rigíáyí nánirini.

⁵¹Rixa Gorixo Jisasomi añínamí náni wiriménapini añwi e imóniñáná Jisaso diñí “Nioni Jerusaremiyo náni oumini.” níkwírómi nuríná ⁵²xwiyíá yañí wiowárfí wí xíomi xámi umeapíri náni uowáraná awa nuro añí ámá wigí yoí Samariayí —Ayí Isireriyí tñi xepixepá rónigiáyirini. Ayíyá añí bimi nirémoro Jisaso ríwíyo bini náni amipí píraníñí imixaniro éáyí ⁵³ámá añí apimi ñweáyí Jisaso Jerusaremi náni uminiri yariñagí niwiniro “Mírañí bí owianeyi.” miwimóní yariñagía ⁵⁴xegí wiepisariñí Jemiso tñi Jono tñi e niwiniri Jisasomi re urigíisixini, “Ámináoxini, yawawi ‘Gorixo añínamí dáni ríá nimamówárenapiri ámá tíyo ríá nini náni anani ourípiyi.’ risimónarini?” uríagí aí ⁵⁵o níkinimóniri awaúmi mixí “E miripani.” nurími ⁵⁶añí ámi bimi náni ugíawixini.

Ámá “Orixídimini.” urigiá nánirini.

⁵⁷Óíyo waríná ámá wo Jisasomi re uriñinigini, “Ami gími joxi úmi nioni eni númi rixídímemeárini.” uríagí ⁵⁸o ámá royí eñí neániri níxíniríeniñoiniri re uriñinigini, “Síwí sayí xegí siririkí sá wenía náni tñíirini. Iní eni xegí yéwí tñíirini. E neri aiwi ámá imóniñáoniyá sá wémía náni añí wí menini.” uriñinigini. ⁵⁹Ámi womi re uriñinigini, “Joxi níxídei.” uríagí o re uriñinigini, “Xámi xe nuri gí ápo péaná xwíá oweyáriniri siñwí naniriréini?” uríagí aí ⁶⁰o re uriñinigini, “Ámá nioni

diŋj minikwíropa yariǵíáyí ayí eni áamá piyíniŋj imóniŋagía náni wigí áamá péaná xwíá oweyárinípoyiniri siŋwí winírixini. E neri aí joxi xwiyíá Gorixo xegí xwioxíyo mimeámí neri umerŋweanía nánipi ami ami wái urimérixini.” uriniginini. ⁶¹Ámi áamá wo nibiri re uriniginini, “Ámináoxini, nioni rixídímémfíni. E neri aiwi xámi xegí áamáyo nuri yayí owiemeniri siŋwí nanei.” uríagi aí ⁶²Jisaso ewayí xwiyíá ripi uriniginini, “Áamá omiŋj meariŋj wo nikinimóniri ríwími dáni siŋwí anána xío omiŋj meariŋjpi xixeni warinimani.” nuriri re uriniginini, “Joxi eni diŋj ninikwírori ninixídísáná ámi nikinimóniri amipí joxi píni wiáríyí meáminiri náni diŋj nimori nerínáyí, omiŋj Gorixo náni pírániŋj miwiipa eri oyá xwioxíyo páwipaxí mepa eri imóniŋjini.” uriniginini.

Áamá 72 nirípeari yaxwí uowárapiní nánirini.

10 ¹Jisaso e nurimáná áamá ámi wíyo 72 nirípeari aŋj xío uníá ayí ayo náni waúni waúni xámi umeapíri náni nuowárapiri ²re uriniginini, “Áamá nioni xwiyíá yaŋj seaiapowáráyí, ayí aiwá yóí píripírí niniri minipaxíniŋj imónini. E neri aiwi áamá seyíné aiwá api mipíri náni obaxí mimóniŋoi. Ayináni Gorixo áamá wíni eni aiwá mipíríniŋj nimóniro xwiyíá yayí winipaxípi yaŋj wiowáripíri náni yariŋj wípoi.” nuriri ³re uriniginini, “Soyíné óf nioni searíáyo úpoi. Áamá wí síwí sayí sipisipí roanarigíápániŋj seaipíríe náni searowáraninini.” nuriri ⁴re uriniginini, “Nuróná niŋwí wowí birani, íá árupianj wúrani, síkwí súrani, nimeámi mupani. Óí e áamáyo niwiniríná yayí niniro e éí miŋweapani. ⁵Aŋj wiwámi nipáwiríná yayí niwiri xámi re urírixini, ‘“Seyíné Gorixoyá diŋj tñi niwayiróniro oŋweápoi.” neaimónarini.’ urírixini. ⁶Aŋjwámi xiáwo saniŋo imóniŋagi niwiniríná xwiyíá yayí niwiríná e uríapi mididí mikixepani. Aŋj xiáwo saniŋo mimóniŋagi niwiniríná yayí api mididí wikixérixini. ⁷Aŋj giwi giwámi nipáwiro niŋwearíná aiwá tñi iniigí tñi seaiapíapi anani niniro ŋweárixini. Ayí ripi nánirini. Áamá niŋwí omiŋj neríná niŋwí meaarigíápa soyíné wái nemero nioni omiŋj niniiríná iniigí tñi aiwá tñi seaiapíáyí niŋwíniŋj wayíá nipíríarini.” nuriri xegí wiepisariŋowa aiwá oneaiapíoyiniri aŋj wiwá wiwámi emepírixiniri ámi re uriniginini, “Aŋj wiwámi nipáwiro ŋweáíiwámi dáni aŋj axípimi ámi wiwámi ŋweaniro náni mupa érixini. ⁸Aŋj gipi gipimi nirémoríná aiwá míraŋj seaianiro ‘Aŋíyo náni eini.’ nisearimi úfáyo númi nuro pí pí aiwá seaiapíapi sa anani nírixini. ⁹Aŋj apimi simixí yariǵíáyo naŋj wimixiro ‘Gorixo xwioxíyo mimeámí neri pírániŋj seameŋweaní aŋwi ayo eŋagi náni nisaniro ŋweárixini.’ uriro érixini. ¹⁰E neri aiwi aŋj gipi gipimi nirémoríná ayí niseairimeámi wigí aŋíyo náni miseaupa éaná nuro óf aŋj apimi náni iniŋyími dáni re urírixini, ¹¹‘Seyíné diŋj re mopíri náni, “Gorixo xwioxíyo mimeámí neri pírániŋj neameŋweáminiri éí aiwi nene api náni mineaimónariŋagi

náni xío xeaniŋí neaiapiníárfani?” yaiwipíri náni xwíá sikí segí aŋí ripimi dáŋí aí negí sikwíyo xéniŋípi píri wiaíkmí seasiariŋwini.’ uríhixini.” nuriri ¹² re uriŋinigini, “Nioni aga nepa searariŋini. Gorixo áamá niyoni mí ómómiximí eníáyimi áamá aŋí Sodomi ŋweaagiáyí — Eŋíná Sodomi ŋweaagiáyí ríáni nikiróa wariŋagia Gorixo aŋínami dáni ríá mamówáráná niyoni ríá niŋinigini. Síá ayimi ayo Gorixo xeaniŋí xwé niwiri aiwi áamá soyíné aríá miseaí xe oúpoyiniri siŋwí seaníayo Gorixo xeaniŋí niwiríná Sodomi ŋweaagiáyó ríniŋí wininíápi tñi xixeni wininíamani. Seáyí e múroníárfini.

**Aŋí bi bimi ŋweáyí xíomi diŋí miwikwíroariŋagia
uréwapiyíŋí nánirini.**

¹³ “Isireriyíné ‘Gorixo nene náni aga wimónarini.’ yaiwinariŋagia aí xeaniŋí o seaikáriníápi ayíkwí meŋagi náni diŋí sipí oseaini. Isireriyíné aŋí yoí Korasiniyi riniŋíyo ŋweagiáyíné tñi aŋí yoí Betisaida ŋweagiáyíné tñi aweyi! Síá wiyi seyíné majíá seaóriníárfini. Émáyi aŋí yoí Taiayi riniŋíyo ŋweáyí tñi Saidoniyi riniŋíyo ŋweáyí tñi emimí nioni seaíwapiyíŋápi siŋwí niwiniro siŋwiriŋí, ayí eŋíná nisaniro iyíá írikwí wú pániro ríá uráwíyo iwieániro yaniri egíárfini. ¹⁴ Gorixo áamá niyoni xeaniŋí winíáyimi xeaniŋí Taia ŋweáyo tñi Saidoni ŋweáyo tñi winíápi tñi seyíné seaikáriníápi tñi axípi imóniníárfani. Seyíné seaikáriníápi seáyí e múroníárfini. ¹⁵ Isireriyíné, Kapaneami ŋweáyíné ‘Gorixo aŋínami náni nineameámi neayiníárfini.’ niyaiwiro seáyí e riyariŋoi? Ríá aŋiŋí wearíŋíyo niseamamówáriníárfini.” nuriri ¹⁶ wiepisariŋíyo ámi re uriŋinigini, “Áamá giyí giyí soyíné wáí urimearíná aríá seaíáyí nioni eni aríá niariŋoi. Giyí giyí aríá miseaipa éíáyí nioni eni aríá miniariŋoi. Nioni aríá minipa éíáyí Gorixo, nirowárénapíŋomi eni aríá miwariŋoi.” uriŋinigini.

Áamá 72 imónigiáwa ámi Jisasomi wímeagiá nánirini.

¹⁷ Áamá 72 urowárapíŋíyi ámi diŋí yayí niyaiwia nibiro Jisasomi niwímearo re urigíawixini, “Ámináoxini, áamá imió diŋí xixéroariŋíyo aí none yoí joxiyá nirirane mixí umáinowáráná anani aríá nineaimi éí wariŋoi.” uríagia ¹⁸ o re uriŋinigini, “Soyíné imíóyo mixí umáinowárfaríná nioni Seteno — O imíóyo xiráóniŋí imóniŋorini. O ápiaŋwíniŋí aŋínami dáni piérónapariŋagi winiŋanigini. ¹⁹ Aríá nípoyi. Nioni eŋí sixí eániŋí seaiapowáriŋá eŋagi náni soyíné weaxíá tñi wáre tñi anani xórórí ero Seteno, íwí oépoyiniri seaíwapiyariŋomi anani xórórí wiro epaxírfini. E yaríná wí xwíríá seaikixeniárfani. ²⁰ E niseariri aiwi imió xixéroariŋíyo mixí umáinowáráná aríá niseairo éí warigíá eŋagi náni seáyí e nimóniro yayí mepani. Sa ripi nánini yayí époyi. Aŋínami íkwí áamá wé róniŋíyi náni ŋwiráriníŋínami segí yoí eni ŋwiráriníŋagi náni yayí époyi.” uriŋinigini.

Gorixomi seáyi e umeñí nánirini.

²¹ Kwíyí Gorixoyápi ukikayonjagi náni axíná yayí seáyimi dáni neri Gorixomi re uriñinigini, “Gí ápoxini, xwíá imixiri anjína imixiri eñoxini, wiepisariñowa yarigíá api náni ámá seáyi e nimóniro ‘Nioni nigípi diñj rixa nijíá imóniñáoni náni go níwapiyiniñoi?’ riníáyo joxi yumí wiri ámá ‘Nioni niaíwoníniñj nimóniri majíá imóniñáoni náni anani níwapiyíi.’ riníáyo joxi wíá rókiamori yariñoxi enjagi náni seáyi e rimeariñini. Ápe, joxi ‘E oemini.’ simónariñagi náni rariñini.” nuriri ²² re riñinigini, “Gí ápo amípí xwíá rirími nírímíni yaníwá náni íániñj niepíxíniasiñirini. Ámá wo Gorixomi xewaxo náni xixeni nijíá mimónini. Gí áponi xixeni nijíá imónini. Ámá wo ápo náni eni nijíá mimónini. Xewaxonini nijíárinini. Ámá ‘Xewaxoni gí ápo náni wíá orókiamómíni.’ yaiwíáyí, ayí eni gí ápo náni nijíá imóniñoi.” nuriri ²³ nikinimóniri xegí wiepisariñowa wigípi ñweañagíá siñwí niwiniri awamini re uriñinigini, “Amípí nioni eri xwiyíá riri yariñápi soyíné siñwí nanayíápi náni Gorixoyá diñj tñi yayí seáyi e dáni seainipaxírinini. ²⁴ Gorixoyá wíá rókiamoagíá obaxíyí tñi mixí ináyíyí tñi amípí soyíné siñwí nanarigíápi ‘Siñwí owinaneyí.’ niriro aiwi wí siñwí miwinipa ero amípí soyíné aríá niarigíápi ‘Aríá owianeyí.’ niriro aiwi wí aríá miwipa ero yagíárinini. Ayináni soyíné yayí seáyimi dáni seainipaxírinini.” uriñinigini.

Ewayí ikaxí Samariayí wo xejwí womi wá wianiñj nánirini.

²⁵ Ámá ñwí ikaxí eániñjipi mewegíá wo “Jisaso enj eániñjoríani? Iwamíó owíwapiyimini.” niyaiwiri niwiápinimeari re uriñinigini, “Nearéwapiyariñoxini, nioni arire neri diñj niyimiñj tíñáoni imónimíárinini?” uríagi ²⁶ Jisaso re uriñinigini, “Ñwí ikaxí eániñjipi arire niriniri eánini? Joxi íá niroríná arire riniñjagi roariñirini?” uríagi ²⁷ o re uriñinigini, “Re niriniri eánini, ‘Joxi dixí Áminá Gorixomi diñj sixí nuyiri neríná dixí xwioxí o náni yayí osininiri eri enj sixí eániñj tñi xídiri diñj tñi pírániñj wikwírori éirixini. Jiwaníñoxi diñj sipí inariñjpa ámá joxi tñi ñweagíáyí náni eni axípi siníwiniñini.’ niriniri eánini.” uríagi ²⁸ Jisaso re uriñinigini, “Joxi xixeni rariñini. E nerínáyí diñj niyimiñj tíñoxi nimóniri aniñj ñwearíárinini.” uríagi ²⁹ ñwí ikaxí eániñjipi mewenjo ámá níni xewaniño náni re oyaiwípoyiniri “O ñwí ikaxí eániñjipi tñi xixeni ámá xíó tñi ñweagíáyí náni diñj sipí niwiri arirá wiaríñjoríani?” oyaiwípoyiniri ámi yariñj re wiñinigini, “Ámá nioni tñi nawíni ñweañwáyí giyíríani? Ámá giyí náni niíwaníñoni diñj sipí inariñjapa diñj sipí axípi e niniñoi?” Yariñj e wíáná ³⁰ Jisaso ewayí xwiyíá ripi uriñinigini, “Ámá wo anj yoi Jerusaremíyí píni niwiárimí anj yoi Jerikoyi riniñjyo náni wearíná re enjinigini. Ámá ámáyá amípí íwí oxaurápaneyiniro yarigíá wa omi íá nixero xegí rapírapí wiriro iwanj

mépero rixa napénimearíná píní niwiárimí ugáwixini. Rixa numáná enáná ³¹ apaxípániñí imóniñí wo eni óí axíyimi niweríná weniñí éyí winiñiginí. Iwaní mépéfo daiwo weñagi niwiniri arirá bi miwí oriwámi dání múroniginí. ³² Ámi Judayí wigí yoí Ripaiyi rinigíáyí wo —Ripaiyi Gorixo nání ridiyowá yarigíwámi arirá wiarigíáyíriní. Ripaiyi rinigíá wo iwaní mépéfo weñe nirémori niwiniri aiwi o eni oriwámi dání múroniginí. ³³ E neri aiwi ámá Samariayí wo —Samariayí tñni Judayí tñni eníná dání xepixepá rónagiáriní. Samariao eni añí wíyo nání nuríná winiñiginí. Ámá iwaní neari tío riwo weñagi niwiniri omi wa niwianiri ³⁴ añwi e nuri iniigí wainí bi tñni raní bi tñni iwaní weáíayo gínií wiri wíá utiri nemáná nimfeyoari xegí dogíyo seáyi e niñwiráriní nimeámi añí ámá ami ami dání nibiri wéfrixiniri miriniñí wiwámi nání nuri e meweño ³⁵ wíápi tñni íkwí winíxaú niroari añiwámi meariñomi niwiri re uriñiginí, ‘Ámá romi nigwí rinami dání pírániñí méirixini. Rina anipá imónáná o nání joxi dixí nigwí xwiríá ikixéánáyí ámi nioni nibiríná nioniyá xixeni mini siapimíáriní.’ uriñiginí.” Jisaso ewayí xwiýá api nurimáná ³⁶ ñwí ikaxí eániñipi meweñomi yariñí re wiñiginí, “Joxi diñí arire yaiwiarini? Iwaní neari tñomi ámá waú wo niwiniro aí awa go o tñni ñweagiá wóniñí nimóniri arirá wiñiginí?” uráná ³⁷ ñwí ikaxí eániñipi meweñomi re uriñiginí, “Ámá niwiniíná wa niwianiri nañí wiño o tñni ñweagiá wóniñí imóniñiginí.’ nimónarini.” uríagi Jisaso “Joxi eni nuri axípi e néra úirixini.” uriñiginí.

Mataí tñni xinapí Mariaí tñni nánirini.

³⁸ Jisaso wiepisariñiyí tñni óíyo nuróná añí bimi rémóná apixí wí Mataíyi riniñí aiwá míraní wini xegí añíyo nání niwirimeámi nuri ñweañáná ³⁹ í xegí xexirímeái Mariaíyi riniñí nibiri Jisasoyá sikwí tñí e niñweámáná oyá píné aríá wiaríná ⁴⁰ Mataí aiwá riyamí eminiri yaríná upupígí winariñagi nibiri Jisasomi re uriñiginí, “Ámináoxini, níni aiwá riyamí yaríná gí nixirímeái píní niniwiárimí nibiri ‘Ayí ananirini.’ riyaiwiarini? Í sañí nirápiní nání uowárenapei.” uríagi ⁴¹ Ámináo re uriñiginí, “Mataíxi, Mataíxi, jíxi diñí obibaxí mori amípí obaxí nání ayá síwí rirori yariñini. ⁴² E neri aí jíxi añiñí miní epaxí imóniñiyí obaxímani. Aga ná binirini. Mariaí api nání diñí neyírori aríá niarini. Í diñí eyíroariñipi mididí miwikixepa neri jíxi nirípi bi urimiméini.” uriñiginí.

Ayí Gorixomi nuriríná ripaxipi nání uréwapiyiñí nánirini.

11 ¹ Jisaso wí e nuri rixa Gorixomi xwiýá ririmí niwimáná enáná xegí wiepisariñiyí wo re uriñiginí, “Ámináoxini, Jono wayí nineameaia wago xegí wiepisariñowami Gorixomi xwiýá ririmí wipíri nání uréwapiyiñipa joxi eni e nearéwapiyii.” uríagi ² o

awami re uriñinigini, “Gorixomi xwiyía ririmí niwiríná re urírixini, ‘Ápoxini, “Ámá níni joxini ñwíáoxi eñagi náni wéyo rimérixini.” neaimónariní. “Joxi xwioxíyo mimeámí neri neameñwearíápi siñáni imóníwinigini.” neaimónariní. ³Nene aiwá síá ayí ayimi naníwá náni neaiayírixini. ⁴Ámá nene íwí neaíáyo yokwarimí wiíagwi náni joxi nene íwí yariñwáyí yokwarimí neaírixini. Ámá wí eñí eáñigíáyírfaniri iwamíó owíwapiyípoyniri siñwí mineanipa érixini.’ Gorixomi xwiyía ririmí niwiríná e urírixini.” uriñinigini. ⁵⁻⁷E nurimáná ewayí xwiyía ripi uriñinigini, “Soyíné woxi dixí ámá añí wí e dájí wo áriwegíyo símeááná aiwá meñagi náni joxi ámá níkumixiniri emearigíáyí womi nuri aiwá náni rixiñí nuriríná re uriríni, ‘Gí ámá añí wí e dájí wo añí wíyo náni únío rixa áriwegí ríná nímeáagi omi aiwá bí mini wimi náni meñagi náni joxi tíe náni rixiñí bariñini. Aiwá biaú bí ninimeairiréini?’ uráná añíyo ínimi dání, sá weñími dání re ririniñoi, ‘Aiwá náni ayá wí minirijweapani. Añí ówaní niyárimáná niaíwípia tíni íkwiañwíyo rixa sá weñwini. Nioni wí niwiápínimeari aiwá rimeaipaxí menini.’ ririniñoi. ⁸Nioni re searariñini, ‘Añí xiáwo aiwá náni rixiñí bío xegí níkumixiniri emeariñí wo aiwí niwiápínimeari xío rixiñí urariñíyí umeaipaxímani. E neri aiwí aríki rixiñí urayaríná niwiápínimeari xío wimónariñípi nípini mini winigini.’ searariñini. ⁹Ayináni nioni re searariñini, ‘Soyíné Gorixomi amípí wí náni yariñí wíáná o anani mini seaiapiníárini. Rixiñí nuriríná amípí wí o tíñí e náni píá nerínániñí anani meapíríárini. Rixiñí nuriríná wái e nirómáná wakwí óránániñí o anani aríá nisiri añí ówaníniñí ríkwiiñigini.’ searariñini. ¹⁰Ayí ripi náni searariñini. Ámá níni Gorixomi rixiñí urayarínáyí ayí anani wí meapíríárini. Ámá giyí amípí wí náni píá neríná anani meapíríárini. Giyí wái e dání wakwí óráná o anani añí ówaní wíkwiiñíárini.” uriñinigini.

¹¹Ewayí xwiyía ámi bí ripi nuriri re uriñinigini, “Ápoyíné woxi dixí íwo nibiri peyí náni rixiñí riránáyí, weaxíá nímeari wiriréini? Oweoi, wí e wiriméini. ¹²Íñí kímiñí náni eni rixiñí riránáyí, wáré nímeari wiriréini? Oweoi, e eni nímeari wiriméini. ¹³Soyíné íwí néra warigíoyíné aiwí segí niaíwí rixiñí searánáyí, anani amípí awiaxíyí anipá mini wiarigíoyínérini. E neri aí segí ápo añínami ñweaño añipaxíri. ‘Omi giyí giyí rixiñí uránáyí, kwíyí oyápi aí anani mini winíárini.’ searariñini.” uriñinigini.

“O eñí eániñí oboyá tíni yarini.” rigíá nánirini.

¹⁴Jisaso, imíó mañí píróniñí womi —O ámá womi diñí xixéroariñagi náni ámáó eni mañí píróniñorini. Imíómi mixí umáinowáraná imíó éí úáná ámá mañí píróniño ámi píné riñinigini. Ámi píné rariñagi ¹⁵ámá e epíroyí egíáyí siñwí e niwiniro ududí nero aí ¹⁶ámá wí re rigíawixini, “O imíó mixí numáinowáriríná imíó xiráóniñí imóniño —O xegí yoí bí

Bieseuroyi riniñorini. Oborini. O enj weámixowáriagi náni enj eániñj oya tñi umáinowárariniñrini.” raríná áamá ámi wí “Jisaso enj eániñjoráni? Iwamió owíwapiyaneyi.” niriniro nibiro re urigíawixini, “Añinami dáni emimí bi iwamió neáiwapiyíi.” uríagiá aiwi ¹⁷o wigí yaiwigíá náni adadí niwiri ewayí xwiýá re uriñinigini, “Áamá gwí axírí xepixepá niróniro mixí ninirónáyí, ayí anj miwiárekixinipaxírini. Áamá xiráxogwáowa eni xepixepá niróniro mixí ninirínáyí, ayí eni anj miwiárekixinipírírini. ¹⁸Ayináni Seteno tñi xegí imíó axíyí tñi xepixepá niróniro mixí ninirónáyí, arige nero enj neániri ropírái? Oweoi! E neri aiwi seyíne ‘Enj eániñj Bieseuroyá tñi imíó mixí umáinowárariniñi.’ nirariñoi. ¹⁹Nioni nepa Bieseuroyá enj eániñj tñi imíó mixí numáinowárirí siñwiriýí, segí áamá enj eániñj goyá tñi mixí umáinowárarigíáririni? Segí áamá imíó mixí umáinowárarigíáwa síá yopariyimi niwiápinimearo yariñj re seaipírírini, ‘Nene áamá wo imíó mixí umáinowárarinagi niwinirane “Enj eániñj Gorixoyá tñi e yarini.” rinariñwá enagi náni seyíne pí náni Jisaso axípi yarinagi niwiniríná xwiýá nimeariro “Enj eániñj oboyá tñi yariñini.” urigíawixini?’ Yariñj e seaipírírini. ²⁰Nioni enj eániñj Gorixoyá tñi imíó mixí umáinowárarinagi aí seyíne ‘Gorixo xío xegí xwioxíyo mimeámí neri neameñweaníápi rixa rimónini?’ miyaiwariñoi. ‘Áamá yeáyí neayimixemeanía náni uowárenapínío, aríowayá xwíá piáxíyo dáni iwiaronfoyi rariñwáo rixa nene tñi rimóniñwini?’ miyaiwariñoi.” nuriri ²¹ewayí xwiýá ámi bi ripi uriñinigini, “Áamá enj riñj wo éwalkí oxá nayiri nitiri awí meñweañáná áamá wo xegí anjyo nipáwiri amipí wí íwí meapaxí menini. ²²E neri aí áamá enj riñomi nimúrori omi seáyí e imóniñj wo nibiri mixí wiminiri neríná xopírárí niwiri amipí nñi mixí náni maxiriñjyí nurápináná amipí oya nñi eni rixa nurápiri yanj niwia wariñrini.” Jisaso enj eániñj xíoyá oboyápimi múroñagi náni ewayí xwiýá e uriñinigini.

²³Áamá wí ámáyí nñi Jisasomi diñj wikwíroro xídiro epírixiniri píri rakiámí wianiro yariñjyí náni ewayí xwiýá ámi bi nuriri re uriñinigini, “Áamá nioni tíámíni mimóniñjyí, ayí nioni tñi mixí imóniñwáyíri. Áamá nioni tñi sipisipí awí meaáripa yariñjyí, ayí sipisipí xídíxíowárirí yariñjyíri.” uriñinigini.

Ewayí ikaxí imíó xegí wíniyo wirimeañj nánirini.

²⁴Áamá ayí “Nene Jono nearáná saniñj onimiápi nerane aiwi imíó xixéroariñj róniñj imónaniñini.” oyaiwípoiñiri ámi xixewisí ikaxí bi nuriri re uriñinigini, “Imíó xixéroariñjyí mixí umáinowáraná áamá womi pñi niwiárimí nuríná iniigí mayími ge ge sá onweáminiri nemi píá nimegini méisáná re yaiwiárinirini, ‘Gí ámi anj axí pñi niwiárimí biñae náni oumíni.’ niyaiwimi ²⁵nuri anj rixa síí peáriniri píraníñj imixáriniri yárininagi niwiniri sini aná imóniñagi niwiniri náni ²⁶ámi nuri imíó wé

wíumi dánj wáú íwí neróná xíomi seáyi e múrooro egiáyo niwirimeámi nuro axomi nixixéroro e ɲweaarigiárini. Xámi sipí imónago aí ínáyí aga sipí ikeamóniɲírini.” uriniginini.

Yayí winipaxíyí nání uriɲí nánirini.

²⁷Xwiyíá api uraríná apixí wí ámá e epíroyí egiáyo dání ráiwa re uriniginini, “Apixí joxí nixixiriri amiɲí siapiɲí Gorixoyá diɲí tñi yayí winipaxírini.” uríagi aí ²⁸o re uriniginini, “E wí niyaiwiri miripani. Ámá giyí giyí xwiyíá Gorixoyá aríá wiro axípi ero yarigiáyi ámá ayíni Gorixoyá diɲí tñi yayí winipaxírini.” uriniginini.

Ekiyiɲí bi nání rixiɲí urigiá nánirini.

²⁹Ámá obaxí Jisaso tñj e epíroyí eɲáná sini wíni wíni epíroyí yariɲagía o re uriniginini, “Isireriyíne, agwi ɲweagiáyíne íwí nera nuro aríkí yarigiáyíne, emimí nání seaimónariɲagi aiwi nioni emimí wí miseafwapiyipa neri aiwi ná bini Gorixoyá wía rókiamoagi Jonao yagɲpini seaifwapiyimíárini. ³⁰Eɲíná Gorixoyá wía rókiamoagi Jonaoyi riniɲo —O síá wíyaú wíyi piyíniɲí nimóniri peyí agwíyo weagorini. O ámá aɲj yoi Ninipayi riniɲíyo ɲweagiáyo Gorixoyá símimajíóniɲí wiɲiɲpa ámá imóniɲáoni ámá agwi ɲweagiáyíne Gorixoyá símimajíóniɲí seainiɲini. ³¹Gorixo ámá niyoni mí ómómiximí eníayimi apixí eɲíná Sibayí aɲjyo meɲweaagi —Í mixí ínáyí Soromono niɲjá seáyi e nimóniri ririmí yaríná aríá wiminiri nání aɲj aga ná jíami dání biɲírini. Í ámá woni Soromonomi seáyi e imóniɲáoni re éí nírómáná searariɲagi aiwi seyíne aríá miniariɲagía nání í síá ayimi niwiáɲínimeari xwiyíá seameáriníárini. ³²Ámá eɲíná aɲj yoi Ninipayi riniɲíyo ɲweagiáyi —Ayí Gorixoyá wía rókiamoagi Jonao Gorixoyá xwiyíá wái urimeáná ayí wigí íwí egiápi ríwímíni nimamoro nisaniro ɲweagiáyírini. Ayí ámá wo Jonaomi seáyi e imóniɲáoni re éí nírómáná searariɲagi aiwi seyíne aríá miniariɲagía nání ámá ayí síá Gorixo ámá niyoni mí ómómiximí eníayimi niwiáɲínimearo xwiyíá seameáripíríárini.” uriniginini.

Ewayí ikaxí ramixí nání uriɲí nánirini.

³³O xwiyíá Gorixoyá ramixíniɲí imóniɲagi nání re riɲiniginini, “Ámá wo ramixí nimixárománá aɲj sakwímaɲjyo tariɲimani. Sixí wá nimeari upikákwiárariniɲimani. Nimixárománá ámá íwiapíá giyí giyí wía óniɲagi siɲwí winipíri nání íkwiaɲwíyo seáyi e ikwiárariniɲírini.” nuriri ³⁴re uriniginini, “Segí siɲwí eni uyíwíniɲí imónini. Segí siɲwí tñi pírániɲí naniro wé róniɲí nerónáyí, diɲí naɲni aumaúmí niniro segí xwioxíyo wíániɲí ókímixinariɲoi. E neri aiwi segí siɲwí tñi íwí nání naniróná segí xwioxíyo síániɲí yimixinariɲoi. ³⁵Diɲí naɲni aumaúmí niniro segí xwioxí wíániɲí seaókiariɲipi supikíniniginiri diɲí tñi éfrixini. ³⁶Segí

xwioxíyo sía wí miyini wíáni nókiáriríná uyíwí wía seaókiariñípániñí segí xwioxí níni wía seaókiáriníárini.” uriniginini.

Parisiowami xwiyiá umeáriní nánirini.

³⁷E nuríísáná eñáná Parisi wo “Gí añíyo aiwá onaiyi.” nuriri nipemeámi úáná Jisaso nuri aiwá nipíre éí ñweañáná ³⁸Parisio Jisaso xámi wé piaxíniñí eañí náni wigí yarigíápa wé iniigíyo igwíá miwíró aiwá nipíre éí ñweañagi niwiniri ududí yaríná ³⁹Jisaso re uriniginini, “Parisioyíne íwí mearo ríá kiroro yaniro moarigíápi segí xwioxíyo sini magwí eñáná kapixí tñi pírerixí tñi igíá nearínániñí kíyí bíariwámi dánini kwírinarigíoyínéxini. ⁴⁰Majimajía ikárinarigíoyíne ‘Bíariwámini imixariño ñiriwámini mimixiñirini.’ riyaiwariñoi? ⁴¹Amipí soyíne íá xirigíápi áamá uyípeayíyo ayá nurimixiro arirá niwiro mini wíánáyí, soyíne igíá neániróniñí imónipíríárini. ⁴²Parisioyíne aweyi! Sía wiyi soyíne majíá seaóriníárini. Gorixo xeaniñí ríá tñí seaikáriníá eñagi náni ñíñí sipí oseainini. Soyíne aiwá nimiróná aniñí miní yíyí tñi aí tñi siyó amipí pírániñí íá niroro rixa wé wúkaú imónáná wo Gorixomi mini niwiro aí áamáyo wé róniñí wiarigíáyí píni wiáriro Gorixomi ñíñí sixí muyipa ero yarigíoyínéxini. Soyíne aiwá onimiápia aí segí aniñí miní yarigíá jíapi píni miwiáripa ero áamáyo nañí mimixipa yarigíápi eni ero neri siñwiriýí, nañí imóniminiri eñirini. ⁴³Parisioyíne aweyi! Sía wiyi soyíne majíá seaóriníárini. Soyíne rotú añíyo áamá siñwí oneañipoyiniri símí símí e ñwearo makeríáyo awí eánarigíe áamá yayí ‘Ámináoxini.’ oneañipoyiniri emero ‘Oyaneyi.’ seaimónariñagi náni Gorixo xeaniñí seaikáriníárini.” uriniginini. ⁴⁴Áamá níni Parisiowami niwiniríná “Nañowarini.” yaiwariñagía niwiniri awa wigí íwí yarigíápi áamá piyí xwáripáyo ínimi wení yapi imóniñagi náni re uriniginini, “Aweyi! Sía wiyi soyíne majíá seaóriníárini. Soyíne áamá piyí tigíe xwíá emadiróniñáná áamá ‘Áamá piyí tigíeríani?’ miyaiwí maiwí pwarigíéniñí imónigíoyínérini.” uráná ⁴⁵Ñwí ikaxí eániñipi mewegíá wo niwiápinimeari re uriniginini, “Nearéwapiyariñoxini, Parisiowami e nuriríná none eni ikayíwí neamearariñini.” uríagi aí ⁴⁶Jisaso ñwí ikaxí eániñipi mewegíáwa áamáyo aniñí miní sekaxí “E érixini. E érixini.” nuriro aí wiwaníjowa wí miyarigíá eñagi náni re uriniginini, “Ñwí ikaxí eániñipi mewegíoyíne eni aweyi! Sía wiyi soyíne majíá seaóriníárini. Soyíne áamáyo sañí xwé ayá wí niwikwiáriro aí sewaniñoyíne sañí xwé api iwamíó mimíeyoarigíoyíne eñagi náni Gorixo xeaniñí seaikáriníárini. ⁴⁷Soyíne Gorixoyá wía rókiamoagíáwami segí aríowa pikíarigíáyo xwáripáyo aniñí miní mía imixarigíoyínéxini. ⁴⁸Soyíne e neriñipimi dáni áamáyo áwaní réniñí urariñoi, ‘Negí aríowa Gorixoyá wía rókiamoagíáwami nipikiáriróná apáni yagíá eñagi náni wigí xwáripáyo mía imixariñwini.’ Éniñí urariñagía náni Gorixo xeaniñí

seaikáriníárini. ⁴⁹ Ayináni Gorixo diñj neɲwiperi soyíné náni xixeni re riñiniginini, ‘Nioni wía rókiamoarigía wami tñni xwiýá wái urimearigía wami tñni urowáraná ayí wíyo pipikímí ero wíyo mixí xídownárapiro epíríárini. ⁵⁰ Wía rókiamoagía niyoni nioni aɲña imixiri xwía imixiri eɲná e eɲae dáni nipikía bíagía náni áamá agwi ɲweagiáyíné nioni eɲj seameámíárini. ⁵¹ Aiboríomi xámi xiráo Keno pikiɲe dáni nipikía nibíasáná yoparí nioniyá wía rókiamoagí Sekaraiáomi pikigíawixini. Omi nioni náni íkwiaɲwí ridiyowá yaniro ikwikwiárimí yarigíe midáni eɲáná gí aɲj awawá “Ŋwíárini.” riniɲe midáni eɲáná áwinimi e pikigíorini. Omi pikigíe náni oxí apixí agwi ɲweagiá tiyíné nioni eɲj seameámíárini.’ Gorixo e riñírini.” uriñiniginini. ⁵² Ŋwí ikaxí eániɲípi mewegíáwa áamáyo Gorixo “Oépoi.” wimónariñípi mimiwiáikí wiarinaɲagía náni xixewisí ikaxí re uriñiniginini, “Ŋwí ikaxí eániɲípi mewegíoyíné aweyi! Soyíné amipí Gorixo ‘Ámáyo owíwapiyípoi.’ wimónariñípi miwíwapiyipa yarinaɲagía náni síá wiyi soyíné majía seaóriniárini. Soyíné kí aɲj níjía náni miriniɲiwá náni íá nixiráriro aí sewaniɲoyíné wí níkwiro mipáwipa ero áamá nipáwianiri éfáyo soyíné píri mákími wiro yarigíárini.” e nuríásáná ⁵³ aɲj e píni níwiárimí nuri emearíná re egíawixini. Ŋwí ikaxí eániɲípi mewegíáwa tñni Parisiowa tñni wigí xwioxíyo dáni ría ápiáwíniñj níweri omí sími tñni uriro amipí obaxí wí náni yariñj wiayiro neróná ⁵⁴ “O xwiýá sipí ɲwí ikaxí eániñj xixeni mimóniñj bi ráná xwirixí oumeaneyi.” niriniro aría wíaxídígíawixini.

“Naɲj ero sipí ero mepani.” uriñj nánirini.

12 ¹ Áamá oxí apixí obaxí ayá wí epíroyí niyáriróná xokirípi inaríná Jisaso xegí wiepisariñowa Parisiowa seáyi e nimóniro sipí yayiro naɲj yayiro yarigíápa awa eni e epírixiniri awami xámi re uriñiniginini, “Soyíné bisíkeriá yisí (Bisíkeriá sini siñj eɲáná yisí onimiápi tía aiwi nimini íkwiaɲwí eapinárarini.) Soyíné bisíkeriá yisí Parisiowayá náni wáyí nero emépoi. Wigí naɲj ero sipí ero yarigíápi náni searariñini.” nuriri ² awa sipí ero naɲj ero mepa oépoiɲiri re uriñiniginini, “Amipí agwi ínimi imóniñiyí ríwéná siɲáni imóniniárini. Amipí ínimi nimóniri yokwarimí iniñiyí ríwéná áamá níni níjía imónipíríárini. ³ Pí pí xwiýá áríwiyimi yumí ikaxí riníáyí eni áamá níni ikwáwiyíná aría wipíríárini. Pí pí xwiýá aɲj náyo ínimi dáni ikeagigwí riníáyí ríwéná aɲj seáyiyo niñweámáná áwanj rowiáropíríárini.” uriñiniginini.

Wáyí wipaxo nánirini.

⁴ O re uriñiniginini, “Gí níkwimixiniri emearigíoyíné, nioni re searariñini, ‘Segí waráyini seapikiarigíáwa náni wáyí mepani. Diñj eni seaxekwapaxí meɲagi náni ayí náni wáyí mepani.’ searariñini. ⁵ Áamá wáyí wipaxo náni nioni áwanj osearimini. Ayí Gorixorini. O áamáyo nipikímáná xewaniño

diñí eni niseaxekwapiri ríá aníñí wearíñíyo seaikéaáripaxí eñagi nání wáyí omini wírixini. Oyi, o nání aga wáyí wírixini.” uríñiginini. ⁶Ámá ayí diñí “Gorixo ámaéne nání anípaxí diñí moaríñirini.” oyaiwípoyniri re uríñiginini, “Ámá makeríáyo nání nuri iní siríkwá wé wú núni bí neríná nigwí ríá niñpia biaú tñi bí yarigíárini. Iní apia aga onimiápia nání aiwi Gorixo wí diñí peá nimori aríá ikeamoaríñímani. ⁷Seyíné nání eni Gorixo wí aríá ikeamoaríñímani. Segí miñíyo díá aí arari wenjýyí nání o niñfárini. Gorixoyá siñwíyo dání seyíné iní onimiápia tñi xixeni mimóniñagía nání wáyí bi mepani.” nuriri ⁸re uríñiginini, “Nioni re seararíñini, ‘Ámá go go ámáyá siñwíyo dání anani ‘Jisasomi xídaríñáonirini.’ uraríño nání ámá imóniñáoni niweapiríná o nání eni Gorixoyá aníñajýyá siñwíyo dání ‘Gí ámáorini.’ rimíárini. ⁹E neri aiwi go go ámá nání wáyí neri siñwíyo dání ‘Jisasomi muxídaríñáonirini.’ uraríño nání nioni eni Gorixoyá aníñajýyá siñwíyo dání ‘Gí ámáomani.’ rimíárini.’ seararíñini.” nuriri ¹⁰re uríñiginini, “Ámá go go ámá imóniñáoni yariñápi nání xwiýá sipí ninimeariri aiwi anani Gorixo yokwarimí wiipaxírini. E neri aiwi go go Gorixoyá kwíyí yariñápi nání ‘Ení eáníñí Setenoyá tñi yarini.’ niriri riperirí numearirínáyí, Gorixo anani yokwarimí wiipaxí menini.” nuriri ¹¹⁻¹²re uríñiginini, “Ámá wí íá niseaxero rotú aníyorani, gapímanowa tñí erani, áminá neameñweagíáwa tñí erani, nimeámi niseaurónáyí, ‘Arige xwiýá wákwínanfwiní?’ miyaiwipa nero ayá síwí mīsearopa éfrixini. Ayí ripi nánirini. Sa axíná Gorixoyá kwíyípi xwiýá soyíné uripírípi seaíwapiyini eñagi nání wáyí mepa éfrixini.” uríñiginini.

Ewayí ikaxí amipí mimúróniñí wo nánirini.

¹³Ámá e epíroyí egíáyí wo Jisasomi re uríñiginini, “Nearéwapiyarínoxini, amipí ápo niperíná nitimi péipi gí ráro xegípi íkwínaroaríñagi nání ‘Dixí rigwáo tñi pírániñí yaní menípiyi.’ urei.” uríagi aí ¹⁴o re uríñiginini, “Ámáoxini, ámáyo xwirixí méwiniginiri go nirípeáfrini? Go awagwíyá amipí yaní oeameiniri nirípeáagi nání niraríñini?” omi e nurimáná ¹⁵ámá niyoni re uríñiginini, “Segí iyá íá amipí diñí niyimiñí imóniñápi seaipapaxí menini. Xwé ayá wí tñoxi aiwi wí diñí niyimiñí imóniñápi siapapaxí menini. Ayínáni amipí naní siñwí íwí niwiniríná ‘Nioni meapaxírini.’ yaiwiarigíápi nipini eni nání wáyí oseainini. Seyíné iyá íá amipí nánini diñí íkwíropfrixiniri seararíñini.” nuriri ¹⁶ewayí xwiýá ripi uríñiginini, “Ámá amipí mimúróniñí woyá omiñíyo wítí aiwá xwé píripírí iníñagi niwiniri ¹⁷diñí neyírori re yaiwíñiginini, ‘Ari eminiréini? Aiwá píripírí iníñí tí timi nání gí aní apáni menini.’ niyaiwiri ¹⁸re riniñiginini, ‘Re oemini. Aní aiwá nání miriniñíyí emi pipinamí niyárimáná ámi aga xwé wiwi wiwá nimira numáná gí wítí aiwá nání tñi amipí nioniyá tñi aní iwiwámi nita úimigini. ¹⁹E niyárimáná niwaniñoni re ríimigini, “Gí amipí nání rixa

déroni. Aiwá xwiogwí íá ropaxí nání miwenini. Anani kikiáfá ŋweari aiwá niri iniígí niri neri yayí éimigini.” ríimigini.’ riníagi aí ²⁰Gorixo omi re uriŋinigini, ‘Majimajíá ikárinariŋí roxini, síá riyimini joxi rixa niperfíni. Nipéáná dixí amípí pírániŋí tiŋípi go meaníáriní?’ uriŋinigini.” Ayo e nuriri ²¹re uriŋinigini, “Ewayí xwiýá apí áamá Gorixo nání diŋí mimopa nero ‘Amípí xewaniŋoni nígí wíni wíni nimeayiri otimini.’ yaiwiarigíáyí nánirini. Ámá e yarigíáyí amípí wí mimúroniŋagi aiwí Gorixoyá siŋwíyo dání uyípeayí imónarigíáyíriní.” uriŋinigini.

Aiwá t́ni aikí t́ni nání ududí winariŋí nání uréwapiyíŋí nánirini.

²²O xegí wiepisariŋíyo re uriŋinigini, “Ámá e yarigíáyí amípí wí mimúronagi aiwí Gorixoyá siŋwíyo dání uyípeayí imónarigíáyí eŋagi nání re searariŋini, “‘Arige pírániŋí ŋweaniréwini?’ niriro aiwá nipíri nání ududí mepa ero waráyo aikí yínipíri nání ududí mepa ero érixini.’ searariŋini. ²³Ayí ripi nánirini. Segí wára jíayí aikíyo múronini. Diŋí jíayí eni aiwáyo múronini. ²⁴Soyíné ámi iŋí áwí nání diŋí morfíni. Iŋí awa aiwá omiŋí nero mianarigíámani. Wigí aiwá nimimi nuro aŋíyo tipíríáyí eni aŋí wí mimirinini. E neri aí Gorixonini miní wiaríŋíriní. Soyíné diŋí re riyaiwiaríŋoi, ‘Iŋíyo mimúroniŋagwí nání Gorixo none nání eni aiwá neaimixiyipaxomani.’ riyaiwiaríŋoi? Oweoi, diŋí e wí mimopa époyí. ²⁵Ámá ‘Sepiá ámi bi oimónimini.’ niyaiwiri ududí éo sepiá ámi bi imónariŋírani? Oweoi! ²⁶Soyíné eni apí aí wí mepaxí nerínáyí aikí t́ni aiwá t́ni nání pí nání ududí yariŋoi? ²⁷Soyíné adowayí nání diŋí morfíni. Niyapíríná xegí iyíá óí eari aikí yiri yariŋímani. E neri aiwí eŋíná negí mixí ináyí Soromono okiyíá niniri meáriníŋo nerínáyí adowayí yapi awiaxí e imónagímani. ²⁸Gorixo adowayí t́ni aráyo —Ará agwi eŋíyo anani niyoaro síá wiyimi ríá ikeááripíríáyíriní.” uriŋinigini. Awa “Gorixo ará nání ayá síwí muroarinini.” oyaiwípoyniri e nuriri re uriŋinigini, “Gorixo adowayí t́ni aráyo okiyíániŋí yariŋagi nání soyíné eni aŋipaxí aikí e seayíriniáriní. ²⁹Ayináni soyíné iniígí t́ni aiwá t́ni nání ‘Pí naniréwini?’ niriro ududí néra mupa érixini. ³⁰Gorixomi mixídipa yarigíáyí apí nání aniŋí miní nero meaniro yarigíáriní. E neri aí segí ápo Gorixo soyíné apí nipini aiwáraní, aikíraní seainariŋagi nání nijáriní. ³¹Apí meaniro nání mepa ero Gorixo xíŋo xegí xwioxíyo mímeámí neri seameŋweaníŋe páwipíri nání amípí xíŋo wimónariŋípi ero nerínáyí, Gorixo anani apí nipini niseaiiniáriní.” uriŋinigini.

“E e nerínáyí, amípí naŋí wí aŋínami awíniŋí eaáraníŋoi.” uriŋí nánirini.

³²Awa xwíá t́yo niŋwearíná wigí amípí xwé meŋagi nání wáyí epírixiniri re uriŋinigini, “Seyíné sipisipí miaúrárí iniígíáyí yapi imónigíáyíné, segí ápo Gorixo xwioxíyo mímeámí neri seameŋweaníŋe

páwírixiniri wimónariŋagi náni wáyí mepa érixini. ³³Segí iyá íá amípí nigwí náni bí nero nigwí meáíáyí ámá uyípeayí imónigiáyo arirá wianiro náni mini wírixini. E nerínáyí, amípí aŋínami ayá rimixarigiápiŋiŋi tariŋoi. Aŋínami amípí wí anipá imónariŋimani. Íwí yarigiááyí wí páwipaxí mimónini. Ípikwiyí eni wí amípí xwíría ikixepaxí mimónini. Ayínáni xwía tíyo amípí wíni wíni nimeayiri mitipa neri ámáyo ayá nurimixiri arirá niwirínáyí, aŋínámini aniŋí weníe awíniŋí eaárariŋoi. ³⁴Segí amípí naŋí ayá rimixarigiápi xwía tíyo wenjánáyí, ayí xwía tíyo náni diŋí mopíríárini. Aŋínami wenjánáyí, Gorixo tíŋí e náni mopíríárini.” uriŋinigini.

Ewayí ikaxí omiŋí wiariŋiá naŋíyí nánirini.

³⁵⁻³⁶O gí wiepisariŋáyí wé niróniro ŋweárixiniri ewayí xwiyá re uriŋinigini, “Ámá xináíwániŋí nimóniro omiŋí wiariŋiáwa wígí boso náni ‘Aiwá apixí meánini náni imixarigiápi gíná píni niwíarimi binirfeniŋoi?’ niyaiwiro rapirapí íriŋíyo kíkiyinigú níkíroro nípimoániro arerixí niyíniro uyíwí nimixároro o nirémori wáí e dáni wakwí óráná apaxí mé ówaŋí íkwianeyiniro xwayí naniri ŋweaarigiápa seyíné eni e érixini. ³⁷Boso nirémori omiŋí wiariŋiáwa sá miwé wé niróniro ŋweaŋagía niwinirínáyí, awa yayí winipaxírini. ‘Boso omiŋí wiariŋiáwa wé niróniro ŋweaŋagía niwiniri xewanigo rapirapí níkírori arerixí niyíniri ‘Aiwá narigé éí ŋweápoi.’ nuriri aiwá mini niwía uniŋoi.’ searariŋini. ³⁸O áriwegíyorani, isíáyorani, nirémori xegí omiŋí wiariŋiáwa sini wé niróniro ŋweaŋagía niwinirínáyí, awa yayí winipaxírini.” uriŋinigini. ³⁹Ewayí xwiyá ámi bí nuriri re uriŋinigini, “Rípi eni náni diŋí mópoi. Aŋí iwámi xiáwo íwí meani bino náni ‘Sía riyimi binigo.’ niyaiwiri siŋwiriáyí, awí niŋweari íwí meano opáwiniri siŋwí miwinipa eminiri eŋírini.” nuriri ⁴⁰re uriŋinigini, “Seyíné eni wé niróniro ŋwearíni. Sía ámá imóniŋáoni náni ‘O niweapinimenigo.’ yaiwíáyimi niweapimíárini.” uriŋinigini.

Ewayí ikaxí bosíwo nánirini.

⁴¹Pitao re uriŋinigini, “Ámináoxini, ewayí xwiyá api rariŋipi nearéwapiyariŋoneni náni rirariŋini? Ámá niyoní eni náni rirariŋini?” uríagi ⁴²Jisaso ámi ewayí ikaxí urimíniri náni yariŋí re wiŋinigini, “Omiŋí wiariŋí wo xegí bosoyá xwiyá aría niwiri diŋí neŋwiperi nerínáyí arige imónini? O re imónini. O omiŋí rípi náni bosíwo oimóniri xegí boso rípeaŋorini. O xegí bosoyá omiŋí wiariŋiáyo umeiri aiwá yaŋí umeiri yariŋorini. ⁴³Boso ami dáni nibiri xegí bosíwo xámi yagípa sini axípi pírániŋí yariŋagi niwiniríná bosíwo yayí winipaxírini. ⁴⁴Nepa searariŋini. O pírániŋí yariŋagi niwiniríná xegí omiŋí níni eni onimeiniri rípeaníárini. ⁴⁵E neri aiwi bosíwí axo ‘Gí boso yapapáni

binimeniŋoi.’ niyaiwiri omiŋí wiariŋíáwami t́ni omiŋí wiariŋíáwami t́ni iwanj́ niméperi aiwá niri iniŋí niri nemáná papikí nerínáyí 46 ‘Boso nibinimeniŋoi.’ niyaiwiri yariŋíyimi síá xío biniyimi majíá nimóniri yariŋíyimi boso rixa nírémónapiri re enfárini. Bosiwomi miŋí niwákwiri áamá arfki yariŋíáyí t́ni wáriníárini. 47 Bosiwí go go xegí boso wimónariŋípi náni nijíá nimóniri aiwi pírániŋí mimixipa neri wé níróniri miŋweapa nerínáyí boso nibiríná iwanj́ ripi ripi eámeámí eaayiníárini. 48 E neri aiwi bosiwí go go xegí boso wimónariŋípi náni nijíá mimónipa neri sipí o iwanj́ eapaxí bi nimixirínáyí, boso nibiríná iwanj́ onimiápi weaaníárini. Áamá ńni amipí xwé wí wíáyí ríwéná ayí eni xwé urápipíríárini. Gorixo eni áamá gomi xegí omiŋí wiini uriŋíyí náni ríwéná yariŋí re winíárini, ‘Omiŋí nioni siapíŋáyí xixeni eŋírani?’ uriníárini.” Jisaso xegí wiewisariŋíyí xío miŋweaŋáná úrapí néra upírixiniri diŋí mófrixiniri ewayí xwiyíá api uriŋinigini.

“Áamá xepixepá rónipíríá náni biŋáonirini.” uriŋí nánirini.

49 O re riŋinigini, “Nioni áamá xwíá tíyo ŋweagiáyo xeaniŋí Gorixoyá ríaniŋí wikeaárimfa náni biŋáonirini. ‘Xeaniŋí api ápiáwíniŋí rixa wémíniri neri siŋwiriyí, ayí naŋíriní.’ nimónarini. 50 E neri aiwi xeaniŋí áamá iniŋí waxí márómíniríníŋí yariŋípi nioni nímeanfárini. Sini minímeapa eŋagi náni diŋí ríá nixearini.” Jisaso xíomi pikipíríá eŋagi náni e nuriri 51 re uriŋinigini, “Nioni náni ‘O áamá niyoni piyíá wírímíániri biŋorini.’ riniaiwariŋoi? Oweoi! Áamá nioni diŋí ninikwíro ro yariŋíáyí t́ni uyíníŋí yariŋíáyí t́ni xepixepá rónífrixiniri biŋáonirini. 52 Ríná dáni ná ríwíyo eni aŋí ná wiwámi dáni áamá wé wú axíyí imóniŋagi aiwi xwiyíá nioniyápimi dáni xepixepá níróniro midáni waú imóniŋáná midáni waú wo imóniníárini. 53 Xano t́ni xewaxo t́ni xepixepá róniri xináí t́ni xemiáí t́ni xepixepá róniri xiáí t́ni xewaxomi xiepí t́ni xepixepá róniri néra upíríárini.” uriŋinigini.

Símimajíóniŋí imóniŋípi náni uriŋí nánirini.

54 O áamá oxí apixí e epíroyí egiáyo re uriŋinigini, “Seyíné sogwí wearíŋími dáni agwí yapariŋagi niwíniríná ‘Rixa iniá yaparini.’ rariŋíápa nepa eaariŋíriní. 55 Imiŋí dami dáni eni bariŋagi niwíniríná ‘Agwí ríná ríá síniniŋoi.’ rariŋíápa nepa ríá sínariŋíriní. 56 Naŋí riro sipí riro yariŋíoyíné, agwí tiri imiŋí eri yariŋagi niwíniríná anani ‘E imóniniŋoi.’ xixeni rariŋíá aiwi amipí nioni símimajíóniŋí imixariŋápi siŋwí ninaniro ‘Ayí Gorixo ripi náni siwá ríá neaiarini?’ miyaiwariŋíáyínéxini.

Ewayí ikaxí áamá xwiyíá rimearino nánirini.

57 “Sewaniŋoyíné amipí sipí imóniŋíyí naŋíni eyeyírómí eríini.” nuriri 58 ewayí xwiyíá ripi uriŋinigini, “Áamá wo omi xwiyíá omeariníni joxi

tíni xwirixí yaniri sirimeááná sini óí e nuríná o tíni xwiýíá nimixiniri omi pírániñí piyíá wíríríni. E miwipa nerínáyí, o xwirixí meariño tíñj e nání íá níríxémi nuri xwirixí niriméisáná enjáná xwirixí meariño joxi íá níríxiriri porisí womi mini wíáná o gwí anjyo riñwiráriníñoi. ⁵⁹Joxi nigwí yoparípi niroari nroyáronirínáyí, gwí anjyo dání nipeyearfíni. ‘E mepa nerínáyí, aniñj e ñwearíáriní.’ searariñini.” Jisaso ayí “Xwirixí meariño Gorixoríani?” yaiwiro síá o ámá niyoni mí ómómiximí eníáyí sini mimóniñáná “Nene diñj niyaikirorane omi diñj owikwíroaneyi.” yaiwiro oépoýiniri ewayí xwiýíá e uriñinigini.

“Nisaniro mepa nerónáyí, nikeamónipíríáriní.” uriñj nánirini.

13 ¹Jisaso ámá e epíroyí egíáyo sini uréwapiyaríná ámá wí niwiápinimearo áwanj re urigíawixini, “Émáý gapimaní Pairato porisí wami urowáraná awa anj Gorixo nání ridiyowá yarigíwámi nuro ámá Gariri piropenisíyo dánj wí ridiyowá yaríná pípiquími egíawixini.” uríagía ²o re uriñinigini, “Seyíne ‘Gariri dánj ayí rikikiríó néra nuróná ámá niyoni múróniñgía enagi nání e pikigíawixini.’ riyaiwariñoi? ³Oweoi, seyíne íwí yarigíáyí ríwímini nimamoro misanipa nerínáyí, seyíne eni axípi éniñj aníni pííríáriní.’ searariñini. ⁴Ámá 18 ayí anj ripiñwíá wiwá ipí xegí yoí Siroamiyi riniñwá tíñj e nipineamioari ámá apimi píkiñyí nání seyíne re riyaiwariñoi, ‘Ámá ayí rikikiríó néra nuro ámá Jerusaremi ñweagía wíniyí niyoni seáyí e múróniñgía enagi nání anj iwá nipiérori píkiñinigini.’ riyaiwariñoi? ⁵Oweoi, seyíne íwí yarigíáyí ríwímini nimamoro misanipa nerínáyí, seyíne eni axípi éniñj aníni pííríáriní.” Ámá e epíroyí egíáyí “Xixeni e neaímeañíáriní.” oyaiwípoýiniri e uriñinigini.

Ewayí ikaxí íkíá pikína nánirini.

⁶E nuriríná ewayí xwiýíá ripi uriñinigini, “Ámá wo xegí wainí uraxí omiñyó íkíá pikí iwí nurárimáná ríwéná sogwí diminiri niñbayiri aí píá meginayiniñinigini. ⁷Píá nimeginayiri nání xegí omiñj ayí wíariñomi re uriñinigini, ‘Íkíá rina xwiogwí waú womi nioni sogwí nání niñbiri píá meginayíáriní. Ná miweariñína íkwapiñj meaarini. Emi rómoárei.’ uráná ⁸o re uriñinigini, ‘Ámináoxini, ámi xwiogwí ro xe opweni. Ná weni nání pípiñyó ará niyárimáná xwíá piyí wiáromíni. ⁹Xwiogwí wíomi ná wéagi niwínirínáyí, ayí nañrini. Ná miweñagi niwíniríná niñrori emi móirixini.’ uriñinigini.” Jisaso ámá ayí “Nene íkíá pikí anániñj imóniñagwi nání ría neararini?” oyaiwípoýiniri ewayí ikaxí e uriñinigini.

Aniñj ríkwiniñimi nañj imixiñj nánirini.

¹⁰Jisaso sabaríá wiyimi rotú anjyo niñweámáná ámáyo uréwapiyaríná re eniñinigini. ¹¹Apixí wí —Í imíó diñj xixéroariñagi nání aniñj simixí neri

niríkwíniri emearíná xwiogwí wé wúkaú sikwí wú eǵáná ámi wíumi dǵńj wáú wo múroǵírini. Éí ropaxí wiarinǵmani. ¹²Í e ǵweaǵagi Jisaso niwíniríná “Eini.” nuriri re urinǵinigi, “Ineyi, simixí siarinǵipi rixa píní riwiarinǵoi.” nuriri ¹³wé seáyi e ikwiaráná re eǵinigi. Í éí píraninǵi nirori Gorixomi yayí seáyi e umenǵinigi. ¹⁴E éáná rotú aǵi menǵeaǵo Jisaso Sabaríáyo apixími naǵi wimixíagi náni wikí dǵńj níwíaiwiri ámá e epíroyí eǵíáyo re urinǵinigi, “Sfá wé wíumi dǵńj wiyi omiǵi náni imónini. Sfá ayo Jisaso naǵi seaimixiníá náni biríini. Sabaríáyo mibipa eríini.” uríagi aiwi ¹⁵omi Jisaso mixí nuriri re urinǵinigi, “Naǵi eri sipí eri yariǵíoyíné, Sabaríáyo aí burimákaú tńi dogí tńi wigí aǵyo nípáwiri níkweámi iniǵi oniniri iniǵi tńi e náni niméra mupa yariǵíarani?” Ayí Sabaríáyo wigí burimákaú náni dǵńj nimoro aí ámá náni dǵńj mímooarinǵagi náni e nuriri re urinǵinigi, ¹⁶“Apixí rí Ebiríamoyá fwiáriawéyi wírini. Seteno simixí api níwiri gwíninǵi járininǵáná xwiogwí 18 múroǵírini. ‘Ími Sabaríáyo gwíninǵi níwíkweari naǵi níwímixiríná nípikwini miyarinini.’ riniaiwiarinǵoi?” uraríná ¹⁷omi wikí dǵńj wíaiwíáwa ayá wininǵinigi. Ayá winaríná ámá oxí apixí e epíroyí eǵíáyi amípí ayá riwamónipaxí Jisaso yarinǵipi náni yayí seáyimi dáni néra uǵíawixini.

Ewayí ikaxí masité siyí nánirini.

¹⁸O ámá obaxí dǵńj miwíkwíropa yarinǵagi níwiniri re ragírini, “Nioni ewayí xwiyá bi pípi niriri Gorixo xwioxíyo míméámí neri seameǵweaníapi ‘Ripíninǵi imónini.’ rimíini?” nuriri ¹⁹re urinǵinigi, “Api masité siyíninǵi —Masité aiwá xegí siyí aga onimíarini. Api masité siyíninǵi imónini. Ámá wo masité siyí nímeari xegí omiǵíyo moáráná nerápiri íká nimóniri peyíaná inǵi níbiri ápaxíyo yéwí tinǵinigi.” urinǵinigi. Ámá “Agwi Jisasomi ámá obaxí dǵńj miwíkwíropa yarinǵagi aiwi idáná obaxí dǵńj wikwíropíríarini.” oyaiwípoyiniri Jisaso e uragírini.

Ewayí ikaxí yisí nánirini.

²⁰Ewayí xwiyá axípi ámi bi re urinǵinigi, “Arige niriri Gorixo xwioxíyo míméámí neri seameǵweaníapi ‘Ripíninǵi imónini.’ rimíini?” nuriri ²¹re urinǵinigi, “Api yisíninǵi —Yisí bisíkeriá sini siǵi eǵáná bi onimíapi ínimi táná yarinǵipa nípini íkwiaǵwí eapínarinǵírini. Gorixo xwioxíyo míméámí neri seameǵweaníapi yisíninǵi imónini. Apixí wí bisíkeriá sini siǵi díramixí xwé wámi sixí ínínáná yisí bi nímeari ínimi táná nimini íkwiaǵwí eapínarinǵinigi.” uragírini.

Ewayí ikaxí ói onigíyikwi nánirini.

²²O Jerusaremi náni nuríná aǵi api apimi nuréwapiya waríná ²³ámá wo re urinǵinigi, “Ámináoxini, sfá Gorixo ámá niyoni mí ómómiximí

enáyimi o áamá womini womini neneni yeáyí neayimixemeaníáraní?” uríagi o áamá ayo re uriñinigini, ²⁴“Gorixomi ñíñí niwikwírori xídarigíápi óí onigíyikwíñíñí inini. Óí ayimi páwipíri nání aniñí miní éirixini. Áamá obaxí anani opáwianeyiniri neríná yopa meginipíríáraní.” nuriri ²⁵ewayí ikaxí re uriñinigini, “Aní xiáwo niwiápínimeari aní ówaní yáraná seyíné nibiro wáí báriwámíni nirómáná wakwí nóriri ‘Ámináoxini, aní ówaní neafkwíenapei.’ uráná re seariníáraní, ‘Nioni majíáraní. Aní gimi dájnyínéxini?’ searáná ²⁶re uraniri éíáyí ‘Joxi negí aní wáyo nirémori nene tíni nawíni aiwá tíni iniigí tíni ninirane nearéwapiyinenerini.’ uraniri éíáyí ²⁷aní xiáwo re seariníñoi, ‘Aní gimi dájnyínéxini? Nioni majíáraní.’ seariníáraní. ‘Íwí yarigíáyíné nioni píni niniwiárimí éí úpoyi.’ seariníáraní.” nuriri Gorixo aní xiáwóníñí imóniñagi nání e nuriri ²⁸re uriñinigini, “Seyíné re winipíríáraní. Segí seáwowa Ebiríamo tíni Aisako tíni Jekopo tíni awa Gorixoyá xwiýá wíá rókiamoagíáwa tíni xíoyá xwioxíyo nipáwiro ñweañagá niwiniro Gorixo ‘Segípi bíaniriwámíni ñweápoi.’ searíagi niwiniróná seyíné mañí magí níróniro ñwí piyí wírinipíríáraní. ²⁹Émáýí oxí apixí sogwí weapariñími dájnyí weapiro sogwí wearíñími dájnyí yapíro midimidájnyí eni biro nero Gorixoyá xwioxíyo nipáwiro aiwá nariñagá siñwí winipíríáraní.” nuriri ³⁰xewaniño ámi niweapiríná nání re uriñinigini, “Émáýí xámi surímá imónigíáyí xámi xámi imónipíríáraní. Xámi xámi imónigíáyíné surímá epíríáraní.” uriñinigini.

Jerusaremiyo imóniníápi nání áwaní uriñí nánirini.

³¹Jisaso xwiýá api nuríísáná eñáná Parisi wa re urémeagíawixini, “Gapimaní Xeroto ripikini nání wimónariñagi nání re píni niwiárimí ui.” uríagía ³²o re uriñinigini, “Soyíné nuro Xeroto, síwí sayíñíñí íwí yariñomi áwaní re urémeápoi, ‘Jisaso re rarini urémeápoi, ‘Nioni síá áríní wíyo imíó ñíñí xixéroariñíyí mixí umáinowárirí simixíyí píraníñí imimiximí eri nemáná omíñí (Omíñí ayí xewaniño áamá niyoni nání upeinía nánirini.) Omíñí Gorixo o éwiniginiri nirowárenapiñípi yárimíáraní.’ rarini.’ urémeápoi.” nurowárirí ³³ámá e epíroyí egíáyo xewaniño nání re uriníñinigini, “Nioni Xeroto nání wáyí mininariñagi aiwí nioni rixa úimigini. Nioni síá áríní wíyo nuri Jerusaremi rémómíáraní. Seyíné ‘Wíá rókiamoarigíá womi ami ami nipikiríná ayí nañímani. Jerusaremi nipikirínáyí ayí ananirini.’ yaiwariñagá nání wariñini.” nuriri ³⁴re uriñinigini, “Jerusaremi ñweáyíné, wíá rókiamoarigíáwami pikiro áamá Gorixo seyíné nání searowáráyo síñá tíni nearo pikiro yarigíáyíné, karíkarí xegí miá negiri xwioxíyo míméámí yariñípa nioni íníná axípi e seaiyiminíri éagi aí seyíné míseaimónarinini. ³⁵Aríá époyi. Aní Gorixo yeáyí niseayimixemearíná seyíné ñweaniri egíe rixa anipá imónigoí. Nioni siñwí minanipa néra

nuro rixa ‘Ámináo urowáráná weapínó oyá diñj tñni yayí winipaxorini.’ niriwóná ámi siñwí nanipírírini.” uriñinigini.

Sikwí minekwidoñomi nanj imixinjí nánirini.

14 ¹Sabaríá wiyimi Parisiowa wigí áminá wo Jisasomi “Yawawi nurai nioniyá añyo aiwá onaiyi.” uríagi Jisaso nipáwiri ñweañáná awa omi siñwí winaxídiñáná ²ámá wo —O xegí sikwí aninjí minekwidoáñigorini. O Jisaso yá símimañj tññimini ñweañagi Jisaso e niwíniri ³ñwí ikaxí eáñijípi mewegíawami tñni Parisiowami tñni xwiyíá bi nuriríná yariñj re wiñinigini, “Sabaráyo soyíné ámá simixí egíáyí nanj nimixirínáyí, ‘Ayí ananirini.’ riyaiwariñoi? ‘Ñwiáxini.’ riyaiwariñoi?” uríagi aí ⁴awa píné marí wimóniñagía Jisaso sikwí minekwidoñomi wé seáyi e niwkwíariri íá nixiriri nanj niwimixiri xegí añj e nání nurowárimáná ⁵awami re uriñinigini, “Soyíné woxi dixí íworani, burimákaúrani, Sabará ayo aiwi mínijwí iniigí ríwonyo piéwóná apaxí mé mimixeariñirani?” uríagi ⁶Gorixoyá ñwí ikaxí eáñijípiimi Sabaráyo ámayo arirá niwiríná nání ríwamiñj meáñijagi nání awa xwiyíá bi muripaxí wimóniñinigini.

“Símí símí e ñweañiro mimónipa érixini.” uriñj nánirini.

⁷Jisaso awa tñni aiwá niniri niñwearíná ámá aiwá nání urepeáráyí xámi símí símí e oñweañeyiniri níwapiro weniñj éagía Jisaso siñwí e niwíniri rixa nání níwapiro aiwá naríná o ewayí xwiyíá ripi uriñinigini, ⁸“Woxi woxi apixí meánini nání aiwá imixíápi nání rirepeáráná joxi nuri símí símí imóniñe miñweapa érixini. Ámá urepeárá wo joxi seáyi e rimúroño eni nibirínáyí, ⁹ámá aiwá api nání earepeárió joxi ñweañe nibiri re riniñoi, ‘Joxi ñweañj re o ñweañoi.’ riráná joxi ayá néra nuri iwiyíá jíami ñwearíarini. ‘Iwiyíá jíami ñweai.’ riripírixiniri símí símí imóniñe miñweapa érixini. ¹⁰Rirepeáráná joxi nuri iwiyíá jíe ñwearíini. Rirepeárió joxi iwimi ñweañagi niraniri re ririnigini, ‘Gí níkumixiniri emearigwíoxini, joxi nuri áwini dae ñweai.’ riráná ámá oxí apixí awí neániro joxi tñni aiwá narigíáyíyá siñwíyo dání joxi ámináoñiniñj imóniríini.” Ewayí xwiyíá api nuriri ¹¹re uriñinigini, “Ámá go go xewaniño weyí menío ríwéná Gorixo wimixáná ayá neri xwiríá nimóga uníarini. Go go weyí mimení wauní ikárinío omi Gorixo weyí umeníarini.” uriñinigini.

“Aiwá nání nurepeáriríná re érixini.” uriñj nánirini.

¹²⁻¹⁴Ámi xwiyíá ripi aiwá api nání urepeáriómi re uriñinigini, “Ámá nání aiwá riyamí nerínáyí dixí níkumixiniri emearigíáyirani, ririxímeáowarani, dixí ámá axí joxiyáyirani, ámá añj axí e dání amipí mimúrónigíáyirani, ayí ríwéná joxi eni aiwá nání rirepeáráná ayíyá eni

joxiyá nigíápa axípi nimiginiri ayo murepeáripa éirixini. Aiwá riyamí neríná áamá uyípeayíyo t́ni áamá wará minijíyo t́ni sikwí ikí egíáyo t́ni sijwí supárigíáyo t́ni nurepeárirínáyí, áamá e imónigíáyí joxi wí riyamí neri siapíxaxí meŋagi nání ríwéná áamá wé rónigíá wiápínimeááná Gorixo mí ómómiximí neríná xewanijō joxiyá nání siapíná eŋagi nání yayí seáyimi dání osinini.” uriniginini.

Ewayí ikaxí aiwá apixí meani urepeárijipi nánirini.

¹⁵ Áamá wo awa t́ni niŋwearo aiwá narigíō Jisaso e urariŋagi ariá niwiri niwiápínimeari omi re uriniginini, “Áamá Gorixoyá xwioxíyo nipáwiri niŋweari aiwá nipíríá giyí giyí anani oyá dŋí t́ni yayí winipaxíyirini.” uríagi aí ¹⁶ o ewayí ikaxí re uriniginini, “Áamá wo áamá obaxí nurepeárimáná aiwá xwé riyamí neri ¹⁷ rixa riyamí niyárisáná áamá xegí xináinijí nimóniri omijí wiariŋomi ‘Áamá nioni urepeárimenájyo “Bípoyi. Aiwá rixa riyamí inárinini.” urimeí.’ wáí uowárijagi aí ¹⁸ áamá ńni áxeŋwaríniŋí niga nuro ‘Aiwá api nání baniméwini. Baniméwini.’ nuriróná áamá xámi nuri wáí wímeáo re uriniginini, ‘Gí xwíá bi bí éáoni nuri sijwí winimi eŋagi nání aiwá nání bipaxí menini. Xe xegí kikiíá ouniri sijwí nanei.’ uráná ¹⁹ omijí wiariŋo nuri áamá ámi womi wáí wímeááná o eni re uriniginini, ‘Burimákaú omijí eníá nání wé wúkaú bí éáoni nuri waú waú maxiriní ní kumixára nuri iwamíó emi eŋagi nání aiwá nání bipaxí menini. Xe xegí kikiíá ouniri sijwí nanei.’ uráná ²⁰ o áamá ámi womi wáí wímeááná o eni re uriniginini, ‘Apixí sijí meááoni eŋagi nání bipaxímani.’ uráná ²¹ omijí wiariŋo nuri xegí boso, aiwá riyamí niyárirí ŋweaŋomi áwaŋí urémeááná wikí nóniri xegí omijí wiariŋomi re uriniginini, ‘Aŋíni nuri aŋí ripi ripimi óíyo nemi áamá uyípeayíyo t́ni wará minijíyo t́ni sikwí ikí egíáyo t́ni sijwí supárigíáyo t́ni nioniyá aŋí re nání niwirimeamemi bei.’ uowárijagi ²² o nuri xío uríipa nememi nibiri re uriniginini, ‘Bosoxini, nioni joxi nirípa néagi aiwí ikwiaŋwí wí sini anipá imónini.’ uríagi ²³ boso re uriniginini, ‘Aiwá ripi nání gí aŋí magwí epíri nuri omijí óí ami ami inijíyo nemi áamá omijí yarigíáyo mixeamei.’ uowárijagi ²⁴ o nuri xixeni éáná boso áamá aiwá nání awí eánigíáyo re uriniginini, ‘Nioni “Áamá xámi aiwá nání urepeárimenájí aiwá wí aiwí mepíríméoi.” searariŋini.’ uriniginini.” Jisaso Judayí “Nene áamá xámi aiwá nání urepeáriméyíniŋí imóniŋagwi nání ría neararini.” oyaiwípoyiniri ewayí xwíyíá api uriniginini.

“Wiepisariŋí oyáoni oimónimini.” moaríná uriŋí nánirini.

²⁵ Áamá oxí apixí epíroyí egíáyí o t́ni óíyo nuróná o níkinimóniri re uriniginini, ²⁶ “Áamá go go nioni t́ámíni nibiri ‘Wiepisariŋí oyáoni oimónimini.’ niwimónirínáyí, Jisasoni dŋí sixí niyijípi o xegí xanomí uyiŋípirani, xináími uyiŋípirani, xiepími uyiŋípirani, xegí niaíwíyo

uyiñipirani, xexirímeáyo uyiñipirani, seáyi e mimúropa nerínáyí o gí wiepisariñáyí wo imónipaxí menini. Go go Jisasoni náni ñiñ sipí wiaríñipi xewaniño ñiñ sipí yaiwinariñipimi seáyi e mimúropa nerínáyí o gí wiepisariñáyí wo imónipaxí menini. ²⁷Ámá go go nioni ninixídíríná ‘Nioni Jisasomi xídaríñagi náni ámá wí xeaniñi níkariri aiwi aniñi xídímíárini.’ miyaiwipa nerínáyí o gí wiepisariñáyí wo imónipaxímani.” nuriri ²⁸ewayí ikaxí re uriñinigini, “Seyíné woxi añi sepiá wiwá nimira opeyiminiríná xámi éi niñweámáná añi iwá miriri náni ñiñ neñwiperi ‘Nigwí arariríani?’ niyaiwiri ‘Nigwí nioniyá anani anjiwá tñi xixeniríani?’ yaiwinariñirini. ²⁹‘Nigwí arariríani?’ niriri meyiropa neri rixa siñá níkiríróa niñeyiríná nigwí anipá imóniñagi náni añi miramíxwíni niyárimi úáná ámá añi iwámi niwiniríná joxi náni ripirirí niyayiro ³⁰re ripíríárini, ‘Ámá ro añi iwá miriminiri éi aiwi niwáni miripaxí miwimóníagi nimiramíxwínárimi uñirini.’ ripíríárini.” nuriri Jisaso ámá nioni níxídarigíáyí añi miramíxwíni neróniñi nioni píni niniwíárimi upírixiniri e uriñinigini. ³¹Ewayí xwiýá axípi ámi bi re uriñinigini, “Mixí ináyí wo xegí simiñi wínarigíáyí ámá níni 10,000 imóniñáná mixí ináyí jfami dáñoyá simiñi wínarigíáyí ámá 20,000 imóniñagi náni o xámi éi niñweari ñiñ niyaikirori ‘Mixí niniróná anani xopirárí wiminiréini? Eñi miwíñipa eminiréini?’ yaiwiniñoi. ³²Rixa ‘Mixí ináyo xopirárí niniñoi.’ niyaiwirínáyí wfo sini ná jfami ñweañáná xegí ámá wíyo re uowárinñoi, ‘Nuro omi re urémeápoyi, “Negí mixí ináyo re rarini urémeápoyi, ‘None soyíné tñi mixí xixe seaipaxí menini. Pí pí nearíyí niyaníwáriní rarini.’ urémeápoyi.’ uowárinñoi.” Jisaso ewayí xwiýá e nuriri ³³“Seyíné woxi dixí iyá íá amipí náni ñiñ yaíkiá mimopa nerínáyí ayí gí siepisariñáoxi imóniríméini.” nuriri ³⁴re uriñinigini, “Ayináni saxí awíi yariñi aiwi awíi yariñipi anipá neri aiwániñi imóniñáná ámi arige éáná awíi eniñoi? Oweoi. ³⁵Sikí amipí omiñíyo aiwá xwé oeniri wiároarigía aiwi saxí awíi anipá imónáná aiwá urí eniginiri omiñíyo wiáropaxí menini. Aniñini emi moarigíárini. Ámá giyíné aría tígíáyíné aría ókiarí nimónípoyi.” Jisaso xegí wiepisariñáyí saxíniñi imóniñagi náni e uriñinigini.

Ewayí ikaxí sipisipi anía imóniño nánirini.

15 ¹Ámá takisí náni nigwí uráparigía —Ayí émáyí gapimanowami wipíría náni wigí Judayo nigwí niwurápiyiróná wigí meapíría náni eni ámi bi íwí uráparigíáyirini. Ayí tñi íwí yarigía wíniyí tñi Jisasomi xwiýá aría waniro náni añwi e bariñagía ²Parisiowa tñi ñwi ikaxí eániñipi mewegíáwa tñi siñwí e niwiniro mepí “Iyí tinariñoi.” niriniro wigípi re rinigíawixini, “Ámá o íwí yarigíáyo nimíminiri aiwá nawíni eni narigíárini.” rinaríná ³Jisaso ewayí xwiýá ripi uriñinigini, ⁴“Soyíné ámá woxi sipisipi 100 tñoxi wo anía imónánáyí, amí eañíyo

dáni sipisipí 99 wíniyí e niwárimoxi nuri anía imónío náni píá néra núsáná rixa winimeariárini. ⁵Niwinimearíná nimeari yayí tñni xwanjwí níkwónimi nuri ⁶anjí e niremoríná dixí nikumixiniri emearigiáyo tñni áamá anjé axí e njeagiáyo tñni ráiwá re urimeriárini, ‘Gí sipisipí anía imónío rixa píá neri meáagi náni nioni tñni nawíni yayí oyaneyi.’ uririárini.” Jisaso áamá íwí yarijá o tñmíni barigiáyí sipisipí anía imónío yapi imóniagá náni ewayí xwiyá api nuriri ⁷re uriñinigini, “Nioni re searariñini, ‘Áamá sipisipí náni píá neri nimeari náni yayí éipa anjajowa áamá íwí yariñí wo nisaniri yariñagi niwiniróná yayí nero aí áamá 99 “Rixa wé róniñwaénerini. Nene saniñí imónipaxí menini.” yaiwinarigiáyí náni anjajowa yayí yarijámani.’ searariñini.” uriñinigini.

Ewayí ikaxí nigwí anía imóniño nánirini.

⁸Ámi ewayí xwiyá axípi bi ripi uriñinigini, “Apixí wí nigwí wé wúkaú tñní nigwí wo nimiáperiñáyí uyíwí nimixároárimáná pírániñí píá neri anjé síyí niperi winimeariñinigini. ⁹Niwinimearíná xegí imániñí yarijáwami tñni anjé axí e njeagiáyo tñni ráiwá re uriñinigini, ‘Nigwí níni miápéao rixa meáagi náni níni tñni nawíni yayí oyaneyi.’ uriñinigini.” Jisaso áamá íwí yarijá o tñmíni barigiáyí nigwí miápéí yapi imóniagá náni ewayí xwiyá api nuriri ¹⁰re uriñinigini, “Nioni re searariñini, ‘Nigwí apixí nimiáperi píá neri ámi meáo náníniñí yayí éipa Gorixoyá anjajowa áamá íwí yariñí wo nisaniri yariñagi niwiniríná yayí e yarijáriñini.’ searariñini.” uriñinigini.

Ewayí ikaxí niaíwí aníniño nánirini.

¹¹E nurimáná ámi ewayí xwiyá re uriñinigini, “Áamá wo xegí niaíwí oxí waú tñño ¹²—Xogwáo xanomi niwiápinimeari re uriñinigini, ‘Ápe, joxi nipéáná “Amipí omi wíimigini.” yaiwariñipi rixa niapei.’ uríagi xano ‘Amipí ríwéná yanjé nimeri nioni wíimigini.’ yaiwariñiyí rixa awaúmi yanjé numeiri míni niwimáná enjáná ¹³rixá síá áríní óráná xogwáo o xegíni awí eámeámí neri nimeámi anjé wími ná jíami náni nuri anjé ayo niñwearíná uyíni neri xegí nigwí amipí xano wiñiyí xwirixwiríá ikixenigini. ¹⁴Xegí nigwí xwirixwiríá nikixeri áamáyo niwiememáná enjáná re enjiniñini. Áamá anjé ayo dánjé aiwá náni díwí nikeamóniro yariñá o rixa uyípeayo imóníni enjagi náni o eni aiwá náni díwí nikeamóniri náni ¹⁵nuri áamá anjé ayo dánjé womi nigwí omiñí náni rixiñí uríagi o omiñí Judayí níni xwiríá winariñipi náni re uriñinigini, ‘Gí omiñíyo náni nuri gí odipíyo aiwá niwíi.’ uríagi ¹⁶o nuri omiñí e neríná rixa agwí enjé miwínariñagi aiwá píá odipí nariñipi nipaxí wimóniagi aiwi áamá wí omi aiwá bi míni miwigíawixini. ¹⁷E enjáná o ámi diñjé íá nixiriri re yaiwiñinigini, ‘Gí ápoyá omiñí wiariñiyí níni aiwá apáni nipíri náni múroniñagi aiwi nioni re niñweari aiwá agwí náni nipéminiri

riyariŋini? ¹⁸Nioni niwiápínimeámi nuri gí ápomí re urémeáimigini, “Ápe, nioni íwí Gorixomí wikáriri joxi sikáriri éanigini. ¹⁹Nioni nanj mimóniŋagi náni sini dixí riwaxoni imónipaxí menini. Joxi ‘Gí omiŋj niariŋoxiniŋí imóniŋoxini.’ nirei.” Ápomí e urémeáimigini.’ niyaiwiri ²⁰niwiápínimeámi xano tŋj e náni nuri nuri rixa aŋwí e báná xano xegí xewaxo jiiwo bariŋagi niwiniri wá niwianiri mírí nuri nimakíkiyiri kíyí miaúnáná ²¹xewaxo re uriŋinigini, ‘Ápoxini, nioni Gorixomí íwí wikáriri joxi sikáriri eŋárini. Nioni ámá nanj mimóniŋagi náni sini dixí riwaxoni imónipaxí menini.’ uríagi aiwi ²²xano omiŋj wiariŋíáyo ríaiwá re uriŋinigini, ‘Soyíné rapirapí imiriŋí mimóniŋú aŋíni nimeámi nibiri uyírípoyi. Omi okiyá numeríná wé ramaxí wá wéyo uyíráriro sikwí sú uyíríro époyi. ²³E nemáná burimákaú sipikí ikwaní imónariŋo nimeámi nibiro pikípoyi. Nene ninirane íwo náni yayí oyaneyi. ²⁴Nigí íwí ro peŋóniŋí imóniŋo ámíniŋí wiápínimeañoi. “Aníniŋinigini.” yaiwiagwá ro ámi neaímeáagi náni yayí yani aiwá oimixaneyi.’ uríagi awa o urípa nero rixa aiwá riyamí nero yayí seáyimi dání néra waríná re eŋinigini. ²⁵Xewaxo xámiŋo omiŋíyo yariŋími dání nibiri rixa aŋj tŋj e aŋwí e dání weníŋí éiyí winiŋinigini. Soŋj riro siminiŋí ero yariŋagía niwiniri ²⁶omiŋj wiariŋíá womi ríaiwá nuriri o rixa aŋwí e báná re uriŋinigini, ‘Ayí pí náni neri rariŋoi?’ uráná ²⁷o re uriŋinigini, ‘Dixí rigwáo rixa rémónapiŋoi. O ríniŋí wí mimeá nano emeago dixí ápomí wímeáagi náni o burimákaú sipikí ikwaní imónariŋo pikíŋoi.’ uráná ²⁸o wikí nóniri mipáwipaxí niwimóniri wáf e roŋáná xano nipeyeari piyipiýí xwiýá uríagi aiwi ²⁹xanomi mixí nuriri re uriŋinigini, ‘Nioni rináíníniŋí nimóniri omiŋj siaríná xwiogwí obaxí nimúroaríná sekaxí amípí joxi níríyí náni nioni wí miriwiákiŋárini. E neri aí nioni gí nikumixiniri emeariŋáyí tni yayí yani náni memé miá aí wo miniapiŋírini. ³⁰Nioni miniapiŋa neri aiwi dixí riwaxo, apíxí iyí ede dání oikixearigíwa tni nemeríná dixí nigwí xwé nowáriŋo náni burimákaú sipikí ikwaní imónariŋo apáni upikiíni.’ uráná ³¹xano re uriŋinigini, ‘Gí íwoxini, “Nioniýáyí wí ámi o nírápíníárini.” miyaiwipani. Joxi íníná nioni tni ŋweariŋoxi amípí áponiyáyí níni dixínirini. ³²E neri aí dixí rigwáo peŋóniŋí imóniŋo ámíniŋí wiápínimeañoi. “Aníniŋinigini.” yaiwiagwáo ámi neaímeáagi náni “Yayí mepa oyaneyi.” risimónarini? Oweoi, xe yayí oyaneyi.’ uriŋinigini.” Jisaso Parisiowa “None xiráxogwáowaú xiráóniŋí imóniŋagwi náni ría neararini?” oyaiwípoyniri náni ewayí xwiýá api uriŋinigini.

Ewayí ikaxí bosiwí diŋí émi saímí moŋo nánirini.

16 ¹O ewayí xwiýá ripi eni xegí wiepisariŋowami nuriri re uriŋinigini, “Ámá amípí níni mimúroniŋí wo o xegí bosíwo náni ámá wí nibiro áwaŋj re urigíawixini, ‘Dixí bosíwo dixí iyíá íá amípí

xwiríá ikixearini.’ uríagía ² o bosíwo nání ‘Obini.’ nuriri o ríxa báná re uríñiginini, ‘Pí éagi nání joxi nání xwíyíá wí rariñagía wíaniginini? Amipí nioniyá joxi ninimeiríná aríge ninimeia wariñini? Amipí nioniyá píni niníwiárimí uri nání nání íá nírori bikwíyo niñwiráriri niapei. Joxi sini gí bosiwí nimóniri ñweariméini.’ uríagi ³ bosíwo nuri re yaiwiñiginini, ‘Nioni bosiwí roariñáyí boso “Joxi kikiíá ui.” níránáyí ari emíárfani? Bosiwí nimóniri yariñáoni xwíá nimiríná ení meání emíárfani? Rixiñí nura nuríná ayá niníníárfani?’ niyaiwiri ⁴ re yaiwiñiginini, ‘Ai, pí pí éimiginiri ríxa niñíá imóniñini. Gí boso “Joxi kikiíá ui.” níránáyí ámá nioni wigí añíyo nání anani nimímínipíri nání pí pí éimiginiri ríxa niñíá imóniñini.’ niyaiwiri ⁵ ámá o xegí boso nigwí wayá ríwéná niapíríxiniñi wiñíyo ‘Bípoyi.’ nuriri awa ríxa báná xámi bíomi re uríñiginini, ‘Gí boso pí siapiñí nání ríwéná rirápiníárfani?’ uríagi ⁶ re uríñiginini, ‘Werixí sixí íniñí diramixí 100 niapiñí nání xixeni axípi nírápiníárfani.’ uríagi bosíwo re uríñiginini, ‘Dixí bikwí nigwí nání ñwirárariñínami nimeari éí niñweámáná werixí sixí íniñí diramixí 100 nání eániñe níkwíriri 50 ñwirárei.’ nuriríná xífo eni bosoyá bikwíyo axípi diramixí 100 nání eániñípi níkwíriri ámi 50 ñwiráriñiginini. ⁷ Ámá ámi wo báná bosíwo yariñí re wiñiginini, ‘Gí boso joxi siapiñíyí araririni?’ uríagi o re uríñiginini, ‘O wítí íá 1000 nioni niapiñí nání xixeni axípi nírápiníárfani.’ uríagi bosíwo re uríñiginini, ‘Dixí bikwíyo wítí íá 1000 nání ñwiráriníñe níkwíriri wítí íá 800 ñwirárei.’ nuriríná bosoyá bikwíyo eni níkwíriri axípi niñwiráriri womi womi níni e néra uñiginini. ⁸ Boso xegí yapí wíwapiyariñí bosíwo nání ‘O “Nioni onímímínípoysi.” niyaiwiri e éfrini.’ rariñagía aríá e níwiri o nání ‘Díñí émi saímí moñorini.’ niyaiwiri seáyí e umeniñiginini.” Jisaso ewayí xwíyíá api nuriri wiepisariñíyo ámi bí ripi uríñiginini, “Ámá agwí ríná amipí xwíá tíyo wenípi nání díñí níkwíroo yariñíyí wigí wíniyí tíni niniróná díñí émi saímí nimoro nero nání ámá nioni díñí níkwíroo yariñíyíyo seáyí e imóniñoi. ⁹ Ayínáni re searariñini, ‘Nígwípi ámá wí api tíni sipí imixariñíá aiwi soyíné uyípeayí wí negí níkwimixiniñi emeariñwáyíniñí imónipíri nání nígwípi tíni arirá wíríxini. E nerínáyí ríwéná síá yopariyimi nígwí níni ríxa anipá imónáná Gorixo soyíné xegí añí íniñá ñwearípíriá nání eníyo páwipíriá nání seamímíniníárfani.’ searariñini. ¹⁰ Ámá omiñí onimiápiá neríná pírániñí díñí níkwíroo xixeni yariñíá giyí giyí xwé eni xixeni yariñíárfani. Ámá omiñí onimiápiá neríná díñí níkwíroo mé ámáyo síñwíyo dání níwepisiro omiñí yariñíá giyí giyí omiñí xwé nání aí axípi yariñíárfani. ¹¹ Ayínáni nígwí ámá wí nímearo ayí tíni sipí imixariñíyí soyíné nígwí ayí aí tíni ámáyo míni míwipa ero arirá míwipa ero nerínáyí ‘Gorixo anani xegí amipí nañí añínami weníyí none pírániñí umeianíwá nání neaiapiníárfani.’ riyaiwiariñoi? Oweoi. ¹² Soyíné amipí ámá woyáyí síñwí muwínaxídipa nerínáyí omiñí soyínéyápi mepíríyáyo go seaiapiníárfani?’

Oweoi. ¹³Ámá wo áamá waúyá xináíniñí nimóniri omiñí wiipaxí menini. E nerináyí wíomi diñí sixí nuyiri wíomi diñí peá nimori neri wíomi píraníñí ayá tñni nixídiri wíomi peayí niwianiri eniñoi. Soyíné nigwíyíyá omiñí wiariñíñí nimóniro ‘Nigwí wí minimúropa oeni.’ niyaiwirínáyí, Gorixoyá omiñí wiariñí woxíniñí imónipaxí menini.” uriñiginini.

Jisaso xwiýá uriñíyí wí nánirini.

¹⁴Jisaso xegí wiewisariñowami e uraríná Parisiowa —Awa nigwí nání xwapí wimónariñowarini. Awa aríá e niwiróná dami dání riperirí umeariñagía ¹⁵Jisaso e niwiniri re uriñiginini, “Soyíné ámáyá siñwíyo dání ‘Wé róniñwáonerini.’ niriyo yapí niwiewisiro rarigíoyíné aí Gorixo amipí segí xwioxíyo ínimi imóniñípi nipini nijíá imónini. Amipí nání áamá ‘Ripi ayá tñípi imónini.’ ríápiyí Gorixoyá siñwíyo dání xwiríá winariñíyí imónini. ¹⁶Gorixo Ebiríamo xíomi diñí niwikwírori píraníñí xídaríñagi nání re uriñiginini, ‘Dixí seárfawé áamá obaxí nimóga úfáyí gí ayá tñíñíñí nimóga upíríárinini.’ uriñí enagi nání Moseso tñni wíá rókiamoagíáwa tñni api nání Bikwíyo niriyo eagíárinini. Seyíné píné api nisearéwapiya bigíárinini. E neri aiwi Jono wayí nineameaia uño niremoríná xwiýá yayí seainipaxípi re searayiñiginini, ‘Seyíné Gorixoyá xwioxíyo páwipíri nání íwí yarigíápi ríwímimi nimamoro nisaniro ñweárixini.’ searayiñiginini. Ámá níní añí ayómimi enj tñni óí nimóga páwianiro yariñoi. ¹⁷E neri aiwi amipí nání Moseso tñni wíá rókiamoagíáwa tñni Gorixoyá Bikwíyo eagíápi bi onimiápi aí surímá imóniníámani. Awa niriyo eagíápa xixeni imóniníárinini. Anjina tñni xwíá rirí tñni anani anipá nimóniri aiwi Bikwí Gorixoyá ñwí ikaxí eániñípi anipá imónipaxí menini. ¹⁸Go go xegí xiepí xámi meañími emi nimori ámi wíni nimearínáyí ayí íwí inariñii. Go go apixí áamá wo nimeari emi moñími nimearínáyí ayí eni íwí inariñii.” uriñiginini.

Rasaraso tñni amipí mimúróniño tñni nánirini.

¹⁹Jisaso áamá ayo re uriñiginini, “Ámá wo amipí mimúróniño —O nigwí xwé tígíáwa rapirapí awíaxíni yínarigíápa íníná rapirapí ayíá riñíni niyíniri síá ayí ayo aiwá nañíni niniri aníñí sirí muní ñweañáná ²⁰ámá wa wigí áamá wo xegí yoí Rasarasoyi riníño —O uyípeayí imóniñáná uraní xegí wí pipírímíó enorini. Omi nimeámi niñiro amipí mimúróniñoayá ákiñá íwí e wírárigíorini. ²¹Amipí mimúróniño íkwiañwíyo éí niñweari aiwá niniri yunípia piéroríyí uraní tñño ‘Mimeání oemini.’ niyaiwiri yaríná síwí wí niñbayiro xegí uraníyo aífí meayigíawixini. ²²Uyípeayo rixa nipéagi añínají Gorixoyáyí oyá diñípi nimeámi niñiro Ebiríamo tññí e wárigíawixini. Amipí mimúróniño eni péagi omi eni xwíá niweyárimáná enáná ²³o ríá aníñí wearíñíyo dání ríniñí xáíwí inaríná siñwí anaúyí winiñiginini. Ebiríamo ná jíami

ηweaηaná Rasaraso xío tíámíni kinimónénapíηagi niwiniri ²⁴ráiawá re uríηinigini, ‘Arío Ebiríame, ría tí mimeníηwí ayíkwí minirarinini. Rasarasomi re urowárenapei, “Wé símípini iníηíyo igiá neámáná aíwi imíηí uríni nání wikwiárai.” urowárenapei.’ uríagi aí ²⁵Ebiríamo re uríηinigini, ‘Aríoe, joxi sini siηoxi ηíηwearíná amípí naηíni símeari Rasarasomi sipíni wímeari yagírini. E neri aiwi agwi o sa kikiá yaríná joxi ríniηí nání niwieániri ηweaηini. ²⁶Ripi eni píηí earíri segí tíámíni eadírori negí tíámíni eadírori ηjagi nání seyíne wí nene tíámíni mixemónapíxírini. Nene eni wí seyíne tíámíni mixemónapíxírini.’ uríagi ²⁷ría xáiwí weánariηo re uríηinigini, ‘Nioni tíámíni Rasarasomi re nání urowárenapíxá mepa eηánáyí, wauní rixíηí re oririmini, “Gí ápoyá aηímíni urowárei.” oririmini. ²⁸Gí níríxímeáowa wé bi nípini imóníηíáwa nioni ríniηí meariηá rími dání bipíríxiniri Rasaraso xwiyíá níηiá wino urowárei.’ uríagi aiwi ²⁹Ebiríamo re uríηinigini, ‘Awa ríwamíηí Moseso níriri eaηí tñi wía rókiamoagiáwa níriro eagíá tñi anani íá níroo níηiá imónipaxírini. Xwiyíá api riniηípimi anani aría wíríxinini.’ uríagi aí ³⁰ría xáiwí weánariηo re uríηinigini, ‘Arío Ebiríame, xwiyíá apimi aría umónipaxí meηagi nání rirariηini. Ámá piyí wo níwiápínimeari níηiá wíánáyí, anani aría níwiro nisaníro ηweapaxírini.’ uríagi aí ³¹o re uríηinigini, ‘Xwiyíá Moseso níriri eaηípi tñi wía rókiamoagiáwa níriro eagíápi tñi aría mumónipa nerónáyí, ámá piyí wo níwiápínimeari níηiá wimíniri yariηagi aí ayí aría wí wíxaxí menini.’ uríηinigini.” Jisaso xwiyíá api e uríηinigini.

Íwí oépyiniri wíwapiyarigíáyí nání uríηí nánirini.

17 ¹O xegí wiepisariηowami re uríηinigini, “Ámá wí wí íwí oépyiniri iwamíó níwíwapiyipíría aiwi ámá e wíwapiyíáyí aweyí! Síá wíyi ayí majiá wóriniárini. Ayí xeaníηí ría tñí wímeaniá eηagi nání dñí sipí wíwinigini. ²Ayí niaíwí rípiami nioni dñí níkwíroaníro yariηíapiami píri wiaíkiaríro nero íwí oépyiniri wíwapiyaríná Gorixo ‘Ayí xwiyíá mayírini.’ mirí ríxa nípémáná eηáná ríniηí xwé winiárini. Sini niaíwípiami íwí nání miwiepisipa eηáná ámá wa ayo íá níxero síηá xwé wo siηwí tñi gwí níjáriro rawírawáyo nímamówarírínáyí, sipí eηagi aiwi ríniηí Gorixo wimíniri eηípíniηí imóniηímani. ³Ayináni pírániηí éfírixini.

Íwí sípi yokwarimí níwiiríná epaxípi nánirini.

“Joxi ámá wo, Gorixomi níxídiri nání ríríxímeá imóniηo íwí síánáyí míxí urírixini. O ríxa dñí neyírori nisaniri nerínáyí íwí sípi yokwarimí níwiiri ‘Ananirini.’ urírixini. ⁴O íwí nisiri piaxí weánariηagi nání níbiri ‘Ríxa dñí neyírori íwí ámi wíni simiámani.’ rírímeááná joxi yokwarimí níwiiri ‘Ananirini.’ urírixini. Síá axíyimi o sípa axípi wé wíúmi dñí

waú rirémeaayíánáyí, joxi eni yokwarimí wiayíirixini.” uríagi ⁵ wáí wurimearigíáwa Ámináomi re urigíawixini, “Joxi diñí rikwíroariñwáyí ámi bí diñí rikwíroani náni neaiii.” uríagiá ⁶ Jisaso re uriñinigini, “Soyíné niñfáriní. Masité aiwá siyí negí omiñíyo iwí urariñwáyí aga onimíapia neri aiwi segí diñí nioni náni nikwíroarigíáyí ayíniní nerínáyí, ‘Íkíá xé roxini niyoámiga rawirawáyo e dáni roi.’ uránáyí anani arfániní seainfáriní. Amipí ‘Nioni epaxímani.’ yaiwiarigíá aí anani epírfáriní.

Ewayí ikaxí omiñí wiariñigíáyí nánirini.

⁷“E neri aí soyíné woxi dixí rináiníñí nimóniri omiñí siariñí wo xwíá nimiri yuní ikikémí yariñe dánirani, sipisipí píraníñí niméra wariñe dánirani, píni niwiárimí nibiri rémónapáná joxi ‘Ayá tñi añini nwiapiri niñweari aiwá nei.’ uriréini? Oweoi, o sa dixí rináiníñí omiñí siariño eñagi náni ⁸ xámi re uriríni, ‘Amíná aiwá ríá niniyeairi dixí rapirapí níkfíyininimáná aiwá nixeri niapáná nioni iniñgí niri aiwá niri nemáná eñáná joxi ríwíyo niríni.’ uriríni. ⁹O joxi sekaxí uríñpi tñi xixeni sífáná omi weyí umeriréini? Oweoi, dixí omiñí siariño eñagi náni yayí wiriméini.” Jisaso ewayí xwíyíá api nuriri ¹⁰ re uriñinigini, “Gí sealepísariñáoyíné eni sekaxí amipí nioni searfáyí xixeni nerínáyí seáyi e mimónipa nero re rírixini, ‘None xináíwanéniñí nimónirane oyá omiñí wiariñwáonénirini. Omiñí negíni nearíyíni eñwáriní.’ rírixini.” uriñinigini.

Peyíyí tígíá wé wúkaú nañí imixiñí nánirini.

¹¹ Jisaso Jerusaremi náni nuri Gariri piropenisí tñi Samaria piropenisí tñi midimidáni eñáná o áwinimani nipuríná ¹² añí bimi rémóaná ámá wé wúkaú peyíyí tígíáwa ná jíami nirómáná ¹³ ríaiwá re urigíawixini, “Jisaxoxi, negí neamemeariñoxini, none náni wá orunini.” uríagiá ¹⁴ o siñwí niwiniríná re uriñinigini, “Soyíné nuro apaxípániñí imónigíáwami siwá winaúpoyi.” uríagiá awa sini óí e waríná re eñinigini. Wigí wará nañí imóniñinigini. ¹⁵ Nañí imónáná awa wo weniñí iníyí winiñinigini. Xegí wará nañí imóniñagi niwiniri níkinimónimi nuri Gorixomi yayí numeríná ríaiwániñí nira nuri ¹⁶ Jisasoyá síkwí tñí e nípkínimeari omi yayí winiñinigini. Ámá oyí Samariayí worini. ¹⁷ O yayí wiaríná Jisaso ámá e rówapigíáyo re uriñinigini, “Ámá wé wúkaú nañí imóníawixini. Wía gimínirini? ¹⁸ Pí náni ámá añí midání roni Gorixomi yayí umemíniri biñoi? Wía Judayowa ámi mibipa pí náni éoi?” nuriri ¹⁹ Samariaomi re urowáriníñinigini, “Niwiápínimeámi ui. Joxi diñí ninikwíroriñípimi dáni eríkiemeáníni.” urowáriníñinigini.

“Gíná Gorixo xwioxíyo mimeámí neri neameñweaníriní?” urigíá nánirini.

²⁰ Parisiowa “Gorixoyá diñí tñi ámá nene yeáyí neayimixemeanía náni gíná aríowayá xwíá piaxíyo dáni iwiaronírfáni?” niyiwiro Jisasomi

yariŋí re wigíawixini, “Gorixo xwioxíyo mimeámí neri neameŋweaníápi gíná imóniníáriní?” Yariŋí e wíagía náni o re uriŋiniginí, “Símimajíóniŋí seainaríná siŋwí niwiniro re ripíríámani, ‘Gorixo xwioxíyo mimeámí neri neameŋweaníápi rixa ríyírini.’ ripíríámani.” nuriri ²¹ “Ámá Gorixoyá diŋí t́ni yeáyí neayimixemeanía náni aríowayá xwíá piaxíyo d́ani iwiaronífoyi rariŋwáo negí t́ni áwinimi re riwo rironi?” oyaiwípoyiniri re uriŋiniginí, “Wí re ripíríámani, ‘Siŋwí winípoi. Ríyírini. Siŋwí winípoi. Jíyírini.’ ripíríámani. Ayí ripi náni searariŋini. Gorixo xwioxíyo mimeámí neri seameŋweáwiniginiri yariŋo rixa seyíné t́ni áwinimi re ronj́ eŋagi náni rariŋini.” nuriri ²² xegí wiepisariŋowami re uriŋiniginí, “Ríwéná soyíné ‘Sía ámá imóniŋo ámi siŋáni nimóniri emeníáyi aŋíni oimónini.’ yaiwipíríá aiwi aŋíni imóniagi siŋwí winipíríámani. ²³ Ámá wí nioni náni ‘Siŋwí winípoi. Jíworiŋini. Siŋwí winípoi. Riworini.’ searánáyí, nepa nearariŋoiniri númi muxídipa éfrixini. ²⁴ Ápiaŋwí neríná wíá aŋí ikwíróniŋí nimini ókariŋípa ámá imóniŋáoni niweapiríná ámá nániyá siŋwíyo d́ani siŋáni imónimíá eŋagi náni númi mupa éfrixini. ²⁵ Xámi ámá agwí ríná ŋweagíáyí ríwí nimóáná nioni ŕniŋí xwé wí meámíáriní. ²⁶ Ámá eŋíná Nowao t́ŋí íná néra wagíápa ámá imóniŋáoni weapimíniri yaríná axípi epíríáriní. ²⁷ Ayí ‘Gorixo iniigí waxí t́ni xwíríá wí neaikixeníámani.’ niyaiwiro o náni diŋí peá nimoro aiwá niro iniigí niro néra nuro apixí niŋwirára uro nimeága uro yaríná Nowao rixa sipixíyo ínimi páwíáná re eŋiniginí. Iniigí waxí xwé niróga niwiápnimeari oxí apixí ńni iniigí namigíawixini. ²⁸ Nowao t́ŋí íná d́ani ná ríwíyo Roto t́ŋí íná eni Sodomí ŋweagíáyí axípi e yagíáriní. Ayí eni Gorixo náni diŋí peá nimoro aiwá niga uro iniigí niga uro nero amipí bi b́f niga uro omiŋí néra uro aŋí nimira uro yaríná re eŋiniginí. ²⁹ Sía Roto Sodomí ṕni niwiárimí éí úyimi Gorixoyá diŋí t́ni ríá t́ni siŋá t́ni aŋínami d́ani nipiérorí ámá aŋí apimi ŋweagíáyí ńni ríá niŋiniginí. ³⁰ Ríwéná eni ámá axípi e néra nuro ‘Gorixomi xewaxo niweapiníámani.’ niyaiwia waríná ámá imóniŋáoni siŋáni imónimíáriní. ³¹ Sía ayimi ámá aŋí pákíkí nimiriga peyiŋíyo seáyí eŋiwámi ŋweagíá giyí giyí niwepíniro ‘Nigí iyía íá aŋí xwíá eŋíwámi weŋíyí nimeámi éí oumini.’ niyaiwiro mipáwipa éfrixini. Aiwá omiŋíyo yariŋíá giyí giyí eni wigí amipí meaniro náni ámi aŋí t́ŋí e náni mupa éfrixini. ³² Rotomi xiepí náni diŋí oseainini. Í xegí iyía íá amipí náni diŋí sipí wíagi níkinimóniri weníŋí éyí re eŋiniginí. Niperi siŋá imóniŋiniginí. ³³ Ámá xegí amipí diŋí t́ŋípi nánini diŋí móí go go o diŋí niyimiŋí imóniŋí aŋiŋí ŋweanía nánipi sixí íniniámani. Ámá xegí amipí diŋí t́ŋípi náni aí ‘Pí eniŋoi!’ yaiwíí go go o diŋí niyimiŋí imóniŋípi aŋiŋí ŋweanía náni sixí íniniáriní. ³⁴ Sía ámá imóniŋáoni weapimíáyimi ámá waú aŋí íkwiaŋwíyo sá weŋáná Gorixoyá aŋínajowa wíó, Gorixomi diŋí wikwíroariŋomi niwirimearo wíó diŋí miwikwíroariŋomi e wáripíríáriní. ³⁵ Ayimi apixí wípaú eni pirawá yuní

ikixémí yaríná wími niwirimearo wími e wáripírírini. ³⁶ [Ámá waú eni omiñyo yaríná wíomi niwirimearo wíomi wáripírírini.”] Jisaso e uríagi ³⁷xegí wiepisiarínowa re urigíawixini, “Ámináoxini, joxi nearariñipi gimí imóniníárini?” uríagiá Jisaso “O weapiníe nání ámá áwaní wí nearipaxí menini. Ámá níni siñwí tñi winipírírini.” oyaiwípoyiniri ewayí xwiyá re uriniginini, “Piyí wenje apurí obaxí pénarinítrini.” uriniginini.

Ewayí ikaxí apixí aní tñi xwirixí meariño tñi nánirini.

18 ¹Jisaso xegí wiepisiarínowa Gorixomi xwiyá ririmí niwiríná aníñí winíagi píni wiáripírixiniri ewayí xwiyá bi nuriri ²re uriniginini, “Aní bimi opisi añiyo dání xwirixí eyeyírómi yariñí wo — O Gorixo nání wáyí mepa eri ámá níniyo diñí sipí miwipa eri yariñorini. ³Omi apixí aní wí — Í eni añí apimi dánítrini. Í íníná o tñí e nání nibayiri re urayiniginini, ‘Ámá níni píné nimeararigíáyí joxi tñi nirorai saní ninirápiri xwirixí bi oyaiyi.’ urayíagi aí ⁴o ‘Saní murápipa oemini.’ niyaiwia núsáná ríwéná í nání rixa aníñí winíagi re yaiwiniginini, ‘Nioni Gorixo nání wáyí mé neri ámáyo diñí sipí miwiaríñáoni aiwi ⁵apixí aní í aníñí nimoayaríagá nioni í aníñí miní bayaríná aníñí nininiginiri ími oumearómni.’ yaiwiniginini.” ⁶Jisaso ewayí xwiyá e nuriri re uriniginini, “Ámá xwirixí eyeyírómi yariñí sipío enípi nání diñí mópoyi. ⁷O ámá sipío aiwi apixí aní íníná bayaríagá nání saní urápiniginini. Gorixo ámá óniñí wí mimóniñagi aí re riyaiwiaríñoi, ‘Gorixo ámá xío xegíni eyíroñíyí omi áríwiyirani, ikwáwiyirani, “Joxi saní nearápei.” urayarínáyí o kikiáfá néra núsáná ná ríwíyo dání saní urápiniginini.’ riyaiwiaríñoi? ⁸Oweoi! ‘Aníni saní urápiníárini.’ searariñini. E neri aiwi ámá imóniñáoni niweapiríná ámá sini diñí ninikwírore yariñagiá siñwí winimíáríani? Rixa píni niniwíárimi wariñagiá winimíáríani? Ayináni píraniní diñí mópoyi.” uriniginini.

Ewayí ikaxí Parisio tñi takisí nání nigwí urápariño tñi nánirini.

⁹O ewayí xwiyá ripi eni wani diñí nikwíróniro “None wé róniñwáonerini.” yaiwiro ámá wíyo peayí niwianiro “Sipíowarini.” yaiwiro yariñíayo nuriríná re uriniginini, ¹⁰“Ámá waú — Wíio Parisiorini. Wíio takisí nání nigwí nearápariñorini. Awaú Gorixomi xwiyá ririmí wianiri nání añí Gorixo nání nanwí ridíyowá yariñíwámi nání axíná nuri ¹¹Parisio xegípi añwi e nírómáná xegí diñí tñi ínimi dání re ririmí winiginini, ‘Gorixoxini, nioni ámá wa yapi sipíoni meñagi nání yayí osimini. Wa yapi ámáyo íwí urápariñáonimani. Wa yapi rikikírío yariñáonimani. Wa yapi apixí tñi íwí inariñáonimani. Takisí nání nigwí nearápariñí dao yapi mimóniñini. Ayináni yayí osimini. ¹²Sabaríá ayí ayo síá wíyaúmi aiwá ñwíá ñwirárinariñáonirini. Amipí nioni meááyí eni yaní nimeri wé wúkaú enáná wo joxi nání tariñáonirini.’

Parisio Gorixomi e uraríná ¹³takisí nání nigwí urápariŋo ná jámíni e nirómáná piaxí weánariŋagi nání siŋwí nimíeyoari aŋínami maní ayá íá nixirinimáná Gorixomi ririmí re wiŋiniginí, ‘Gorixoxini, nioni íwí yariŋáonirini. Wá niwianeí.’ uriŋiniginí.” Jisaso ewayí xwiýá e nuriri ¹⁴re uriŋiniginí, “Ámá o Gorixoyá siŋwíyo dání wé róniŋí nimónimi xegí aŋí e nání úagi aiwi wío wé róniŋí mimóniŋiniginí. Ámá go go xewaniŋo seáyi e meníoyí Gorixo xwíámi imixiníáriní. Go go ‘Sipíonirini.’ niyaiwiri ínimi imóníoyí Gorixo seáyi e umeníáriní.” uriŋiniginí.

Niaíwí onimiápiami wé ikwikwiárimí eŋí nánirini.

¹⁵Wiepisariŋowa ámá wí wigí niaíwípiami Jisaso wé owikwiáriniri nimeámi bariŋagía niwiniro “Nimeámi mibipani.” uraniro yariŋagía Jisaso siŋwí e niwiniro ¹⁶niaíwípiami ríaiwá “Bípoyi.” nuriri wiepisariŋowami re uriŋiniginí, “Ámá niaíwí onimiápia xaniyaúmi diŋí niwikwíro yariŋgápa Gorixomi diŋí wikwíróíáyí o xwioxíyo míméami neri pírániŋí umeŋweaní eŋagi nání niaíwí ripia xe obípoyiniri siŋwí winípoyi. Pírí miwiaíkipa époyi. ¹⁷Ámá go go niaíwí onimiápiániŋí mimónipa eri Gorixomi yeáyí murínipa eri nerínáyí, oyá xwioxíyo wí nipáwiro ŋweapíríámani.’ searariŋini.” uriŋiniginí.

Amípí mimúróniŋí wo yariŋí wiŋipi nánirini.

¹⁸Judayí áminá wo niwímeari yariŋí re wiŋiniginí, “Nearéwapiyariŋí naŋoxini, nioni pí neríná diŋí niyimiŋí tíŋáoni aniŋí íníná ŋweámía nání imónimíáriní?” yariŋí e wíagi ¹⁹Jisaso ámá o “Xío ení naŋo eŋagi nání Gorixo tíni xixeni imóniŋoríani?” oyaiwiniri re uriŋiniginí, “Joxi pí nání ‘Naŋoxini nírariniŋi? Ámá niyoni nání Gorixoni naŋí imónini. ²⁰Ŋwí ikaxí eániŋípi joxi nijíáriní. ‘Apixí tíni íwí minipani. Niwiápnimeari ámá mipikipani. Íwí mimeapani. Ámá wo nání xwiýá niyimároniri yapi muripani. Riniyaúmi wéyo meríni.’ Ŋwí ikaxí e eániŋípi joxi nijíáriní.” uríagi ²¹yariŋí wío re uriŋiniginí, “Nioni sini niaíwí imóniŋae dání nipini niméra biŋáriní.” uríagi ²²Jisaso aría e niwiri re uriŋiniginí, “Ŋwí ikaxí api pírániŋí niméra nibiri aí bi sini meŋírini. Dixí iyíá íá amípí níni nigwí nání bí nemáná ámá uyípeayíyo mini niwia nurínáyí, aŋínami amípí ayá tíŋí tíŋoxi imóniríáriní. E nemáná nibiri nioni nixídírrixini.” uríagi aí ²³o aría e niwiríná amípí xwé wí mimúróniŋo eŋagi nání aga xwioxíyo dání diŋí ríá nuxeri xwiríá nimóniri kipiní niyiri roŋagi ²⁴Jisaso e niwiniro re riŋiniginí, “Ámá amípí mimúróniŋíáyí nene Gorixomi nuxídirane oyá xwioxíyo páwiani nání aniŋí miní oyaneyiniri nero aiwi nipáwipaxí mimóniŋoi. ²⁵Kamerí eŋí rapirapí gwí kiwearigíá óí ayikwinimi páwipaxí mimónini. Ámá amípí mimúróniŋíáyí kamerí eŋí óiyimi mipáwipa yariŋíyí yapi Gorixoyá xwioxíyo nipáwiro ŋweapaxí mimóniŋoi.” ríagi ²⁶ámá e niŋweámáná aría wigíáyí —Judayí níni

“Amipí mimúrónigiáyí Gorixoyá diñí tñi amipí meaarĩagía náni Gorixo yayí winarini.” yaiwiagiáyíri. Ámá e niñweámáná aríá wigíáyí ududí winíagi omi re urigíawixini, “Joxi nearípi nepa eñánáyí, Gorixo ámá giyo yeáyí uyimixemeaníárani?” uríagiái aiwi ²⁷o re urĩnigini, “Amipí ámá mepaxí imóniñyí Gorixo anani e nepaxíri. Gorixo anani ámá yeáyí uyimixemeapaxíri.” uríagi ²⁸Pitao re urĩnigini, “Ai, ámá o xegí amipí píni miwiáripa neri rixídipaxí miwimónariñagi aiwi none negí añí tñi amipí níni píni niwiárimi joxi númi rixídĩwini.” uríagi ²⁹⁻³⁰Jisaso awami re urĩnigini, “Giyí giyí nioni diñí ninikwíroro wíniyí eni Gorixoyá xwioxíyo páwírixiniri wái rimepíri náni wigí añírani, xiepímirani, xexirímeáowamirani, xaniyaúmírani, wigí niaíwíyorani, píni niwiárimi ninixídĩrínáyí, aníá imónipíríamani. Agwi ríná Gorixo ayí píni niwiárimi úfá axípi wíni míni niwimáná ámá níni mí ómómiximí éfná ayí diñí anĩñí íníná ñweapíría náni eni winíárini.” urĩnigini.

Ámi áwaní “Ninipikipíríárini.” urĩñí nánirini.

³¹O xegí wiepisariñí wé wúkaú sikwí waú awami jíamini e nimeáa numáná re urĩnigini, “Jerusaremi náni wariñwini. E rémóáná amipí Gorixoyá xwiýá wía rókiamoagiáwa ámá imóniñáoni náni nĩro eagíapi xixeni nímeaníárini. ³²Negí Judayí miyí nĩrorírná émáyí wa íá ninixero ikayíwí nimeariro iwaní nímépero reañwí nũriro ³³sikwíá ragí píri nuyikiro ninimáná nipikipíríárini. E neri aiwi rixa síá wiyá wiyi óráná ámi niwiápíimeámíárini.” áwaní pírániñí e uríagi aiwi ³⁴xwiýá api awami ínimíniñí imóniñagi náni nijá wí mimónipa nero xío ríyí “Ayí náni ría neararini?” miyaiwigíawixini.

Siñwí supáriñí womi naní imixiñí nánirini.

³⁵O añí xegí yoí Jeriko riniñipi tíñí e rímine rémoaríná ámá siñwí supáriñí wo ói manípa tñi niñweámáná ámá e pwarigíayo aiwá náni rixiñí nuriríná ³⁶aríá wíyí wiñinigini. Oxí apixí obaxí ikwikwierí pwarĩagía aríá niwiri yariñí re wiñinigini, “Pí náni yariñoi?” uríagi ³⁷ámá wí áwaní re urigíawixini, “Nasareti dájí Jisaso pwarĩnagi yariñoi.” uríagiái ³⁸o ríaiwá re riñinigini, “Jisasoxi, mixí ináyí Depitomi xiáwoxini, joxi wá niwianeí.” rariñagi ³⁹ámá Jisasomi xámi umeagiáyí o ríaiwá e rariñagi aríá niwiro mixí nuriro “Píni wíareí.” uríagiái aiwi ríaiwá eñí tñi ámi wíni wíni nĩri re riñinigini, “Jisasoxi, Depitomi xiáwoxini, joxi wá niwianeí.” urariñagi ⁴⁰Jisaso e nĩronapimáná sekaxí re urĩnigini, “Omi niwirimeámi bípoyi.” uríagi ámá wí rixa niwirimeámi añwi e báná ⁴¹Jisaso yariñí re wiñinigini, “Nioni pí oniniri nĩrariñini?” uríagi re urĩnigini, “Ámináoxini, nioni ámi siñwí oanimĩri rirariñini.” uríagi ⁴²Jisaso re urĩnigini, “Dixí siñwí anani oxoaríni. Diñí ninikwíroriñipimi dáni erkiemeánĩrĩni.” uráná ⁴³re

enjinigini. Xegí siŋwí noxoari siŋwí aniŋinigini. Siŋwí naniri Jisasomi nuxídiri Gorixomi seáyi e umearíná áamá nání o e éagi niwiniro ayí eni Gorixomi seáyi e megíawixini.

Sakiaso enípi nánirini.

19 ¹Jisaso rixa Jeriko nirémori aní apimi áwinimi pwaríná ²ámá wo Sakiasoyi riniŋo —O áamá takisí nání nigwí uráparigíáyo xiráowániŋí imónigíá worini. Amipí wí mimúroniŋorini. ³O “Áamá Jisasoyi riniŋo goriani?” niyaiwiri siŋwí winiminiri neri aiwi ripíwo enagi nání oxí apixí uyimároariŋagía o yopa nimeginimi ⁴ayo xámi numeari aníni nuri “Jisaso óí riyimi puniŋoi.” niyaiwiri omi siŋwí winiminiri nání íkíá womi niŋeyiri weníŋí neri roŋáná ⁵Jisaso nibiri e nirónapimáná siŋwí anáníyí Sakiasomi niwiniri re uriŋinigini, “Sakiase, aníni wepínei. Síá riyi joxi tñi ŋweámíni. Dixí aní e nání owaiyi.” uríagi ⁶o aníni niwepíniŋi yayí tñi niwirimeámi xegí aní e nání nimeáa uŋinigini. ⁷Xegí aní e nání niwirimeámi úagi áamá nání siŋwí e niwiniro wikí diŋí niwíaiwiro re rinigíawixini, “Áamá fwi yariŋí o tñi ŋweáminiri nání pí nání uŋoi?” rinaríná ⁸Sakiaso éí nirómáná Jisasomi re uriŋinigini, “Ámináoxini, niŋí iyíá íá amipí nání bi biaú kikiri nepayómáná bi áamá uyípeayí imónigíáyo miní wimíáriní. Áamá giyí giyo nioni yapí niwíwapiyiri nigwí fwi urápiŋáyo wigí fwi urápiŋáyí tñi nioniyá wí tñi seáyi e nikwiáriri miní wimíáriní.” uríagi ⁹Jisaso re uriŋinigini, “Agwi áamá ro arío Ebiríamo Gorixomi diŋí niwikwírori yagípa axípi neri nisaniri éagi nání Gorixo rixa yokwarimí niwíiri yeáyí uyimixemeaŋoi. ¹⁰Ayí ripi nánirini. Áamá imóniŋáoni áamá fwi néra nuro aniŋí ikeamónaniro yarigíáyo nání píá neri yeáyí uyimixemeáminiri biŋáonirini.” riŋinigini.

Ewayí ikaxí omiŋí wiirigíá wé wúkaú nánirini.

¹¹Áamá ayí xwiýíá api aríá niwiro Jerusaremi Jisaso waríŋe nání rixa anwi e imóniŋagi niwiniro diŋí re nimóa ugíawixini, “Gorixo nene xwioxíyo mimeámí neri neameŋweaní rixa nimóniŋoi. Jisaso Jerusaremi nirémoríná émáyo mixí nuxídownárimáná mixí ináyí nimóniri xwioxíyo mimeámí neri neameŋweaniŋoi.” Diŋí e nimóa waríná Jisaso “O negí mixí ináyí apaxí mé nimónimeniŋoi.” oyaiwípoiŋiri ewayí xwiýíá bi nuriri ¹²re uriŋinigini, “Áamá áminá wo mixí ináyí imónauri ámi nibiri xegí áamáyo meŋweari emíániri aní ná jíami imóniŋími uminiri neríná ¹³xegí xináíwániŋí nimóniro omiŋí wiarigíá wé wúkaú awami ‘Eini.’ nuriri nigwí gorí áamá aniŋí miní omiŋí emá waú wo nero meariŋí woni woni niwia nuri re uriŋinigini, ‘Nigwí nioni seaiŋariŋá ripi sayá imixipíríá nání bisinísí nimixa waríná seaímeáimigini.’ nurimi úaná ¹⁴ámá aní e xío tñi ŋweagiáyí wigí

xwioxíyo dání wikí ðinjí níwíaiwiro wigí ámá wíyo re urowárigíawixini, ‘Mixí ináyí imimiximí yariñomi nuro “O nene neameñweañía nání mineaimónarini.” urípoyi.’ urowárigía awa nuro mixí ináyí imimiximí yariñomi e uríagía aiwi ¹⁵o áminá bíomi mixí ináyí nimixiri xegí añí e nání urowáriniginini. O rixa mixí ináyí nimóniri añí e nirémoríná awa bisinísí nimixiríná nigwí sayá ría imixíawixiniri siñwí owinimíniri re riñiginini, ‘Gí omiñí niarigía nigwí wiñáwa obípoyi.’ ráná ¹⁶wo nibiri re uriñiginini, ‘Negí neameñweañoxini, nigwí gorí joxi niapiño tíni bisinísí nimixa nuríná rixa wé wúkaú sayá imixiñárini.’ uríagi ¹⁷o re uriñiginini, ‘Gí omiñí niariñí nañoxini, ayí awiaxírini. Joxi nigwí nioni siapiñáo tíni nioni ririñápa xixeni eñí nání gapimaní nimóniri añí wé biaúmi meñweáirixini.’ uriñiginini. ¹⁸Ámi wo nibiri re uriñiginini, ‘Negí neameñweañoxini, nigwí gorí joxi niapiño tíni bisinísí nimixa nuríná rixa wé wú sayá imixiñárini.’ uríagi ¹⁹mixí ináyo re uriñiginini, ‘Joxi eni gapimaní nimóniri añí wé bimi meñweáirixini.’ uriñiginini. ²⁰Ámi wo nibiri re uriñiginini, ‘Negí neameñweañoxini, nigwí joxi niapiño nioni írikwíyo wowí neri tiñáo sini riworini. ²¹Joxi xeaniñí rariñoxi eñagi nání wáyí niníagi “Nigwí ro xwíría ikixéánáyí, iwaní neanírfani?” niyaiwiri bisinísí wí mimixiñárini. Joxi amipí ámá wa tíáyí ðixí meari aiwá ámá wa iwíá uríáyí ðixí miri yariñoxi eñagi nání rirariñini.’ uríagi ²²o re uriñiginini, ‘Omiñí niariñí sumí roxini, jiwaniñoxi niríyo dání xwiýíá rimearimíini. Nioni xeaniñí rariñáoni amipí ámá wa tíáyí nigí meari aiwá wa iwíá uríáyí nigí miri yariñáoni eñagi nání joxi nijíá imóniñagi nání ²³pí nání nigwí nioni siapiñáo nigwí añíyo minítipa eñírini. E nitiri siñwiriyí, nigwí o tíni ámi bi seáyi e ikwíariniñáná meáminiri éarini.’ nuriri ²⁴ámá añwí e rogiáyo re uriñiginini, ‘Ámá romi nigwí ro nurápiro nigwí wé wúkaú tíñomi mini wípoyi.’ uríagi ²⁵awa re urigíawixini, ‘Ai, negí neameñweañoxini, o rixa wé wúkaú tíñorini. Pí nání ámi wo wiríini?’ uríagía ²⁶o re uriñiginini, ‘Nioni re searariñini, “Ámá giyí giyí nioni wiñápi pírániñí número xwé nimixirínáyí ámi wíni meapíríárini. Giyí giyí nioni wiñápi mimepa neri kikiá nerínáyí api aí ámi nurápiimíárini.” searariñini. ²⁷E neri aiwi nioni tíni mixí imónariñwáyí “O negí mixí ináyí nimóniri neameñweani nání mineaimónarini.” yaiwííáyo níwirimeámi níbiro gí siñwí aniñae dání pikípoyi.’ uriñiginini.” ²⁸Jisaso ewayí xwiýíá api nurárimi Jerusaremi nání niyiríná xámi umeañiginini.

Jerusaremiyo nirémoríná mixí ináyí rémoarigiápa rémoñí nánirini.

²⁹Jisaso añí onimiá biaú —Añí apiaú ðwí Oripí riniñípimi dání añwi e imónini. Apiaú yoí Betipasi riniñípi tíni Betani riniñípi tíni tíñí e añwi e nirémoríná wiepisariñíyí waúmi re urowáriniginini, ³⁰“Awagwí añí jíapimi nání nuri nirémoríná dogí sipikí e yuráriníñagi winíío —Sini ámá seáyi

e éf miñweaarigíorini. Omi níkweari nimeámi bípiyi. ³¹ Ámá wo siñwí neaniri ‘Awagwí pí nání íkweeariñi?’ earánáyí, re urípiyi, ‘Ámináo seáyi e éf niñweari nimeámi uminiri nání yearowáriñoi.’ urípiyi.” urowáriagi ³² awaú nuríná xío urípa axípi enjagi niwiniri ³³ rixa dogí sipiko íkweearíná xiáwowa re urigíawixini, “Pí nání dogíomi íkweeariñi?” uríagiá ³⁴ awaú “Yegí Ámináo seáyi e éf niñweari nimeámi uni nání íkweeariñwii.” nuriri ³⁵ Jisaso pwarinje nání nimeámi nuri e nurárimáná wigí rapirapí seáyi e yínigíapi seáyi e niwikwiáiro Jisasomi seáyi e ñwiráraná ³⁶ dogíomi éf niñweari nimeámi waríná oxí apixí xío tñi warigíáyí mixí ináyíyo yayí wianiro yarigíapa wigí iyá sanjwíyo ríkarinigiáyí nimearo ói e íkwianjwí neapára nuro ³⁷ o rixa Jerusaremi tñjé añwi e nírémoríná díwí miñjé Oripiyi rininípimi ipímiearíná xegí wiepisariñjé obaxí xío tñjé e epíroyí egiáyí re egiáwixini. Emimí Jisaso yariñjé níniyí siñwí winayigíá nání yayí seáyimi dání nero Gorixo nání ráiwániñjé niriyo yayí numero ³⁸ re nira ugíawixini, “Mixí ináyí Ámináo neaurowáriñjé ro oyá diñjé tñi seáyi e oimónini. ‘Añínami ñweañoxini, joxi niwayiróniri oñweani.’ neaimónarini. Omimi seáyimi dání yayí oungeanyí.” nira waríná ³⁹ Parisi wa ámá epíroyí egiáyí áwinimi dání re urigíawixini, “Nearéwapiyariñoxini, díxí wiepisariñjéyo mixí nuriri ‘E mirípa époyi.’ urei.” uríagiá aí ⁴⁰ o re uriniginini, “Wí píni wiáripíríméoi. Píni niwiárirínáyí, síñjé tiyí eni ráiwániñjé niriyo nioni nání Gorixomi seáyi e umepíráoi.” uriniginini.

Jisaso Jerusaremi nání ñwí eañjé nánirini.

⁴¹ Jisaso rixa Jerusaremi tñjé e añwi e nírémoríná añjé apimi niwiniríná ñwí neari ⁴² re riniginini, “Jerusaremi ñweáyíné nioni éf píraniní seañwiráripaxí imóniníapi nání nijíá nimóniro siñwiriyí, ayí nañjé imóniminiri enjírini. E neri aiwi nioni segí siñwí anigíe dání pínniníñjé imóniníagi nání seyíné majíá imóniníoi. ⁴³ Ríwéná ámá seyíné tñi mixí inarigíáyí awí niseamero segí ákinápimi píxemoánaniri nání xwíá waíwíniñjé nita nipeyiro awí xapixapí niseamudfómómáná ⁴⁴ segí añjé pipinamí néra uro niaíwí pipíkímí ero nero añjé nimiriríná síñjé níkkíróniga peyiniñjé bi xe okikíróniniri siñwí winipíríámani. Yeáyí seayimixemeámía nání seaímeáagi aiwi seyíné mí minómixipa yariñagiá nání e e seaikáripírírini” riniginini.

Añjé ridiyowá yarigíwámí dání mixí urowárapiní nánirini.

⁴⁵ Jisaso rixa Jerusaremi nírémori añjé nañwí Gorixo nání ridiyowá yarigíwámí nipáwiri ámá makeríá nimixiro nañwí ridiyowá nání bí yarigíáyo mixídámí niwiríná ⁴⁶ re uriniginini, “Bikwí Gorixoyápimi xegí añjé riwá nání re niriniri eánini, ‘Añjé nioniyáyí ámá niñbiro xwiyíá ririmí nipíríwáriní.’ niriniri eániñagi aiwi seyíné añjé ámá yapí niwepisiro íwí uráparigíáyíráiwániñjé imixariñoi.” uriniginini.

⁴⁷O síá ayí ayo aṅí iwámi dáni á máyo uréwapiyaríná apaxípániṅí imónigíá xwéowa t́ni ṅwí ikaxí eániṅípi mewegíáwa t́ni Judayí áminá seáyi e imónigíáwa t́ni omi “Opikianeyi.” niri ro aiwi ⁴⁸oxí apixí náni oyá xwiýíá aríá wianiro aga niwimónariṅagi náni omi pikipaxí bi mimóniṅagi náni siṅwí winaxídimegiawixini.

“ ‘Joxi néné t́ṅoxi imónei.’ go ririṅoi?” urigíá nánirini.

20 ¹Síá Jisaso aṅí Gorixo náni ridiyowá yarigíiwámi nipáwiri á máyo xwiýíá yayí winipaxí imóniṅípi uréwapiyaríní wiyimi apaxípániṅí imónigíá xwéowa t́ni ṅwí ikaxí eániṅípi mewegíáwa t́ni Judayí mebaowa t́ni omi niwímearo ²re urigíawixini, “ ‘Joxi néné t́ṅoxi imónei.’ go ririagi joxi á má aṅí riwámi makeríá nimixiro nanwí ridiyowá náni bí yarigíáyo mixídámí éinigini?” uríagiá ³o re uriṅinigini, “Nioni eni yariṅí bi oseaimini. Soyíné áwanṅí niranáyí, nioni yariṅí niarigíápi náni eni anani áwanṅí searimíni.” nuriri ⁴yariṅí re wiṅinigini, “Jono wayí nineameaia uṅo ṅwíá aṅnami ṅweaṅo uríagi ríá eṅinigini? Xegí diṅí t́ni ríá eṅinigini?” uríagi ⁵wiwanigowa yariṅí niniro re rinigíawixini, “None ‘Gorixoyá diṅí t́ni eṅinigini.’ uráná re neariniṅoi, ‘Soyíné pí náni o riṅípi náni aríá niwiro diṅí mikwíropa egíáriní?’ nearini eṅagi náni wí e uripaxí menini.” niriṅiro ⁶ámi re rinigíawixini, “E neri aí none ‘Jono xegí diṅí t́ni wáí nurimeri wayí niseameaia uṅíriní.’ uránáyí á má náni ‘Jono Gorixoyá diṅí t́ni wíá rókiamonṅí worini.’ niyaiwiro náni síṅá ninearo neapikipírixini. Api eni wí muripa oyaneyi.” niriṅiro ⁷Jisasomi re urigíawixini, “None majíáriní. Gorixoyá diṅí t́ni yagíáriní? Xegí diṅí t́ni yagíáriní?” uríagiá ⁸o re uriṅinigini, “Soyíné Jono náni diṅí yaiwiarigíápi náni áwanṅí miniriagiá náni nioni eni ‘Joxi e éirixini.’ niriṅo náni áwanṅí wí searimiméini.” uriṅinigini.

Ewayí ikaxí wainí omiṅí uwinaxídiarigíáwa nánirini.

⁹O ewayí xwiýíá ripi uriṅinigini, “Á má wo wainí uraxí omiṅí bi iwíá nura núisáná á má wami re uriṅinigini, ‘Gí omiṅí ripi pírániṅí siṅwí nuwinaxídírixini.’ nurimi aṅí wími uríniminiri náni nuri emá obaxí niṅweaṅisáná ¹⁰rixa wainí sogwí yóí éáná xegí omiṅí wiiarigíá wo xío xegí wí ourápauniniri urowáragi aiwi omiṅí siṅwí uwinaxídiarigíáwa omi íá nixero iwanṅí nimépero aníomi wárigíawixini. ¹¹Omiṅí xiáwo ámi xegí omiṅí wiiarigíá womi urowáraná omiṅí siṅwí uwinaxídiarigíáwa omi eni iwanṅí nimépero o ayá owininiri ripiríri numero aníomi wárigíawixini. ¹²Omiṅí xiáwo ámi omiṅí wiiarigíá womi urowáraná omi miṅí niro ro bíariwámíni moaigíawixini. ¹³Omiṅí xiáwo awa íníná xegí omiṅí wiiarigíáwami iwanṅíni nimépero aníowami urowárarigiá náni re yaiwiṅinigini, ‘Nioni arire eminiréini? Gí íwí diṅí sixí uyiṅáomi ourowárimini. “Omi xixeni aríá wipíáriní.”’

nimónarini.' niyaiwiri urowáriagi aí ¹⁴awa xegí xewaxo bariṅagi siṅwí niwiniro re rinigíawixini, 'Xanoyá diṅí meanío jiiwo barini. Omiṅí amipíyí negí imóninía nání omi opikianeyi.' niriniro ¹⁵omi íá nixero bíariwámíni nimoaimáná pikigíawixini." Jisaso ewayí xwiyíá e nuriri yariṅí re wiṅinigini, "Omiṅí xiáwo xewaxomi pikíagiá nání awami pí winíáriní?" Yariṅí e niwiri ¹⁶re uriṅinigini, "Omiṅí xiáwo nibiri omiṅí siṅwí uwinaxídiarigíawami pipikímí niyárimáná omiṅí ámi wa siṅwí oníwinaxídípoyiniri mini winíáriní." uríagi áamá e rówapigíá aríá e niwiro "Jisaso 'Judayiné omiṅí siṅwí uwinaxídiarigíáyí yapi imóniṅoi.' ría neararini?" niyaiwiro re rigíawixini, " 'Oweoi! Wí e eníámani.' neaimónarini." uríagiá aí ¹⁷o siṅwí agwí niwiniri re uriṅinigini, "Seyiné 'Wí e epaxí menini.' yaiwiarigíagiá aí pí nání Bikwíyo ewayí xwiyíá ripi eṅíná niriro eagíawixini, 'Síṅá aṅí mirarigíáwa síṅá awiaxí wo nání píá neríná wo "Sipíxini." niriro emi móio Gorixo "Awiaxorini." niriri nimeari aṅí xío mirariṅiwámi iwamío nitiwayirori miriṅfrini.' xwiyíá wía rókiamoagiáwa e niriro eagíapi pí nání rinini? Seyiné diṅí rimoariṅoi? ¹⁸Sixí botorixí síṅáyo nipiérori píri miyeámí inariṅípa áamá giyí giyo síṅáo nipiérori xaíwí nearínáyí axípi imónipíríáriní. Xwasíwí yeáyí bimi síṅá nipiérori nearíná yuní wárariniṅá síṅáo áamá giyí giyo nipiérori nearíná axípi xwasíwí yuníniṅí imiximíáriní." Jisaso xío síṅáoniṅí nimóniri nání e uriṅinigini.

Nigwí takisí nání émáyo wiayigíá nánirini.

¹⁹Ṃwí ikaxí eániṅipi mewegíáwa t́ni apaxípániṅí imónigíá xwéowa t́ni awa "Jisaso ewayí xwiyíá nineariríná 'Soyiné omiṅí xiáwomi xewaxo pikíániṅí imóniṅoi.' ría neararini?" niyaiwiro axíná "Ríxa íá oxiraneyi." niyaiwiro aiwi oxí apixí e epíroyí egíáyí nání wáyí niwiro íá mixiripa nero ²⁰siṅwí niwinaxída nemero áamá wa yapi niwíwapiyiro siṅwí niwinaróa oupoyiniri nurowáiro re urigíawixini, "Soyiné áamá naṅoyínéniṅí nimóniro yapi niwíwapiya nuríná pasániṅí niméra úpoyi. Xwiyíá omi anani gwí yipaxí wí ránáyí, ríxa omi íá xepíri nání gapímanomi áwanṅí urani nání re urípoyi, "Takisí nání nigwí émáyí nearáparigíápi sini mini wianiréwini? Mini miwipa yaniréwini?" urípoyi. O 'Oweoi, sini mini miwipa époyi.' ránáyí émáyí omi íá nixero gwí yipíráoí." urowáriagiá ²¹awa nuro Jisasomi niwímearo pasániṅí niméra nuríná weyí re umearigíawixini, "Nearéwapiyariṅoxini, joxi xwiyíá niriri ninearéwapiyiríná náyoní nearéwapiyariṅoxi eṅagi nání nene nijíáriní. Áamá giyí giyí símeáagiá aí símímanṅí siṅwí niwiniri siṅwí nání wáyí mé xwiyíá Gorixoyá nepáni urariṅípi nearéwapiyariṅoxirini." nuriro ²²yariṅí re wigíawixini, "Diṅí joxiyá píoi yaiwiariniṅí? 'Nene émáyí mixí ináyí Sisaomi takisí nání nigwí mini niwiayiranéná apáni wiariniṅwini.' risimónarini? 'Nipikwini miyariṅwini.' risimónarini?"

uríagía aiwi ²³ Jisaso yapí wíwapiyano yarigíápi nání diñí adadí niwiri nijíá nimóniri nání re uríñinigini, ²⁴ “Émáiyá moní bi siwá nípoi.” nuriri rixa siwá wíaná yariñí re wiñinigini, “Nigwí ripimi yoí goyá eániri símimañí goyá ñwiráriniri inini?” uríagi awa “Émáiyá mixí ináyí Sisaoyá eánini.” uríagía ²⁵ o re uríñinigini, “Nigwí ripimi símimañí Sisaoyá ñwirárininagi nání xewaniñomi mini wírixini. Amipí níni oyá imóniñiyí eni xewaniñomi wírixini. E neri aí amipí Gorixoyá imóniñiyí xíomi wírixini.” Jisaso Gorixo áamá xewaniñóniñí imixiniñí enagi nání omi diñí owikwírípoyiniri e uríagi ²⁶ awa yapí niwíwapiyiro pasániñí e uméiá aí ámáyá siñwíyo dání Jisaso xwiyiá meárinipaxí wí mirariñagi aríá niwiro áamá níni eni Jisaso pírániñí e reñwípearinagi aríá niwiro nání ududí nero xwiyiá bi murigíawixini.

“Ámá ámi wiápínimeapíríárini.” uríñí nánirini.

²⁷ Ámá Judayí wa, Sajusiyi riniñí wa —Sajusiowa re rarigíáwarini, “Ámá nipémáná enánáyí wí niwiápínimeapíríámani.” rarigíáwarini. ²⁸ Awa nibiro Jisasomi yariñí wianiro nání re urigíawixini, “Nearéwapiyarinoxini, eníná Moseso ñwí ikaxí nineariríná nene nání niriri ríwamiñí re eañirini, ‘Ámá go go apixí nimeari niaíwí meméá péánáyí ámi xexirímeáo apixí aními nimeari pejoyá niaíwí wo wiemeafwinigini.’ Moseso e niriri eañirini.” nuriro ²⁹ ewayí xwiyiá ripi urigíawixini, “Xiráxogwá wé wíumi dání waú egíáwa xiráo apixí wí nimeari niaíwí meméá péáná ³⁰ xogwáo wo aními nimeari niaíwí meméá péáná ³¹ ámi wo nimeari niaíwí meméá péáná wé wíumi dání waú imónigíáwa nowani o o ími nimeayiro aiwi niaíwí wí meméá nowani rixa péáná ³² apixí eni xiráxogwá nowamini nimeániri nipemixárimáná xí eni peñinigini.” Ewayí xwiyiá Jisasomi e nurimáná ³³ omi majiá wikixeáraniro nání yariñí re wigíawixini, “Gorixo áamá niyoni mí ómómiximí winiá nání pegiá níni niwiápínimearíná í xiráxogwá wé wíumi dání waú nowani meagiñ enagi nání goyáí imóniníárani?” uríagía ³⁴ Jisaso re uríñinigini, “Ríná áamá apixí ñwiráriro mearo inarigíárini. ³⁵ E neri aí ríwéná Gorixo meñweañáná áamá oyá siñwíyo dání anani niwiápínimearo ñweapíríáyí apixí ñwiráriniro meániro inipíríámani. ³⁶ Íná ámi bi nipepaxí imónipíríámani. Ayí ripi nánirini. Aníñajowa yarigíápa nero ñweapíríárini. Gorixoyá diñíyo dání xwáripáyo dání wiápínimeapíríá enagi nání ayí Gorixoyá niaíwí nimóniro aníñí íníná ñweapíríárini. ³⁷ Soyíné diñí ‘Pegiáyí wí niwiápínimeapaxí menini.’ yaiwariñagía aiwi anani niwiápínimeapíríárini. Xwiyiá eníná Moseso íkiá onimíánáina iwí ríá miní ápiáwí wearinagi winiñipi nání ríwamiñí nearíná Gorixo xewaniño nání uriniñipi re niriri eañirini, ‘Gorixoní dixí ráwowa Ebíríamo tíni Aisako tíni Jekopo tíni awayá Ñwíáonirini.’ Moseso ríwamiñí e nearíná xiáwowa rixa pegiá aiwi o ríwamiñí e

niriri eaŋirini. ³⁸Gorixo omi e nuriríná omi xiáwowa rixa pegíámi aiwi Gorixoyá siŋwíyo dáni wigí diŋí sini siŋí eŋagi náni e ripaxírini. Gorixo áamá pegíáyí náni Ŋwíáomani. Siŋí egiáyí náni Ŋwíáorini. Oyá siŋwíyo dáni áamá níni wí pegíá aiwi, wigí diŋí sini siŋí eŋagi náni níni sini siŋírini.” uraríná ³⁹⁻⁴⁰ŋwí ikaxí eániŋípi mewegíáwa ámi diŋí sixí mínipa nero yariŋí ámi wíni bi miwí re urigíawixini, “Nearéwapiyarinoxini, joxi wigí yariŋí sífápi náni nuriríná aga naní urariŋini.” urigíawixini.

“Kiraiso niaíwí goyáorani?” uriŋí nánirini.

⁴¹Jisaso re uriŋiginini, “Áamá pí náni re rarigíárini, ‘Áamá nene yeáyí neayimixemeanía náni aríowayá xwíá piaxíyo dáni iwiaronífo sa mixí ináyí Depitoyá xiáwo imóniníárini.’ pí náni rarigíárini? ⁴²⁻⁴³Bikwí Samiyi riniŋíyo Depito xewaniŋo áamá aríowayá xwíá piaxíyo dáni iwiaronífo náni niriri ríwamiŋí ripi eaŋirini, ‘Gorixo gí Ámináomi re uriŋiginini, “Joxi wé náúmimi éí niŋweari joxi tíni mixí iníáyo xopírárí riwiimífaé náni xwayí naniri ŋweáirixini.” Gorixo gí Ámináomi e uriŋiginini.’ Depito ríwamiŋí api nearíná ⁴⁴xegí xiáwo náni ‘Gí Ámináorini.’ niriri náni arige xegí xiáwo imónini?” Jisaso áamá níni “Áamá yeáyí neayimixemeanía náni aríowayá xwíá piaxíyo dáni iwiaronífoyi rariŋwáo anani Depitomi seáyí e nimóniri nepa Gorixoyá xewaxoríani?” oyaiwípoyniri e uriŋiginini.

“Ŋwí ikaxí eániŋípi mewegíáwa yarigíápa mepani.” uriŋí nánirini.

⁴⁵Áamá níni o e rariŋagi aría wiaríná xegí wiepisariŋowami re uriŋiginini, ⁴⁶“Ŋwí ikaxí eániŋípi mewegíáwa yarigíápa mepa érixini. Awa áamá weyí oneamépoyniri rapirapí sepiáni niyínimi aŋí emero áamá makería imixarigíe dáni ‘Ámináoxini.’ onearípoyniri emero rotú aŋíyo nipáwirónárani, aiwá imixarigíe nirémorónárani, ‘Áamá niyíyá símí símí e oŋweaneyi.’ niyaiwiro ero ⁴⁷síwí yáí ríkíniŋíyí yapi ámayá aiwá pirí níni íwí manarigíápa apixí aníwayá amipí íwí urápaniro náni ero ámayá siŋwíyo dáni Gorixomi xwiyíá ririmí niwiróna aŋíŋí miní nira uro yarigíápa soyíné eni axípi mepa érixini. Ríwéná Gorixo áamá niyoni mí ómómiximí yaríná awa xwiyíá xwé meárinipírírini.” uriŋiginini.

Apixí aní wí nigwí waúni tiŋí nánirini.

21 ¹O sini aŋí Gorixo náni ridiyowá yarigíiwámi ínimi nuréwapiya nemeríná siŋwí aníyí winiŋiginini. Amipí mimúronigíáyí nigwí Gorixo náni tayarigíe tariŋagía niwiniri ²apixí aní uyípeayí imóniŋí wí eni nigwí ría iníŋí waú nimeáa nibiri tíagi niwiniri ³xegí wiepisariŋíyo re uriŋiginini, “Nioni nepa searariŋini, ‘Apixí aní uyípeayí imóniŋí rí Gorixo náni nigwí onimiá sipípkwi nitiri aiwi Gorixoyá siŋwíyo dáni amipí mimúronigíáyí tíayo seáyí e imónigoí. ⁴Amipí mimúronigíáyí wigí

nigwí xwé ayo dání bi nimearo nitiro aiwi apixí aní ríyí xegí aiwá nání bi yanipaxí ówi tñagi nání íyá seáyi e imónigoí.' searariñini." uriñinigini.

"Ridiyowá yarigiíwá pineapíríárini." uriñí nánirini.

⁵Xegí wiepisariñí wa añí Gorixo nání ridiyowá yarigiíwá nání re rigíawixini, "Añí riwá nimiriríná sñá awiaxí nikikíroa nuro añí riwá imiriñí mimónipa oeniri amipí nañí áamá Gorixo nání wigíáyí nimearo okiyíá egíárini." rariñagía ⁶Jisaso aríá e niwiri re uriñinigini, "Amipí nañí soyíné sñwí winarigíá ripi ríwéná áamá wa añí riwá nipinearíná sñá nikikíróniga uñí ripi nipineaaairo emi mimeámí éáná sñá wo womi sini seáyi e ikwíárininíámani." uríagi ⁷awa yariñí re wigíawixini, "Nearéwapiyariñoxini, joxi nearariñí api gíná imóniníárini? Pí símimajíóniñí neaináná 'Rixa nimónini ayoríani?' yaiwianíwáriní?" uríagía ⁸o re uriñinigini, "Áamá wa yapí seaíwapiyipírixiniri diñí pírániñí moríini. Obaxí nibiro gí yoí niriniro re ripíríárini, 'Nioni onirini. Rixa ínárini.' searáná aríá niwiro númi muxídipani. ⁹Soyíné 'Añí wíyo mixí inariñoi.' rariñagía aríá wiro 'Áamá nipáni mixí íkwínaroaríñoi.' rariñagía aríá wiro neríná wáyí mikárinipani. Api xámi imóniníárini. E eñagi aiwi api rixa nimónimáná eñáná soyíné 'Sía yoparíyi, o weapiníáyí rixa nimóniniñoi.' miyaiwipa éfrixini." nuriri ¹⁰ámi re uriñinigini, "Áamá gwí axírí niwiápínimearo áamá xerwí wí tñni mixí iniro mixí ináyí woyá woyáyí tñni mixí iniro ¹¹poboní xwé néra uri añí niyoni aiwá nání díwí ikeamóniro añí wí e wí e simiárí wímeari añí pírfyo dání xegí bi nimóniri ekiyiñí ináná áamá wáyí ikárinipíri nání imóniri eníárini. ¹²Ayí e eníá imóniñagi aiwi sini mimónipa eñáná íá niseaxero xeaniñí seaikáripíríárini. E niseairíná xwirixí seamepíri nání awí eánarigíe nisearowáriro gwí añíyo niseañwiráriro nioni nixídariñagía nání xwiýíá seamearipíri nání mixí ináyíyá sñwí tññí e nání tñni gapimaníyíyá sñwí tññí e nání tñni niseameámi seaupíríárini. ¹³E seaipíríá eñagi aí ananirini. Ayí ripi nánirini. Xwirixí seamearíná nioni nání áwaní uripíri imónipíríárini. ¹⁴⁻¹⁵Xwirixí seamearíná nioni diñí niseakikayori nijíá niseaipiri xwiýíá uripíri nání imónipíri seaimiximíá eñagi nání soyíné xwirixí seamepíríáyí wí pírfí seawiaíkipaxí menini. Ayináni soyíné sini íá miseaxiripa eñánáyí, diñí re mófrixini, 'Ananirini. Xwiýíá pírfí wiaíkiminiri nání menwípepa oemini. Sa Gorixoyá diñíyo dání uríimigini.' yaiwírixini. ¹⁶Segí sénáíwarani, sénowarani, séríxímeáowarani, nawíni minigíáyírani, níkumixiniri emearigíáyírani, miyí seauráná segíyí wíami pikipíríárini. ¹⁷Soyíné nioni nixídariñagía nání áamá nñni wikí niseaóniro símí tñni seaipíríá aiwi ¹⁸Gorixo yeáyí seayimixemeaníá eñagi nání soyíné anipá wí imónipíríámani. Segí díá wí aí anipá imóniníámani. ¹⁹Soyíné eñí neániro nioni aníñí ninixídírónáyí, segí diñípi eríkiemeánipíríárini.

“Jerusaremi xwiríá ikixepíríárini.” urinjí nánirini.

20 “E neri aí mixí nimeámi bíáyí anj́ Jerusaremi ripimi awí mudímóagía niwiniróná ‘Rixa anj́ ripi xwiríá ikixepíri anj́wi ayoríani?’ yaiwíríxini. 21 E niwiniróná áamá Judia píropenisíyo njeagíáyí díwí miñíyo náni éf yiro áamá Jerusaremi apimi njeagíáyí píni niwiárimí uro áamá apimi bíariwámíni omiñíyo amí amí yarijíáyí anj́ apimi ámi mirémopa ero érixini. 22 Ayí ripi nánirini. Ínáyí Gorixo xeaninj́ ríá tínj́ seaikáriníá apírini. Íná amipí níni náni Bkwíyo niriniri eániñipi xixeni imóniníárini. 23 Íná xeaninj́ ríá tínj́ xwíá tíyo seaímeaníá enjagi náni apixí niaíwí agwí egííwa tíni siní niaíwí aminj́ wiarigííwa tíni éf anj́ni mupaxí imóninijagi náni aweyi! Gorixo áamá tíyo wikí níwóniri xeaninj́ wikáriná 24 mixí nimeáa bíáyí Jerusaremi njeáyo kirá tíni pipikímí ero iwí meaniro náni nipikiomearo wigí anj́ ayí ayo náni nimeámi umiro epíríárini. E nemáná émáyí nibiro Jerusaremi dánjýíné seáyí e niseaimóniro xwiraimimí niseaikixéa nuro Gorixo ‘Yoparí e imónínwinigini.’ yaiwiárinje imóninjáná rixa re imóniníárini.

Áamá imóninjo niweapíríná nánirini.

25 “Sogwí tíni emá tíni sinj́ tíni ekiyinj́inj́ ináná áamá xwíá tíyo niyoni gwí ararí njeagíáyí ayá síwí nurori dínj́ ríá uxeníárini. Rawírawá eni xwé ayá wí níróga níwíápinimeáísáná nijiri moarinjagi niwiniróná ududí wininíárini. 26 Sinj́ sogwí amipí anj́ píríyo enjýí anj́ni mixénapíagi niwiniróná ‘Xwíá tíyo njeanjeaéne pí neaiminiri ría yarini?’ niyaiwiro wáyí níkáriniróná eaniramoro wepíríárini. 27 E neróná sinj́wí re nanipíríárini. Áamá imóninjánóni níkínimáná enj́ neániri agwí tíni nawíní weaparinjagi nanipíríárini. 28 E neri aí soyíné sogwí emá amipí ekiyinj́ inarinjagi niwiniróná ‘Gwíninj́ nearoayíroni anj́wi ayoríani?’ niyaiwiro píraninj́ éf nírómáná nioni náni weninj́ niyániri rórixini.” urinj́inigini.

Ewayí ikaxí íkíá pikína nánirini.

29 O awami ewayí xwiýá bí re urinj́inigini, “Íkíá pikí tíni íkíá níni eni yarinj́ipi náni dínj́ mópoyi. 30 Íkíá miñj́ inarinjagi niwiniróná ‘Rixa xwiogwíríani?’ yaiwiarigíápa 31 sinj́ amipí ekiyinj́inj́ eni axípi inarinjagi niwiniróná ‘Gorixo nene xwioxíyo mímeámí neri neamejweani rixa anj́wi ayoríani?’ yaiwíríxini. 32 Nioni nepa seararinj́ini, ‘Áamá agwí ríná njeagíáyí siní mípepa enjáná amipí níni nioni Jerusaremi náni searíápi xixeni nímoniníárini.’ seararinj́ini. 33 Anj́na tíni xwíá rírí tíni anani anipá nímoniri aiwi xwiýá nioniyá wí surímá imóniníámani.

“Awíninj́ njeáírixini.” urinj́ nánirini.

34 “Míríxí maiwí nípúísáná mírogwí rixa íá níwiárimixiríná nípiérori nearíná yarinj́ipa soyíné eni segí waráyo nánini niyaiwiniro aiwá xwé

niro iniigi waini xwe niro yaniro nani yarínáyí síá nioni weapimíáyí axípi e seaímeaniginiri diñí tñi ñweáírixini. ³⁵ Síá nioni weapimíá nani imóníáyí áamá xwíá riri nirímini ñweagiáyo niwimóniníáriní. ³⁶ Soyíne íniná awíniñí niñwearóná Gorixomi yariñí re wíírixini, ‘None amípí neaímeááná eñí neánirane múrorane áamá imóniñoyá símimañímini éí rorane yaníwá nani eñí bi sixí neaímixei.’ uríírixini.” uriniginini.

³⁷ Ikwáwiyíná añí ridiyowá yarigiíwámi dání áamáyo nuréwapiya núisáná síápi tñi nipeyeari dáwí miñí Oripiyi riniñípimi sá wéminiri nani yagírini. ³⁸ O síá ayí ayo e yaríná áamá nñi wíá móniñími niwiápínimearo omi añí ridiyowá yarigiíwámi dání aríá wianiro nani bayagíáriní.

Jisaso nani mekaxí megíá nánirini.

22 ¹ Síá Judayí bisíkeríá yisí mayí úrapí nimixiro narigiáyi, síá Añínajo Wiárí Neamúroagoi riniñíyi —Eñíná síá ayi Judayo Isipiyí mixí ináyo íá xewwiráñáná Gorixo niaíwí oxí xámiñí nñi opikíminiri añínají oyáo urowáñí aiji Judayí Gorixo ñwí ikaxí urinípi bisíkeríá yisí mayí úrapí nimixiro niniro sipisipí ñipikiro ówaníyo ragí xópé yáriá eñagi nani añínajo ayo múroniginini. Ayináni xwiogwí o o pwéáná síá ayi nani diñí mopíri nani sipisipí ñipikiro bisíkeríá yisí mayí úrapí nimixiro narigiáriní. Rixa síá ayi añwi e imónáná ² apaxípániñí imónigíá xwéowa tñi ñwí ikaxí eániñípi mewegíáwa tñi oxí apixí nñi nani wáyí nero nani “Jisasomi arire yumí ínimi pikianíwini?” nira waríná ³ Isikarioti dájí Judaso —O Jisasoyá wiepisariñí wé wúkaú síkwí waú imónigíáyí worini. Omi Seteno ríwímini nirori diñí uxixéroáná ⁴ o nuri apaxípániñí imónigíá xwéowa tñi Judayíyá porisowa tñi xwiýíá nirináriro Judaso re uriniginini, “Soyíne omi íá xiripíri nani nioni arire neri pasániñí umemíáriní?” uráná ⁵ awa yayí niwiniro re urigíawixini, “Joxi e neaíáná ñgwí siapaníwáriní.” uríagía ⁶ Judaso “Ananirini.” nurimi nuri áamá oxí apixí epiroyí miwipa eñáná omi pasá umemini nani weniñí wiaxídiñiginini.

Aiwá Añínajo Múroagí nani imixigíí nánirini.

⁷ Jisaso, síá bisíkeríá yisí mayí úrapí nimixiro iwamíó nigíáyí —Ayí síá Añínajo mipikí Wiárí Múroní nani sipisipí miá ñipikiro narigiáyirini. Síá ayi imónáná ⁸ o Pitaomi tñi Jonomi tñi re uriniginini, “Awagwí none aiwá añínajo eñíná neamúroagí nani nani nani nuri neaimixípiyi.” uríagi ⁹ awaú re urigíisixini, “Joxi ‘Awaú ge nuri pírániñí oimixípiyi.’ simónarini?” uríagíí ¹⁰ o re uriniginini, “Awagwí añí e niremoríná iniigi sixí maxiriñí wo tñi óróri niniríná númi nuri añí o páwíwámi awagwí eni ñipáwiri ¹¹ añiwámi xiáwomi re uríisixini, ‘Yearéwapiyariño re riñoi, “Nioni gí seaiepisariñáoyíne tñi aiwá Añínají Wiárí Neamúroagíyí nani añí awawá ikwíróniñí giwámi dání naníwini?” Jisaso e riñoi.’

nuriri ¹²o aŋí awawá seáyi émi ikwíroniŋí xwé wámi aiwá narigiáiyí aiwá yeaanipíri mimiauríwí yáriníŋíwámi siwá eaíáná e aiwá ríá neayeáisixini.” urowáraná ¹³awaú nuri Jisaso urípi xixeni niwiga nuri aiwá Aŋínajo Wiári Múroagíyi náni imixigísisixini.

“Ripi gí waráriní.” uriŋí nánirini.

¹⁴Rixa aiwá nipíri bíiná Jisaso tíni wáí wurimeiarigiáwa tíni aiwá naniro náni nawíni niŋwearo ¹⁵o re uriŋinigini, “Nioni sini ríniŋí minímeapa neríná ‘Gí seaiepisariŋoyíné tíni xámi aiwá Aŋínají Neamúroagí náni ripi onimini.’ aga ninimóníagi bíáriní. ¹⁶Ayí ripi náni searariŋini. ‘Aiwá ripi ámi bi bi nioni tíni xwíá tíyo dáni naníwámani. Gorixo xwioxíyo mimeámí neri seameŋweaníe dáni aiwá ripi náni míkípi xixeni imóniníáriní. Íná dáni nioni ámi niweapiri nioni tíni nawíni naníwáriní.’ searariŋini.” nuriri ¹⁷kapixí wá nimeari Gorixomi yayí niwimáná re uriŋinigini, “Kapixí riwá yaŋí niniro niga úpoyi. ¹⁸‘Iniigí wainí ámi bi xwíá tíyo dáni nimíámani. Rixa Gorixo soyíné xwioxíyo mimeámí neri píraníŋí seameŋweaníe dáni iniigí wainí ámi íná nimíáriní.’ searariŋini.” nuriri ¹⁹bisíkeriá bi nimeari Gorixomi yayí niwimáná níkwíriri yaŋí níwia nuri re uriŋinigini, “Nioniyá wará tíyí soyíné arirá seaimífa náni ridiyowá neríniŋí imónini. Ríwéná nioni náni diŋí seainífa náni nioni éapa bisíkeriá kwíriri seaipiri éapa axípi éírixini.” nurimáná ²⁰awa rixa aiwá ninimáná eŋáná bisíkeriá nimearíná éapa kapixí iniigí wainí riwoŋí wá nimeari re uriŋinigini, “Gorixo xwiyiá siŋí bi réoáriŋípi náni nioni níperíná gí ragí púyí iniigí wainí sixí riwániŋí imónini. ²¹E neri aiwí aríá nípoyi. Ámá nioni náni miyí nurino nioni tíni niŋwearane aiwá nariŋwini. ²²Ámá imóniŋáoni Gorixo riŋí jíayo axípi ninípikiro aiwi ámá nioni náni mixíyo miyí nurinomi Gorixo xeaniŋí xwé winíá eŋagi náni aweyi!” uríagi ²³wiepisariŋowa yariŋí re niga ugíawixini, “None go go e wini náni ríá rarini?” nira ugíawixini.

“None gímimi go seáyi e imónirífeniŋoi?” rinigiá nánirini.

²⁴Wiepisariŋowa xwiyiá ripi eni níriro símí tíni re rinigiáwixini, “None wo go go seáyi e neaimóniri eŋáná wone simaŋwíyóniŋí wurínaníwáriní?” níriga waríná ²⁵Jisaso re uriŋinigini, “Émáyiá mixí ináyíyí ámáyiá siŋwí e dáni seáyi e nimóniro wá eni bi mé sekaxíni nuriro aiwi wiwaniŋowa náni re rinarigiáriní, ‘Síwí niaíwí náni nioni tíámíni imónigiáiyí arirá wiariŋáonirini.’ rinarigiáriní. ²⁶Soyíné eni awa yarigiápa axípi e mepani. Segí rároniŋí imónioyí ségwáoniŋí imóníwiniŋini. Segí bosóniŋí imónioyí sénáiniŋí omiŋí seaiariŋóniŋí imóníwiniŋini. ²⁷Diŋí píraníŋí mópoyi. Nene píoi rariŋwáriní? Ámá kikiá niŋweámáná aiwá nariŋo seáyi e imóniŋoríani? Aiwá ríá nuyeari yaŋí wiariŋo seáyi e imóniŋoríani? ‘Ayí kikiá niŋweámáná aiwá nariŋo

seáyi e imóniñorini.’ rariñwárini. Nioni e imóniñáoni aiwi soyíné tñi niñwearíná anani segí ókíníniñí nimóniri arirá seaiariñáonirini. ²⁸ Soyíné wa iwamíó níwapiyaniro yaríná nioni tñi éí niroro píni niníwiárini úfámáni. ²⁹ Ayináni gí ápo ‘Joxi mixí ináyí nimóniri ámá ayo meñweáirixini.’ niriñpa ³⁰ nioni eni re searariñini, ‘Nioni rixa mixí ináyí nimóniri meñweañáná soyíné nioni tñi nawíni aiwá nimíae aiwá niro iniigí niro nero negí Isireriyí gwí wirí wirí wé wúkaú sikwí waú enjyo xiráowayínéniñí nimóniro meñweapíríárini.’ searariñini.” uriñinigini.

“Pitaoxi ríwí nimoríini.” uriñí nánirini.

³¹ O re uriñinigini, “Saimonoxini, Saimonoxini, Seteno soyíné náni Gorixomi símí tñi re urarini, ‘Ámá wití aiwá sikí tñíyí neyíroríná yarigíapa nioni Jisaso wiepisariñí awa ení ría eániñoiniri iwamíó owíwapiyimini.’ Obo Gorixomi e urarini. ³² E neri aiwi diñí soyínéyá níkwíroarigíápi samíñí mepa oeniri Gorixomi rixíñí seauriyáinigini. Saimonoxini, ríwéná joxi ámi diñí nimori níkinimóniri nioni tífámíni nibíríná ámá nioni níxídaríagía náni díxí ririxímeáowa simónarigíáyo ení sixí eámixírixini.” uríagi ³³ Pitaó re uriñinigini, “Ámináoxini, gwí riyíferani, ripikíferani, niwawini yeapíríárini.” uríagi ³⁴ o re uriñinigini, “Pitaoxini, síá riyimi karíkarí siní ríaiwá mírípa enáná xwiyíá biaú bi nioni náni re urayíríni, ‘Jisaso náni nioni majíárini.’ urayíríni.” uriñinigini.

Nigwí tñi íá tñi kirá tñi nánirini.

³⁵ O awami re uriñinigini, “Nioni xámi ‘Xwiyíá wáí emépoi.’ nisearowáriríná ‘Nigwí wowí tñi árupiañí wú tñi sikwí sú ámi bi tñi nimaxirimi memepa époi.’ searowáragi aiwi soyíné amípí wí náni díwí nikeamóniro remegíawixini?” uríagi awa “Oweoi, amípí wí náni díwí mikeamóniñwanigini.” uríagía ³⁶ o re uriñinigini, “E neri aiwi agwí soyíné goxi goxi nígwí wowí tñíoxi nimaxirimi ui. Árupiañí enánáyí eni nimaxirimi ui. Goxi goxi kirá mixí náni enjyí mayoxi enánáyí díxí iyíá nípriri bí éirixini. ³⁷ Ayí ripi náni searariñini. Bikwíyo nioni náni re niriñiri eánini, ‘Ríá kiroarigíáyo mépearigíápa omi eni níkwimixiro axípi mépepíríárini.’ niriñiri eánini. Amípí nioni náni níriñiri eániñípi xixeni nimóniniñoi.” uríagi ³⁸ awa re urigíawixini, “Ámináoxini, none mixí náni miñí bíxaú rixa ripíxaúrini.” uríagía o “Xwiyíá rixa apánirini.” uriñinigini.

Díwí Oripiyo dání Gorixomi xwiyíá ririmí wiñí nánirini.

³⁹ E niriñimi añíyo nípeyeari xegí yariñpa díwí miñí Oripiyi riniñípimi náni yaríná xegí wiepisariñowa eni númi niñiro ⁴⁰ rixa nírémoríná awami re uriñinigini, “Seteno iwamíó miseaíwapiyipa oeniri náni

Gorixomi rixinj urípoyi.” nurimi ⁴¹ áamá síjǎ anani iwanj mopaxí imóniŋe numáná xwíáyo xómiŋj niyikwímáná Gorixomi xwiyíá ririmí niwiri ⁴² re uriŋinigini, “Ápe, joxi nisimónirínáyí xeaninj nioni nímeanípi kapixí nioni nimíninj imóniŋíwá anani emi miwiárimopaxírini. E neri aiwi nioni nimónariŋípi mé dixí diŋj tǎni xixeni anani imóníwininigini.” uraríná ⁴³ aŋjǎnjǎ wo síjǎni niwimóniri eŋj sixí weámixiŋinigini. ⁴⁴ E éáná Jisaso ríninj agwí esiŋwíniŋj wímeáagi Gorixomi xwiyíá eŋj tǎni nuriríná xegí okinj nípwéríná ragíninj nípurí xwíáyo niyóísáná ⁴⁵ Gorixomi xwiyíá ririmí wiarinje dání éí niwíearómi nuri xegí wíepisariŋowa tǎnj e weninj éyí winiŋinigini. Diŋj sipí wiarinagi nání eŋj saminj niwóróa nuro sá órówapinagía niwiniri ⁴⁶ re uriŋinigini, “Pí nání soyíné sá weŋoi? Seteno iwamíó miseaíwapiyipa oeniri nání niwiápinimearo Gorixomi rixinj urípoyi.” uriŋinigini.

Jisasomi íá xegíá nánirini.

⁴⁷ Sini e uraríná re eŋjinigini. Áamá wí ikwikwierí bimiáríná áamá Judasoyi riniŋo —O wíepisariŋj wé wúkaú síkwí waú imónigíá worini. O áamáyo nípemeámi niyapiri Jisasomi kíyí miaúnimíniri nání aŋwi e báná ⁴⁸ Jisaso re uriŋinigini, “Judase, áamá imóniŋáoni pasá ninimeri kíyí nimiaúnimíniri ribariŋini?” uráná ⁴⁹ Jisaso tǎni rogíáwa omí rixa íá xiraniro yariŋagía niwíniro re urigíawixini, “Ámináoixini, ‘Awami miŋj orópoyi.’ risimónarini?” nuriro ⁵⁰ wo re eŋjinigini. Apaxípániŋj imóniŋj seáyi e imóniŋoyá xináíniŋj nimóniri omiŋj wiariŋomi miŋj róminiri éyí píri nímoýíkiri aríá wé náúmi dáŋo miŋj wirípieaŋjiniŋi. ⁵¹ Aríá miŋj wirípieáagi Jisaso “Pǎni wiáripoyi. E mepani.” nuriri áamá aríá miŋj wirípieáomi wé seáyi e níkwíariri naŋj imixiŋjiniŋi. ⁵² Omi naŋj nimiximáná apaxípániŋj imónigíá xwéowa tǎni porisí aŋj ridiyowá yarigíwámi awí mearoarigíáwa tǎni Judayí mebaówa tǎni awa xómi íá xiraniro bíáyo re uriŋinigini, “Soyíné miŋj tǎni iwanj tǎni íá maxirigíáyí áamá íwí xauráparigíáyo íá xiraniro yarigíápa nianiro ribariŋoi? ⁵³ Nioni síá ayí ayo aŋj sipisipí ridiyowá yarigíwámi ŋweaŋáná soyíné íá wí minixirarigíawixini. E neri aiwi áríwiyíná obo emearíná soyíné íá níxiraniro nání riseaimóniŋoi?” uriŋinigini.

Pitao “O nání majónirini.” uriŋj nánirini.

⁵⁴ Jisaso e uríagi aí awa omí íá níxero níméra nuro apaxípániŋj imóniŋj seáyi e imóniŋoyá aŋj e mearémóáná Pitao awami ríwíyo yaxídí néra nuri ⁵⁵ áamá wí ákiŋáyo aŋjriwámi dání ríá níkearo ŋweaŋagía niwiniri o eni nípáwiri niwímeari e éí ŋweaŋáná ⁵⁶ apixí omiŋj wiariŋj wí ríá wíá óniŋáná Pitaomi símimanj síŋwí niwiniri síŋwí agwí niwíga nípeyiri áamá e ŋwixapigíáyo re uriŋinigini, “Áamá ro eni Jisaso tǎni emearinj worini.” uríagi aí ⁵⁷ Pitao “Oweoi.” nuriri re uriŋinigini, “Ine, jíxi rariŋo nání

nioni majjárini.” nuriri ⁵⁸ niṅweámáná eṅáná ámi wo omi siṅwí niwiniri re uriṅinigini, “Joxi eni áamá Jisasoyáowa woxíniṅí imónarini.” uríagi aí Pitao “Royi, nioni xerṅwonirini.” nuriri ⁵⁹ niṅweaṅisáná eṅáná áamá ámi wo áamáyo aríkí “Áamá ro eni Gariri piropeniṣíyo dáño eṅagi náni nepa Jisaso t́ni emeariṅorini.” urayaríná ⁶⁰ Pitao re uriṅinigini, “Royi, joxi rariṅíyí nioni majjárini.” sini e uraríná re eṅinigini. Karíkarí wo rixa ríaiwá riṅinigini. ⁶¹ Karíkarí ríaiwá ráná Jisaso nikinimóniri Pitaomi siṅwí wináná o Jisaso píné xámi re uríípi “Karíkarí sini ríaiwá mirí eṅáná joxi biaú bi ayo ‘Jisaso náni nioni majjárini.’ urayiríini.” uríípi náni diṅí winíagi ⁶² nipeyari ákiṅá bíariwámi dáni ṅwí piyí wíriniṅinigini.

Iwanṅí mépero xwirixí mépero egiá nánirini.

⁶³ Áamá Jisasomi íá xirárigíyáí ikayíwí numeariro iwanṅí niméperíná ⁶⁴ xegí siṅwíyo wíá nitárimáná iwanṅí nearo re nura ugíawixini, “Wíá nearókiamoariṅoxini, iwanṅí go ría rearini? Joxi wíá rókiamoariṅoxi eṅagi náni rixa áwanṅí nearei.” nuriro ⁶⁵ ikayíwí numeariróná ayá wí nuríásáná ⁶⁶ rixa wíá ónáná Judayí mebáowa xwirixí imixarigíyáí, ayí apaxípániṅí imónigíá xwéowa t́ni ṅwí ikaxí eániṅípi mewegíáwa t́ni awí eánáná Jisasomi awa t́ámini niméra nibiro wárigíá ⁶⁷ awa re urigíawixini, “Joxi yeáyí neayimixemeanfa náni aríowayá xwíá piaxíyo dáni iwiaronfoyi rariṅwáoxi eṅánáyí, áwanṅí nearei.” uríagiá aiwi o re uriṅinigini, “Nioni nisearíagi aiwi soyíné ‘Neparini.’ niyaiwiro aríá nipiṛiméoi. ⁶⁸ Nioni eni yariṅí bi seaíánáyí, soyíné áwanṅí wí nipiṛiméoi. ⁶⁹ E neri aiwi re searariṅini, ‘Áamá imóniṅáoni Gorixo, eṅí sixí eániṅoyá wé náúmni ṅweámi náni aṅwi ayorini. Íníná o t́ni niṅweari óniṅí imónimíarini.’ searariṅini.” uríagi ⁷⁰ nowani re urigíawixini, “Joxi niaíwí Gorixoyáoxirani?” uríagiá o “Soyíné api nirariṅoi.” uríagi ⁷¹ awa re rinigíawixini, “None xewaniṅo xwiýíá meárinipaxípi rariṅagi aríá wíwáyí náni siṅwí winarogíá ámi wí nibiro xwiýíá mearipaxí mimónini.” rinigíawixini.

Omi Pairato t́ṅí e wárigíá nánirini.

23 ¹ E niriniro nowani niwiápinimearo Jisasomi gapimaní Pairato t́ṅí e náni niméra nuro ² nirémómáná Jisaso náni nixekwímoro Pairatomi re urigíawixini, “O yapí nineaíwapiya nuri Judayene yariṅwáyí nineawiaílkiri ‘Émáýyá mixí ináyí Sisaomi niṅwí takisí náni mini miwipani.’ nineariri xewaniṅo náni re rarini, ‘Nioni áamá yeáyí seayimixemeámíá náni aríowayá xwíá piaxíyo dáni iwiaronṅáoni, mixí ináyí imóniṅáonirini.’ rariṅagi aríá wíwárinini.” uríagiá ³ Pairato Jisasomi yariṅí niwía nuríná yariṅí re wiṅinigini, “Joxi Judayíyá mixí ináyí imóniṅoxirani?” uríagi o “Joxi dixí rixa api nirariṅini.” uríagi ⁴ Pairato apaxípániṅí imónigíá xwéowami t́ni áamá e eṛíroyí egiáyo t́ni

re uriŋinigini, “Xwiyía mearipaxí imóniŋí bi nání piá meginariŋini.” uríagi aiwi ⁵awa aríkí re urayigíawixini, “Jisaso Judia piropeniśí re ami ami nemerí áamá níní re oyaiwípoyiniri, ‘O negí mixí ináyí imónáná émáyo mixí xídownáraníwárini.’ oyaiwípoyiniri nuréwapiya warinorini. Gariri piropeniśíyo dání néra biŋyí re eni aí nearéwapiyarini.” uríagiá ⁶Pairato aría e niwiri awami yariŋí re wiŋinigini, “O Gariri piropeniśíyo dánorani?” uríagi ⁷awa re urigíawixini, “Oyi, Jisaso piropeniśí gapimaní Xeroto meŋweaŋíyo dánorini.” uríagiá Xeroto eni íná Jerusaremi ŋweaŋagi nání Pairato o tŋí e nání wiowárigíini.

Omi Xeroto tŋí e nání wiowárigíá nánirini.

⁸Judayowa Jisasomi gapimaní Xeroto tŋí e nání niméra úáná o eŋíná dání amípí Jisaso yariŋyí nání aría niwiri “Omi siŋwí owinimini.” niyaiwia bagí nání omi siŋwí niwiniríná yayí niwiniri “Jisaso emimí bi oníwapiyini.” niyaiwiri ⁹yariŋí obaxí niwiayariŋagi aiwi xíoyá bi muriŋinigini. Muripa yaríná ¹⁰apaxípaniŋí imónigíá xwéowa tŋí ŋwí ikaxí eániŋípi mewegíáwa tŋí xwiyía ría tŋí xekwímóagía ¹¹Xeroto tŋí xegí porisowa tŋí uyíní mero ikayíwí meariro nemáná rapirapí awiaxí wú mixí ináyowa yínarigíá imóniŋí wú nuyíriro ámi Pairato tŋí e nání wiowárigíini. ¹²Xeroto tŋí Pairato tŋí xámi xepixepá rónagíwaú síá ayimi nawíni imónigíisixini.

“O pí éagi íkíáyo yekwiroárimíni?” uriŋí nánirini.

¹³Jisasomi ámi Pairato tŋí e nání niméra úáná Pairato “Apaxípaniŋí imónigíá xwéowa tŋí Judayí mebáowa tŋí áamá níní tŋí obípoyi.” niriŋí ¹⁴awa ámi báná re uriŋinigini, “Soyíné xámi áamá ro nimeámi nibiri re niriáwixini, ‘O áamá níní “Émáyo mixí xídownáraníwárini.” oyaiwípoyiniri nisearéwapiya emearinorini.’ niriá aiwi soyíné xwiyía umeararigíápi nání nioni segí siŋwí anigíe dání yariŋí wiayíagi aiwi omi xwiyía mearipaxí wí mimóninigini. ¹⁵Xeroto eni piá niwiri aí omi xwiyía mearipaxí bi mimónipa eŋagi nání ámi none tŋí e nání seapowárenapírini. Aría époyi. None omi pikiani nání uyíní eŋí bi aga mimónini. ¹⁶Ayináni ‘Nioni yariŋápi nání rinearinói?’ oyaiwiniri sa iwaníni niméperi wárimíni.” uráná ¹⁷Judayí xwiogwí ayí ayo aiwá Aníŋajo Múroagi nání narigíáyimi “Émáyi gapimano negí áamá gwí ŋweaŋí wo oneawárini.” niyaiwiro nání ¹⁸⁻¹⁹ámá e epíroyí egíá nawíni níní xixewiámí re urigíawixini, “Jisasomi nipíkiri Barabasomi —O Jerusaremi ŋweagíáyí wa tŋí niwiápínimearo ‘Émáyo mixí oxídownáreneyi.’ niriŋí mixí niwiróná áamá pikíagía omi émáyi íá nixero gwí aŋíyo ŋwirárigíorini. “Omi neawárii.” uráná ²⁰Pairato “Jisasomi owárimini.” niyaiwiri áamá ayo ámi bi uríagi aiwi ²¹ayí ríminiŋí tŋí re urayigíawixini, “Íkíáyo yekwiroárei. Íkíáyo yekwiroárei.” urayaríná ²²Pairato rixa biaú uríí aiwi

ámi bi re uriñinigini, “Pí nání? O pí íwí éí nání íkíáyo yekwiroárimíni? Xwiýá omi nimeariri pikipaxí wí imóniñagi miwinimeáini. Ayináni iwanjini niméperi wárimíni.” uríagi aí ²³ámá ayí Pairato omi íkíáyo oyekwiroáriniri aríkí ámi wíni símí tñi nurayiróná píné Pairatoyá xórórí wigíawixini. ²⁴Píné oyá xórórí wiágia nání re uriñinigini, “Segí seaimónariñipi xe oimónini.” nuriri ²⁵ámá níni wiwanijíyí “Neawárii.” urío —O Jerusaremi ñweagiáyí wa tñi niwiápínimeari “Émáyo mixí oxídownaneyi.” niriro mixí niwiróná ámá pikíagía omi émáyí íá nixero gwí añíyo ñwirárigíforini. O nání ayí “Neawárii.” urífomi Pairato niwárirí Jisaso nání wigí ñiñí yaiwííáyo nixídiri porisowa íkíáyo yekwiroáripíri nání mini wiñinigini.

Jisasomi yekwiroárigíá nánirini.

²⁶Mini wíáná porisowa omi niméra nuríná Jisasomi iwanj mépeayíá enjagi nání rixa enj meánipa neri ná neága waríñagi niwiniro ámá wo Saimonoyi riniño —O añj xegí yoí Sairini dánjorini. O maiwí amíyo dání Jerusaremi nání bariñomi óí e órórí niniro “O íkíá yoxáípa níkwónimi Jisasomi oxíidini.” niyaiwiro omi íkíá yoxáípa sañwíyo niwikwiáriro niméra waríná ²⁷ámá oxí apixí obaxí íkwikwierí ríwímíni nuro apixí obaxí wíwa eni ríwíyo númi nuróná ñwapé tñi ámixíá niwíaxída waríñagía ²⁸Jisaso nikinimónirí re uriñinigini, “Jerusaremi dánj apixí riwayíné nioni ñwí minímieapa époyí. Sewaniñíwayíné nání mieainiro segí niaíwíyo miearo érixini. ²⁹Ayí ripi nání searariñini. Ríwéná xeaniñí ríá tñí seaímeaníá enjagi nání apixí niaíwí tígííwa wigí niaíwí nání aga ñiñí sipí winíá enjagi nání ámá re ripírárini, ‘Apixí oxí rogííwa tñi sini apiyá niaíwí mixirígííwa tñi apixí sini niaíwí aminí mini miwípa yarígííwa tñi íwa yayí owinini.’ ripírárini. ³⁰Xeaniñí api aga xaíwí seaímeaníá enjagi nání ámá díwí miñíyo ‘Nipiérori neaikwarimoi.’ uriro díwí miñí onimiápia wími eni ‘Seáyi e rití neaii.’ uriro epírárini. ³¹Wé róniñáoni íkíá siñiñiñí imóniñáoni aí xeaniñí níkáriáyí nání seyíné íwí yarígíáyo dání íkíá kiríñiñiñí imóniñíáyíné añipaxí seaikáriníárini.” uriñinigini. ³²Ámá rikikirió yarígííwau eni Jisaso tñi nawíni pikianiro nání níkwimixiro niméra nuro ³³rixa yoí ámá Miñí Gixweái riniñe nirémoro omi íkíáyo niyekwiroárimáná midimidáni rikikirió yarígííwau eni yekwiroáraríná ³⁴Jisaso Gorixomi re uriñinigini, “Ápe, nioni niarígíá tñí awa majíá nimónimáná niaríñagía nání joxi yokwarimí wiii.” uraríná porisowa Jisaso rapírapí goni goni meáminiréiniri sárú nero yanj inaríñagía ³⁵ámá númi bíáyí e nírówapiro siñwí niwiniro Judayí ámináowa eni aí ripirí número re rigíawixini, “O ámá wíyo arirá wiagorini. O nepa ámá aríowayá xwíá piaxíyo dání iwíaronífoyi rariñwáo enjánáyí, Gorixo níripearí nene yeáyí neayimixemeanía nání uowárénapinífoyi rariñwáo enjánáyí, xewaniño arirá oinini.” nira waríná

³⁶porisowa eni ikayíwí numeariróná iniigí wainí mixí yariñípi mini wianiro nání aṅwí e nibiro ³⁷re urayigíawixini, “Joxi Judayíyá mixí ináyoxi eṅánáyí, jiwaniṅoxi éí míninei.” urigíawixini. ³⁸“Ámá royí mixí ináyí Judayíyáorini.” niriro íkíá wáráyo ríwamiñí e neámáná oyá yoxáíyo xwápiyi seáyi émi píraugíawixini.

³⁹Ríkikiríó yarigíwaú, Jisasomi midimidáni íkíáyo yekwiroárfíwaú wío Jisasomi ikayíwí nuriri re uriñinigini, “Joxi nepa ámá yeáyí neayimixemearía nání aríowayá xwíá piaxíyo dání iwiaroníoyí rariñwáoxirani? Jiwaniṅoxi éí míniniri yawawi eni yeaminiri ei.” uríagi aí ⁴⁰wío “E muripani.” nuriri mixí re uriñinigini, “Ríniñí o meariñípi joxi axípi nimeari aiwi Gorixo nání wáyí misinarinirani? ⁴¹Yawawi yeapikíáná ayí ananirini. Íwí yarigwííyo dání xixeni yeapikiariñoi. Ámá royí íwí bi méagi aiwi pikariñoi.” nuriri ⁴²Jisasomi re uriñinigini, “Joxi rixa mixí ináyí nimóniri nimeṅwearíná nioni nání diñí mórixini.” uríagi ⁴³Jisaso re uriñinigini, “Nepa rirariñini. Agwí nioni tñni aṅñami ṅweaníwii.” uriñinigini.

Jisaso peñí nánirini.

⁴⁴Rixa sogwí áwini e ṅweañáná re eñinigini. Sogwí nisíkwiri aṅí nimini síá xafwí niyinára nuri rixa 3:00 p.m. imónáná sogwí ámi noxárori aniñinigini. ⁴⁵Sogwí síkwíariñáná rapirapí septiá aṅí sipisípí ridiyowá yarigíwá ṅwíá tññimini epañioárininíú áwini e naxinowárirí wúkaú epañioárininíñini.

⁴⁶Jisaso ráiawá re riñinigini, “Ápoxini, gí diñí oriñwirárimini.” nurimi diñí yáñinigini. ⁴⁷Jisaso diñí yáníagi porisowami seáyi e imóniño amipí ayí e éagi siñwí e niwiniri Gorixomi yayí numeri re riñinigini, “Ámá ro nepa wé róniño, sipí wí mimixipa eṅomi aí pikíwini.” riñinigini. ⁴⁸Ámá oxí apixí níni Porisowa Jisasomi yekwiroáraríná siñwí winaniro bimííáyí sogwí síkwíariri ámi oxárori neri Jisaso peri éagi niwiniro ayá íá nixirinimi wigí aṅí e nání umigíawixini. ⁴⁹Ámá Jisasoyá xegí imóniñíyí tñni apixí Gariri piropenisíyo dání o tñni nawíni bigííwa tñni ná jíami onimiápi nirómáná omi pikiaríná amipí api e éagi siñwí winigíawixini.

Jisasomi xwíá weyárigiá nánirini.

⁵⁰⁻⁵¹Ámá wo xegí yoí Josepoyi riníño —O Judia piropenisíyo aṅí xegí yoí Arimatia dánorini. O Judayíyá xwirixí mearigíá mebáyí worini. O wé róniño eṅagi nání xegí wía Jisasomi pikianiro nání mekaxí número yarigíápi nání “Apánirini.” miwimóniñorini. “Gorixo xwioxíyo mimeámí neri neameṅweaníápi gíni gíná imóniniáráni?” niyaiwiro weniñí neri ṅweañorini. ⁵²O émayí gapimaní Pairato tññí e nání nuri Jisaso piyomi xwíá weyáriminiri nání yariñí niwiri Pairato “Oyi.” uríagi nuri ⁵³Jisaso

pikífomi nimeámi niwepíniri xwía e dání rapirapí apía wenjipi tñi xopixopí nirori síñáyo áamá óí rixigíáyimi —Ayi áamá sini mitagíáyirini. Ayimi timiniri nání nimeámi nuri ínimi tñiniginí. ⁵⁴ Sabaríá nání amipí pírániñí nimixiro tarigíáyimi nitiri aiwi Sabaríá náyi rixa aŋwi e eŋáná tñiniginí. ⁵⁵ Apixí Gariri piropenisíyo dání númi bífwa “Jisasomi arige ría tarini?” niyaiwiro síŋwí winaniro númi nuro síñá óíyimi síŋwí niwiniróná xíomi tariná eni síŋwí niwinimi ⁵⁶ wigí aŋj e nání nuro Sadéyo Jisasoyá wará xópé éwaniginiri íkiá díá dñj naŋj eaariñj bi tñi gínií bi tñi pírániñí nimixiro nitiro sá wegííwa Sabaríáyo ŋwí ikaxí eániñipi rariñpa kikiíá ŋweagiawixini.

Jisaso ámi wiápínimeañj nánirini.

24 ¹ Sadéyo aga wía móniñimi íwa íkiá díá tñi gínií tñi xámi pírániñí imixárigíápi nimeámi nuro ² rixa Jisaso xwía weyárinñe nirémoro síñá xwáripáyo maŋj e éí rárárinño mimegwinári nimega nuri yáni e weŋagi niwiniro ³ óíyimi nipáwiro aí Áminá Jisaso miweŋagi niwiniro ⁴ “Piyo geríani?” niyaiwiro ududí niniro roŋáná re eŋiniginí. Áamá waú egí rapirapí xwiníá eagííwaú símimaŋj e rónapigíísixini. Símmimaŋj e rónapáná ⁵ apixíwa wáyí nikáriniro símimaŋj xwíáyo íkwíróáná awaú re urigíísixini, “Síñj úo nání áamá xwía weyárarigíe pí nání píá yariñoi? ⁶ Sini re miwenini. Rixa wiápínimeáiniginí. O sini seyíne tñi Gariri piropenisíyo nemeríná seariñipi nání dñj mópoyi. ⁷ Re seariñirini, ‘Negí Judayí áamá imóniñáoni miyí niniriróná áamá íwí yarigíáyí íá ninixero íkiáyo niyekwiroáripíríá eŋagi aí ámi síá wiyáú wiyi rixa nórimáná eŋáná wiápínimeámíarini.’ riñirini.” uríagí ⁸ íwa Jisaso xwiyíá eŋnáná urinñj api nání dñj niwiniri ⁹ xwáripáyo píni niwiárimimi nuro wiewisariñj wé wúkaú síkwí wo awami íwa winíápi nání repiyí niwiro áamá Jisasoyá xegí imóniñíyo eni niyoni repiyí wigíawixini. ¹⁰ Apixí repiyí wiarigííwa Magídara dñj Mariaí tñi Joanaí tñi Jemisomi xináí Mariaí tñi ámi wíwa tñinirini. Íwa wáf wurimeariŋigíawami wigí winíápi nání áwaŋj uríagía aí ¹¹ “Íwa wigí xwiyíá íkiá iwíyo dáníniñj rariñoi.” niyaiwiro “Nepaxini.” miyaiwipa nero aí ¹² Pitao niwiápínimeari aŋjini nuri xwáripáyo nirémómáná nipíkwíniri ínimi weníñj éyí winiñiniginí. Rapirapí Jisasomi xopixopí róniñuni wí e weŋagi niwiniri ámi xegí aŋj e nání nuríná e eŋagi winíípi nání ududí néra uñiniginí.

Wiewisariñj waú Emeasi nání waríná wímeañj nánirini.

¹³ Jisasoyá xegí áamá imóniñíyí waú síá axíyiminí aŋj Emeasiyi riníñipimi nání nuri —Aŋj api Jerusaremi dání ná jíamine onimíápirini. ¹¹ kiromita imóniñerini. ¹⁴ Awaú óíyo nuri Jerusaremiyo amipí Jisasomi wííápi nání repiyí niga nuri ¹⁵ xwiyíá niriŋa waríná Jisaso xewaniño

aŋwi e nibiri niwímeari awaú t́ni naẃni nuro ¹⁶ awaú Jisasomi siŋwí niwiniri aiwi omi mí mómixí yaríná ¹⁷ Jisaso yariŋí re wiŋinigini, “Awagwí aŋí nuríná xwiyía niriga warigípi pí éí náni niriga wariníi?” uráná awaú éí nirómáná símimaŋí kipiní niyiri ¹⁸ wío, Kiriopasoyi riniŋo re uriŋinigini, “Ámá níni Jerusaremi urínaniro úíáyo sa joxini e imónípi náni majíáraní?” uríagi ¹⁹ o yariŋí re wiŋinigini, “Jerusaremiyo pí imóníinigini?” uríagi awaú re urigísixini, “Nasareti dání Jisaso náni rinariŋwii. O Gorixoyá siŋwíyo dání ámá níniyá siŋwíyo dání eni wíá rókiamoariŋí eŋí eániŋí wo nimóniri emimí eri xwiyía pírániŋí urimeri yariŋo náni rinariŋwii. ²⁰ Omi apaxípániŋí imónigíá xwéowa t́ni negí áminá neameŋweagíáwa t́ni xwirixí numero omi íkiá seáyiyo oyekwiroáripoyiniri émáyo mini wíoi. ²¹ Xámi nene diŋí re kikayówáriní, ‘Gorixo nene émáyiá gwí ŋweaŋwaénéniŋí imóniŋwaéne neáikweanía náni uowárenapiníó ámá oríani?’ Diŋí e kikayówáriní. Xwiyía api aí ámi bí ripirini. Omi rixa nipikímáná eŋáná síá wiyáú wiyi óráná ²² agwi síá riyimi neneyá apixíwa ayá nearemóoi. Íwa wíá móniŋími ámá xwáripá t́ŋí e náni nuro aí ²³ piyí t́io miweŋagi niwiniro nene ŋweaŋwaé náni nibiro re nearói, ‘Newané xwáripáyo dání oriŋá niwiniranéná aŋínají waú nirónapiri “O siŋí uŋoi.” nearíi.’ nearíagiá ²⁴ negí ámá wa ámá piyo t́fe náni nuro apixíwa nearíapi sini axípi e imóniŋagi niwiniro aiwi piyomi siŋwí bí miwináoi.” Jisasomi repiyí e wíagíi ²⁵ Jisaso re uriŋinigini, “Awagwí majimajíá yariŋíwagwírini. Amipí wíá rókiamoagíáwa niriro ríwamiŋí eagíapi aríá niwiri aiwi aŋíni ‘Neparini.’ niyaiwiri diŋí mikwíropa yariŋíwagwírini. ²⁶ Awagwí ámá yeáyí seayimixemeaníá náni aríowayá xwíá piaxíyo dání iwiaroníoyi rarigíó náni re riyaiwariŋíi, ‘O ríniŋí bí mimeá anani mixí ináyí nimóniri níkinimi Gorixo t́ámíni ŋweapaxírini.’ riyaiwariŋíi? Oweoi, xámi ríniŋí nimeámáná ríwíyo níkinípaxírini.” nuriri ²⁷ ríwamiŋí Gorixoyáyo amipí xío náni niriniri eániŋípi Moseso eaje dání repiyí pírániŋí niwíera uri amipí wíá rókiamoagíáwa ríwíyo eagle dání eni repiyí pírániŋí niwíera uri eŋinigini. ²⁸ Aŋí awaú warigíe rixa aŋwi e nirémoríná Jisaso awaú “O wiá rí nimúrori uniŋoi.” oyaiwípiyiniri wíwapiyaríná ²⁹ awaú urakioŋwiráraniri náni re urigísixini, “Joxi miyeamúropani. Sogwí rixa wéí eŋagi náni síá róriniŋoi. Yawawi t́ni sá re oweaneyi.” uríagíi awaú t́ni sá wémíniri náni naẃni aŋíyo nipáwiro ³⁰ niŋweagíásáná rixa aiwá naniro neríná Jisaso bisíkeríapi nimeari Gorixomi yayí niwimáná níkwiriri mini wiaríná ³¹ awaú rixa siŋwí mí wómixipaxí nimóniri omi siŋwí mí wómixáná re eŋinigini. O awaú siŋwí anigíe dání aníniŋinigini. ³² O aníniŋagi niwiniri re rinigísixini, “O t́ni óíyo nibiranéná o xwiyía Gorixoyá ríwamiŋí eániŋípi pírániŋí repiyí niyeaiéra baríná yegí xwioxíyo dání rixa diŋí níá yeáírini.” niriniri ³³ axíná Jerusaremi náni niwiápinimeámi nuri wiepisiariŋí wé wúkaú sikwí wo egíáwami

tíni áamá awa tíni nawíni ŋweagíáyo tíni niwímeari ³⁴ ayí “Ámináo rixa wiápínimeánigini. Saimonomi siǵáni wimónínigini.” rinariŋagía aríá niwiri ³⁵ amipí óíyo néra úǵipi náni áwanǵi nuriri re urigísisixini, “O rixa bisíkeríá kwirariná yawawi rixa siǵwí mí wómixíwísisixini.” urigísisixini.

Wiepisiǵíyo áwini e éi rónapiǵí nánirini.

³⁶ Sini Jisaso náni áwanǵi e urariná re enǵinigini. Xewaniǵo áamá niyoni áwinimi dáni siǵáni rónapiǵinigini. ³⁷ Siǵáni rónapáná ayí sirí nipikíniro wáyí nikáriniro “Piyíǵi siwí womi siǵwí ría winiǵwini?” yaiwiaríná ³⁸ o re uriǵinigini, “Seyíné ói nikáriniro ‘Jisatoríani?’ miyaiwí diǵí obibaxí pí náni nimóa warínoi? ³⁹ ‘Ayí Jisatoríani?’ yaiwipíri sikwíyo tíni wéyo tíni siǵwí nanípoyi. ‘Gíwí tíni enǵí tíni eni rí reni?’ yaiwipíri wé seáyí e nikwiárípoyi. Piyíǵi siwí gíwí tíni enǵí tíni tíǵrani?” nuriri ⁴⁰ xegí wé tíni sikwí tíni siwá wáǵi ⁴¹ ayí yayí seáyimi dáni winaniro nero aí sini “Aga Jisatoríani?” miyaiwí ududí niwiga waríná o ayí “Piyíǵi siwímani. O aiwá narini.” oyaiwípoyiniri re uriǵinigini, “Nioni nimi náni aiwá bi menirani?” uríǵi ⁴² ayí peyí píri bi umealáná ⁴³ o nurápíri wigí siǵwí anigíe dáni niǵinigini.

⁴⁴ O re uriǵinigini, “Xámi nioni sini seyíné tíni nemeríná xwiyíá ripi seariǵanigini, ‘Ríwamiǵí amipí nioni náni Moseso ŋwí ikaxí niri eanǵipi tíni wíá rókiamoagíáwa niri eagíapi tíni Bikwí Samíyo niriniri eániǵipi tíni wí surímá mé aga xixeni nimóniníárini.’ seariǵanigini.” nuriri ⁴⁵ awa ríwamiǵí xío náni Bikwí Gorixoyáyo eániǵipi niǵíá oimónípoyiniri wigí diǵí jáyoyi naǵí niwimixiri ⁴⁶ re uriǵinigini, “Enǵíná dáni Bikwíyo ríwamiǵí re niriniri eánini, ‘Ámá yeáyí seayimixemeanía náni aríowayá xwíá piaxíyo dáni iwaronío ríniǵí nimeari niperi aiwi síá wiyau wiyi óráná ámi xwáripáyo dáni wiápínimeaníárini.’ niriniri eánini. ⁴⁷ Ripi eni niriniri eánini, ‘Ámá omi diǵí niwikwíroriǵipimi dáni xegí imóniǵíyí xwiyíá ripi wáí wurimeipíríárini, “Segí íwí yariǵíyí ríwímimi nimamoro saniǵí imónánáyí, Gorixo yokwarimí seaiǵiníoi.” Jerusaremi dáni aǵí nimini wáí e wurimeipíríárini.’ niriniri eánini. ⁴⁸ Seyíné amipí nioni náni winíá ripi náni áwanǵi urimérixini. ⁴⁹ Aríá époyi. Gí ápo enǵíná segí seáwowayá símimanǵí e dáni ‘Nioni segí seáráwéyo gí kwíyípi wimíárini.’ uriǵípi seyíné seáímeanía náni nioni rixa seaiapowárimíni. Seyíné Gorixoyá kwíyí émi dáni sini enǵí miseaeámixipa neríná aǵí ripimi píni niwíárimí ami ami mupani. E neri aí rixa enǵí seaeámixáná nioni náni ami ami wáí urimérixini.” uriǵinigini.

Aǵínami náni peyíǵí nánirini.

⁵⁰ O Jerusaremi dáni ayo niwirimeámi nuri aǵí xegí yoí Betaniyi riníǵipimi nírémómáná xegí wé seáyí e nimixiri ayí Gorixoyá diǵí tíni píraníǵí oŋweápoyiniri amipí yariǵí niwiri ⁵¹ sini niwiaríná Gorixo omi

niménapimi rixa aṅínami nání peyiṅinigi. ⁵²Rixa aṅínami nání peyíagi ayí e siṅwí niwinimi ámi Jerusaremi nání nuro seáyimi seáyimi nimóga nuróná ⁵³íniná aṅí ridiyowá yariḡíwámi nipáwiyairo Gorixomi seáyí e umeagíárini.